

新式標點

王安石全集

乙亥二月

杜就田署



# 王安石全集卷二十二

律詩 七言

## 奉酬永叔見贈

欲傳道義心猶在，（一作雖壯）強學（一作學作）文章力已窮。他日若能窺孟子終身，何敢望韓公。攜衣最出諸生後，倒屣嘗傾廣座中。祇恐虛名因此得，嘉篇爲脫豈宜蒙。

## 送陳舜俞制科東歸

諸賢登策未央宮，獨得留川一老翁。曲學暮年終漢相，高談平日漫周公。君今壯歲收科第，我欲他時看事功。聞說慨然真有意，贈行聊似古人風。

## 送何正臣主簿

何郎冰雪照青春，應敵皆言筆有神。魯國儒人何獨少，元君畫史故應真。百年冠蓋風雲會，萬里山川日月新。可但諸公能品藻，會須天子擢平津。

## 與舍弟華藏院此君亭詠竹

王安石全集 卷二十二 律詩

一逕森然四座涼，殘陰餘韻去何長！人憐直節生來瘦，自許高材老更剛。曾與蒿藜同雨露，終隨松柏到冰霜。煩君惜取根株在，欲乞伶倫學鳳凰。

## 上元戲呈貢父

車馬紛紛白晝同，萬家燈火暖春風。別開闔闔盡天外，特起蓬萊陸海中。盡取繁華供俠少，祇分牢落與衰翁。不知太乙遊何處，定把青藜獨照公。

## 次韻楊樂道述懷之作

素心非不慕前修，自怪因循欲白頭。獵較趨時終瑣瑣，畫墁營職信悠悠。濼梁最憶知魚樂，牢笑翻慙爲虱謀。尙有故人能慰我，詩成珠玉每相投。

## 和楊樂道見寄

宅帶園林五畝餘，蕭條還似茂陵居。殺青滿架書新繕，生白當牕室久虛。孤學自難窺奧密，重言猶得勉空疎。相思每欲投詩社，只待春蒲葉又舒。

## 寄吳冲卿二首

平生身事略相同，三歲連膺左臚中。更得謬恩分省舍，又將

衰髮作鄰翁，聯翩久傍宮。愧緣契闊，今看楚。紅不，欲與君為遠別。沙臺吹帽約秋風。

一一 時吳晉州方得舉

塞垣花氣欲飛浮，眼底紛紛綠漸抽。悠遠山川嗟我老，急難兄弟想多愁。舊知白日諸曹滿，試問紅燈幾客留。時節只應無意思，亦如行路判春秋。

酬沖卿見別

同官同齒復同科，朋友婚姻分最多。兩地塵沙今鬪鬪，二年風月共婆娑。朝倫孰與君材似，使指將如我病何。升黜會應從此異，願偷閑暇數經過。

次御河寄城北會上諸友

客路花時祇攪心，行逢御水半晴陰。背城野色雲邊盡，隔屋春聲樹外深。香草已堪回步履，午風聊復散衣襟。憶君載酒相追處，紅蕖青跗定滿林。

寄友人三首

萬里書歸說我愁，知君不忘北城幽。一篇封禪才難學，三畝蓬蒿勢易求。欲與山僧論地券，願為鄰舍事田疇。應須急作南征

計，漢北風沙不可留。

一一

水邊幽樹憶同攀，會約移居向此間。欲語林塘迷舊逕，卻隨車馬入他山。飛花著地容難冷，鳴鳥窺人意轉閑。物色可歌春不返，相思空復慘朱顏。

三二

一別三年至一方，此身飄蕩只殊鄉。看沙更覺蓬萊淺，數日空驚霹靂忙。渺渺水波低赤岸，濛濛雲氣淡扶桑。登臨舊興無多在，但有浮槎意未忘。

寄張襄州

襄陽州望古來雄，耆舊相傳有素風。四葉婁閭唐尹氏，一門逃世漢龐公。故家遺俗應多在，美景良辰定不空。遙憶習池寒夜月，幾人談笑伴詩翁。

次韻昌叔懷灑樓讀書之樂

志食長年不得休，一巢無地拙於鳩。聊為薄宦容身者，能免高人笑我不。道德文章吾事樂，塵埃波浪此生浮。看君別後行漸愈，回顧灑樓祇自羞。

酬淨因長老樓上翫月見懷有「疑

君魂夢在清都」之句。

道人心與世無求，隱几蕭然在此樓。坐對高梧傾曉月，看翻清露洗新秋。登臨更欲邀元亮，披寫還能擬惠休。顧我不知天上樂，虛疑昨夜夢仙遊。

寄張諤招張安國金陵法曹

我老願爲臧丈人，君今少壯豈長貧？好須自致青冥上，可且相從寂寞濱。深谷黃鸝驕引子，曲磬翠碧巧藏身。尋幽觸靜遠成興，何必區區九陌塵。

欲往淨因寄涇州韓持國

紫荆山下物華新，只與都城共一春。令節想君攜綠酒，故情憐我踏黃塵。泔魚已悔他年事，搏虎方收末路身。欲寄微言書不盡，試尋僧閣望西人。

送別韓虞部

客舍徇南初著巾，與君兄弟卽相親。當年豈意兩家子，今日更爲同社人。京洛風塵勞阻關，江湖杯酒惜逡巡。歸帆嶺北茫茫水，把手何時寂寞濱。

王安石全集 律詩 卷二十二

懷舒州山水呈昌叔

山下飛鳴黃栗留，溪邊欲啄白符鳩。不知此地從君處，亦有人纒我不塵。土生涯休澗滌，風波時事只飄浮。相看髮禿無歸計，一夢東南卽自羞。

呈柳子玉同年

三年不上鄴王臺，鴻雁歸時又北來。水底驚波吹歲換，柳梢新葉卷春回。塵沙漠漠凋雙鬢，籟籟忽忽把一盃。勞事欲歌無與和，衰顏思見故人開。

次韻陸定遠以謫往來求詩

牢落何由共一樽，相望空復軟芝焚。儕時尚負生平學，慰我應多別後文。可但風流追甫白，由來家世出機雲。行吟強欲偷新格，自笑安能到萬分。

李璋下第

浩蕩宮門白日開，君王高拱試羣材。學如吾子何憂失，命屬天公不可猜。意氣未宜輕感慨，文章尤忌數悲哀。男兒獨患無名爾，將相誰云有種哉。

送楊驥秀才歸鄱陽

客舍風塵弊綠衣，悲吟重見雁南飛。荆山和氏方三獻，太學何生且一歸。曠野已寒諸獨宿，長年多難惜分違。巾箱所得皆幽懿，亦見鄉人爲發揮。

### 平山堂

城北橫岡走架虬，一堂高視兩三州。淮岑日對朱欄出，江岫雲齊碧瓦浮。墟落耕桑公愷悌，杯觴談笑客風流。不知峴首登臨處，壯觀當時有此不。

### 示德逢

先生貧傲古人風，朽想榮桑在眼中。憐慙雞豚非孟子，勤勞禾黍信周公。深藏組紱三千牘，靜占寬閑五百弓。處世但令心自可，相知何藉一劉琨。

### 示四妹

孟光求壻得鴻，廡下相隨不諱窮。卓犖才名今日事，蕭條門巷古人風。五噫尚與時多忤，一笑兼忘我屢空。六月塵沙不相貸，茫然搔首又西東。

### 寄酬曹伯玉因以招之

寒鴉對立西風樹，幽草環生白露庭。清坐喜無公事擾，高談

時有故人經，思君異日投朱紱。過我何時載淺纜，及此江湖氣蕭爽，最宜相值倒吾餅。

### 次韻奉酬李質夫

逸少池邊有舊山，幾年征淚染衣斑。鶯駘自飽方爭路，驪虵長飢不在閑。雪漲江南歸浩漭，煙埋河朔去間關。勞歌一聽皆愁思，況我心非木石頑。

### 寄袁州曹伯玉使君

宜春城郭繞樓臺，想見登臨把一盃。濕濕嶺雲生竹籥，冥冥江雨熟楊梅。政成定入邦人詠，詩就還隨驛使來。錯莫風沙愁病眼，不知何日爲君開。

### 邢太保有鶴折翼，以詩傷之。客有記

翎經冥三韻而忘其詩者，因作四韻。

### 韻

不爲摧傷改性靈，靜中猶見好儀形。每憐今日長垂翅，卻悔當時誤翮翎。醫得舊創猶有法，相知多難豈無經。稻梁且向人間覓，莫羨搏風起北冥。

### 寄致政吳虞部

白鷗生意在滄波，不爲風塵有網羅。年抵馮唐初未半，才方疏廣豈能多。孤清楚國知誰繼，遺愛杉人想共歌。嗟我欲歸眞未晚，雪舟乘興會相過。

### 再至京口寄漕使曹郎中

漂流曾落此江邊，憶與詩翁賦浩然。（浩然堂名）鄉國去身猶萬里，驛亭分首已三年。北城紅出高枝靚，南浦青回老樹圓。還似昔時風露好，只疑談笑在君前。

### 次韻平甫金山會宿寄親友

天末海門橫北固，煙中沙岸似西興。已無船舫猶聞笛，遠有樓臺祇見燈。山月入松金破碎，江風吹水雪崩騰。飄然欲作乘桴計，一到扶桑恨未能。

### 送何聖從龍圖

射策曾稱制郡雄，朝廷重得漢司空。應留賜席丹塗地，謾責飛芻紫塞功。三徑欲歸無舊業，百城先至有清風。潞山直與天爲黨，回首孫高想見公。

### 送趙學士陝西提刑

遙知彼俗經兵後，應望名公走馬來。陛下東求今日始，胸中

包畜此時開山西豪傑歸囊贖，渭北風光入酒盃。堪笑陋儒昏鄙甚，略無謀術贊行臺。

### 丙申八月作

秋風摧剝利如刀，漢漢昏煙玩日高。眼看南山露崖巖，心隨東水轉波濤。歸期正自憑蒼蔡，生理應須問酒醪。還有詩書能慰我，不多霜雪上顛毛。

### 登西樓

樓影侵雲百尺斜，行人樓上憶天涯。情多自悔登臨數，目極因驚悵望賒。一曲平蕪連古樹，半分殘日帶明霞。潘郎何用悲秋色，祇此傷春髮已華。

### 卽事

河浦南苑岸西斜，風有晶光露有華。門柳故人陶令宅，井桐前日總持家。嘉招欲覆盃中綠，鬢唱仍添錦上花。便作武陵樽俎客，川源應未少紅霞。

### 卷二十三

律詩 七首

### 酬吳仲庶小園之句

舊年臺榭掃流塵，聯閉朱門歲又新。花影隙中看曼曼，車音  
牆外去轆轤相逢。豈少佳公子，一醉何妨薄主人。祇向東風邀載  
酒，定知無奈帝城春。

### 始與韓玉汝相近居，遂相與遊。今居

復相近，而兩家子唱和詩相屬，因

有此作。

曩族兒童得近鄰，相知邂逅即情親。當時豈意兩家子，此地  
更爲同社人。勳業彈冠知白首，文章投筆讓青春。萬金雖愧君多  
產，比我淵明亦未貧。

### 春寒

春風滿地月如霜，拂曉鐘聲到景陽。花底挾衣朝宿衛，柳邊  
新火起嚴粧。冰殘玉磬泉初動，水澀銅壺滯更長。從此喧妍知幾  
日，便應鷓鴣損年芳。

### 次韻再遊城西李園

京師花木類多奇，常恨春歸人未歸。車馬喧喧起塵土，園林

處處縷芳菲，殘紅已落香猶在，羈客多傷涕自揮。我亦悠悠無事  
者，約君聯騎訪郊圻。

### 予求守江陰未得，酬昌叔憶江陰見

及之作。

黃田港北水如天，萬里風檣看買船。海外珠犀常入市，人間  
魚蟹不論錢。高亭笑語如昨日，末路塵沙非少年。強乞一官終未  
得，祇君同病肯相憐。

### 送蘇屯田廣西轉運

置將從來欲善師，百城蹉跌起臺輦。驅除久費兵符出，按撫  
紛煩使節移。恩澤易行窮苦後，功名常見急難時。濡文此日風流  
在，直筆他年豈愧辭。

### 酬淮南提刑邵不疑學士

有「素壁鑱詩尚未泥」之句。

來詩及予送沈  
常州之詩，而卒

會詠常州送主人，豈知身得兩朱輪。田疇汎濫川方壅，廚傳  
蕭條市亦貧。以我薄材思拊僣，賴君餘教得因循。詢求故有風謠  
在，不獨鑱詩尚未泥。

### 酬王太祝

一馬常隨世事馳，豈論江徼與河湄。已成白髮潘常侍，更似青衫杜拾遺。勳業儻來知有命，文章聊以見無期。喜君材俊能從我，力學何妨和子思。

### 出城訪無黨因宿齋館

關外尋君信馬蹄，漫成詩句任天倪。花枝到眼春相照，（一作映）山色侵衣晚自迷。今日笑談還喜共，經年勞逸固難齊。生涯零落歸心懶，多謝殷勤杜宇啼。

### 寄張氏女弟

十年江海別常輕，（一作經）豈料今隨寡嫂行。心折向誰論宿昔，魂來空復夢平生。音容想像猶如昨，歲月蕭條忽已更。知汝此悲還似我，欲爲西望涕先橫。

### 奉寄子思以代別

南北蹉跎成兩翁，悲歡邂逅笑言同。全家欲出嶺雲外，匹馬嘗尋山雨中。趨府折腰嗟踽踽，聽泉分手惜恩恩。寄聲但有加餐飯，才業如君豈久窮。

### 次韻劉著作過茆山，今平甫往遊，因寄。

寄。

華陽仙伯有弟卿，官府今傳在赤城。三鶴不歸猶地勝，二君能到亦心清。詩中慷慨悲陳迹，篇末殷勤喚後生。遙想青雲知可附，坐看闕巷得名聲。

### 次韻十四叔賜詩留別

窮冬道路出西津，得侍茫然兩見春。發冊久嗟淹國士，起家初命慰鄉人。行辭北闕樓臺麗，歸佐南州縣邑新。班卓數行衣上淚，何時杖屨卻相親。

### 次韻耿天隲大風

雲埋月缺暈衰灰，鷗發齊如巨象脛。縱勇萬川冰柱立，紛披千障土囊開。魯門未怪爰居至，鄭圃何妨禦寇來。終夜不眠誰與共，坐忘唯有一顏回。

### 法喜寺

門前白道自纒回，門下青莎間綠苔。雜樹繞花鶯引去，壞籬無際鷲歸來。寂寥誰共樽前酒，牢落空留案上杯。我憶故鄉誠不淺，可憐鷓鴣重相催。

### 長干寺

梵館清閑側布金，小塘回曲翠文深。柳條不動千絲直，荷葉



相依舊蓋陰，漢漢岑雲和上下，翩翩沙鳥自浮沈。巖人樂此忘歸思，忍向西風學越吟。

### 落星寺在南康軍江中

翠雲臺殿起崔嵬，萬里長江一酒杯。坐見山川吞日月，杳無車馬送塵埃。雁飛雲路聲低過，客近天門夢易迴。勝槩唯詩可收拾，不才羞作等閒來。

### 清風閣

飛鷹孤起下州城，勝勢崢嶸壓四方。遠引江山來控帶，平看鷹隼去飛翔。高蟬感耳何妨靜，赤日焦心不廢涼。況是使君無一事，日陪賓從此傾觴。

### 留題微之廨中清輝閣

故人名字在瀛洲，邂逅低徊向此留。鷗鳥一雙隨坐笑，荷花十丈對冥搜。水涵樽俎清如洗，山染衣巾翠欲流。宜室應疑鬼神事，知君能復幾來遊。

### 次韻利甫春日金陵登臺

鍾山漠漠水洞洞，西有陵雲百尺臺。萬物已隨和氣動，一樽聊與故人來。天邊鷗鳥鳴相和，地上晴煙掃不開。悲眼看春長

（一作唯）恐盡，直須去取六龍回。

### 慶老堂

陳輝

板輿去國宦三年，華屋歸來地一偏。種竹常疑出冬筍，開池故合涌寒泉。身閑望老猶能戲，道勝鄰人不更遷。嗟我強顏無所及，想君為樂更悠然。

### 寄陳宣叔

扁舟欲動更徘徊，一笑相看病眼開。事忤貴人今見節，政行豪縣衆稱材。忽驚歲月侵雙鬢，卻喜山川共一杯。落日亂流江北去，離心猶與水東迴。

### 寄張州并示女弟

時張以太夫人喪自劍州歸。

劍閣天梯萬里寒，春風此日白衣冠。烏辭反哺鬚毛黑，鳥引思歸口血丹。行路想君今骨瘦，相逢添我老悲酸。浮雲渺渺吹西去，每到原頭勒馬看。

### 元珍以詩送綠石硯，所謂「玉堂新

樣」者

玉堂新樣世爭傳，況以蠻溪綠石鐫。嗟我長來無異物，憶君持贈有佳篇。久題瘴霧看猶濕，一取春波洗更鮮。遠與故人包色

似，論心於此亦回堅。

### 和微之林亭

爲有檳榔占雒陽，憶歸杖策此徜徉。觀魚得意還知樂，入鳥忘機背亂行。未敢許君輕去國，不應如我漫爲郎。中國日涉非無趣，保此千鍾慰北堂。

### 酬微之梅暑新句

江梅落盡雨昏昏，去馬來牛漫不分。當此沈陰無白日，豈知炎早有彤雲。琴絃欲緩何妨促，菱憲微生故可熏。回首涼秋知未遠，會須重曝阮郎棍。

### 平甫與寶覺遊金山思大覺并見寄

#### 及相見得詩次韻二首

龍參時宰道人琳，氣蓋諸公弟季心。勝踐肯論山在險，冥搜欲與海爭深。搖搖北下隨帆影，踽踽東來想足音。握手更知禪伯遠，隔雲鸞鷲碧千尋。

### 二

漳南開士好叢林，慧劍何年出水心。獨往便應諸漏盡，相逢未免故情深。檻觀山鳥有真意，窗聽海潮非世音。一笑上方人事

王安石全集 卷二十三 律詩

外，不知襄境兩侵尋。

### 金陵懷古四首

霸祖孤身取二江，子孫多以百城降。豪華盡出成功後，逸樂安知與禍雙。東府舊基留佛刹，後庭餘唱落船窗。黍離麥秀從來事，且置興亡近酒缸。

### 一

天兵南下此橋江，敵國當時指顧降。山水雄豪空復在，君王神武自難雙。留連落日頻回首，想像餘墟獨倚窗。卻怪夏陽纜一葦，漢家何事費嬰缸。

### 三

地勢東回萬里江，雲間天闕古來雙。兵纏四海英雄得，聖出中原次第降。山水寂寥埋王氣，風烟蕭颯滿僧窗。廢陵壞塚空冠劍，誰復沾纓醉一缸。

### 四

憶昨天兵下蜀江，將軍談笑士爭降。黃旗已盡年三百，紫氣空收劍一雙。破堞自生新草木，廢宮誰識舊軒窗。不須搔首尋遺事，且倒花前白玉缸。

九

次韻舍弟遇子固憶少述

時舍弟在臨川

歸計何時就一塵，  
寒城回首意茫然。  
野林細錯黃金日，  
溪岸寬圍碧玉天。  
飛兔已聞追腰裏，  
太阿猶恨失龍泉。  
遙知更憶河濱友，  
從事能忘我獨賢。

次韻昌叔詠塵

塵土輕颺不自持，  
紛紛生物更相吹。  
翻成地上高烟霧，  
散在人間路歧。  
一世競馳甘眯目，  
幾家清坐得軒眉。  
超然祇有江湖上，  
遽見波濤恐我時。

石竹花

退公詩酒樂華年，  
欲取幽芳近綺筵。  
種玉亂抽青節瘦，  
刻繪輕染絳花圓。  
風霜不放飄零早，  
雨露應從受惜偏。  
已向美人衣上纏，  
更留住客賦嬋娟。

古松

森森直幹百餘尋，  
高入青冥不附林。  
萬壑風生成夜響，  
千山月照掛秋陰。  
豈因蕪壤栽培力，  
自得乾坤造化心。  
廊廟乏材應見取，  
世無良匠忽相侵。

玉宸入檜鶴廟古松最為佳樹

壇廟千年草不生，  
幽真曾此蔭餘清。  
月枝池上流雲影，  
風葉天邊過雨聲。  
材大賢於人有用，  
節高仙與世無情。  
秦山跛下今迷處，  
苦里宮中漫得名。

次韻董伯懿松聲

天機自動豈關情，  
能作人間物外聲。  
冥聒一堂無客夢，  
曉悲千嶂有猿驚。  
廟中奏瑟沈三嘆，  
堂下吹簫失九成。  
俚耳紛紛多鄭衛，  
直須聞此始心清。

次韻答平甫

高蟬抱殼悲聲切，  
新鳥爭巢諍語忙。  
長樹老陰欺夏日，  
晚花幽艷敵春陽。  
雲歸山去當簷靜，  
風過溪來滿坐涼。  
物物此時皆可賦，  
悔予千里不相將。

次韻質夫兄使君同年

樓堞相望一日程，  
春風吹急似搖旌。  
莫言樂國無愁夢，  
賴把新詩有故情。  
客舍五漿非所願，  
私田三徑會須成。  
青雲自致歸公等，  
如我何緣得此聲。

卷二十四

律詩 七言

金明池

宜秋西望碧參差，憶看鄉人禊飲時。斜倚水開花有思，緩隨風轉柳如癡。青天白日春常好，綠髮朱顏老自悲。馭馬不堪塵滿眼，夕陽偷理釣魚絲。

葛溪驛

缺月昏昏漏未央，一燈明滅照秋牀。病身最覺風露早，歸夢不知山水長。坐感歲時歌慷慨，起看天地色淒涼。鳴蟬更亂行人耳，正抱疎桐葉半黃。

泛舟青溪，入水門，登高齋，奉呈康叔。

簿領紛紛惜此時，起攜佳客散沈迷。十圍但見諸營柳，九曲難尋故國溪。牽球欲隨流水遠，放船終擬畫橋低。子猷清興何曾盡，想憶高齋更一躋。

為裴使君賦擬峴臺

君作新臺擬峴山，羊公千載得追攀。歌鐘殷地登臨處，花木移春指顧間。城似大隄來宛宛，溪如清漢落潺潺。時平不比征吳

王安石全集 卷二十四 律詩

日，緩帶尤宜向此閑。

送李才元校理知邛州

朝廷孝治稱今日，鄉郡榮歸及壯時。關吏相呼迎印綬，里兒爭出望旄麾。北堂已足跨三釜，南畝今當蠶兩歧。獨我尙留真有命，天於人欲本無私。

送張頡仲舉知奉新

故人為邑士多稱，縣賦寬餘獄訟平。老吏閉門無重糶，荒山開隴有新糧。方揮玉壘日邊坐，又結銅章天外行。此去料君歸不久，挾材如此即名卿。

張劍州至劍，一日以新憂罷。

客舍飛塵尙滿牆，卻尋東路想茫茫。白頭反哺秦烏側，流血思歸蜀鳥前。今日相逢知悵望，幾時能到與留連。行看萬里雲西去，倚馬春風不忍鞭。

次韻子履遠寄之作

飄然逐客出都門，士論應悲玉石焚。高位紛紛誰得志，窮途往往始能文。柴桑今日思元亮，天祿何時召子雲。直使聲名傳後世，窮通何必較功勳。

### 送李太保知儀州

北平上谷當時守，氣路人推李廣優。還見子孫持漢節，欲臨關塞撫羌酋。雲邊鼓吹應先喜，日下旌旗更少留。五字亦君家世事，一吟何以稱來求。

### 送西京簽判王著作

兒曹曾上洛城頭，尚記清波遶驛流。卻想山川常在夢，可憐顏髮已驚秋。辟書今日看君去，著籍長年歎我留。三十六峯應好在，寄聲多謝欲來遊。

### 送劉貢父赴秦州清水

劉郎高論坐壘枯，幕府調聊用緒餘。筆下能當萬人敵，腹中曾記五車書。聞多望士登天祿，知有名臣薦子虛。且復弦歌窮塞上，祇應非晚召相如。

### 送純甫如江南

青溪看汝始踰躡，兄弟追隨各少年。壯爾有行今納婦，老吾無用亦求田。初來淮北心常折，卻望江南眼更穿。此去還知苦相憶，歸時快馬亦須鞭。

### 送郊社朱兄除郎東歸

手持官牒出神臬，迎客遙知賀酒醪。照映里門非白屋，欺凌春草有青袍。宦遊雖晚何妨久，餓顯從來不必高。孝友父兄家法在，想能清白遺兒曹。

### 送沈康知常州

作客蘭陵迹已陳，為傳謠俗記州民。溝塍半廢田疇薄，廚傳相仍市井貧。常恐勞人輕白屋，忽逢佳士得朱輪。殷勤話此還惆悵，最憶荆溪兩岸春。

### 安豐張令修芍陂

桐鄉振慶得周旋，芍水修陂道路傳。目想僊功追往事，心知為政似當年。魴魚鱗躍歸城市，秬稻紛紛載酒船。楚相祠堂仍在，勝遊思為子留筵。

### 送復之屯田赴成都

繁碑西南江與岷，石犀金馬世稱神。桑麻接畛餘無地，錦繡連城別有春。結綬相隨通籍久，推車此去辟書新。知君不為山川險，便忘吾家叱馭人。

### 送經臣富順寺丞

故人爲縣楚江邊，海角猶聞政事傳。萬井已安如赤子，一廳今去上青天。應開醉眼餘醺下，莫起歸心杜宇前。報主代親俱有地，幾人忠孝似君全。

### 送張卿致仕

子房籌策漢時功，身退超然慕赤松。餘烈尙能開後世，高材今復繼前蹤。執鞭始負平生願，操几何知此地逢。竊食一官慚未艾，緒言方賴賜從容。

### 送梅龍圖

子真家世子雲鄉，風力才華豈易當。回首古人多隱約，致身今日獨輝光。謨明久合分三府，治劇聊須試一方。從此政成何所報，百城無事祇耕桑。

### 送李祕校南歸

四十青衫更旅人，悠悠飢馬傍沙塵。久留上國言空富，卻走南州食轉貧。自作詩書能見意，應知時命不關身。江湖勝事從今數，肯但悲歌寂寞濱。

### 送蕭山錢著作

才高諸彥故無嫌，兄弟同時舉孝廉。東觀外除方墨綬，西州

王安石全集 卷二十四 律詩

相見已蒼髯。靈胥引水清穿市，神禹分山翠入簾。好去弦歌聊自慰，那人誰敢慢陶潛。

### 送靈山裴太博

一官留隱太常中，生事蕭然信所窮。有力尙期當世用，無求今見古人風。迢迢舊學皆殘藁，邂逅相看各老翁。他日卜居何處好，溪山還欲與君同。

### 送趙燮之蜀永康簿

蜀山萬里一青袍，石棧天梯筆轡高。多學侶君甯易得，小官於此亦徒勞。行追西路聊班草，坐憶南州欲夢刀。他日寄聲能問我，應從錦水至江臯。

### 酬吳季野見寄

時被召來詩以賈題見方。

漫披陳蠹學經綸，捧檄生平祇爲親。聞道不先從事早，課功無狀取官頻。豈堪置足青冥上，終欲回身寂寞濱。俯仰謬恩方自歎，慚君將比洛陽人。

### 和平甫寄陳正叔

強行南仕莫辭勤，聞說田園已曠耘。縱使一區猶有宅，可能三月尙無君。且同元亮傾樽酒，更與靈均續舊文。此道廢興吾命

在世間滕口任云云。

### 送王太卿致政歸江陵

九卿初命亞三司，朝吏相瞻得老師。南闕便還新印綬，東舟只載舊書詩。漢庭餞客無佳句，越水歸裝有富貲。回首千年見疏范，共疑今事勝當時。

### 送叔康侍御

詔取名郎入憲臺，此時方急濟時才。聖聽應已虛心待，姦黨甯無側目猜。白筆豈知權可長，皂囊還請上親開。伛聞讜論能醫國，飛報頻隨驛騎來。

### 寄朱昌叔

清江浸浸總城流，尚憶城邊繫小舟。射虎未能隨李廣，割雞空欲戲言游。雲埋塞路驚塵合，霜入春風滿鬢愁。此日君書苦難得，漫多鴻雁起南洲。

### 九日登東山寄昌叔

城上啼鳥破寂寥，思君何處坐岩峽。應須綠酒醺黃菊，何必紅裙弄紫簫。落木雲連秋水渡，亂山煙入夕陽橋。淵明久負東籬醉，猶分低心事折腰。

### 到舒次韻答平甫

夜別江船曉解鞍，秋城氣象亦渾渾。山從樹外青爭出，水向沙邊綠半涵。行間齒夫多不記，坐論公瑾少能談。只愁地僻無賓客，舊學從誰得指南。

### 舒州七月十一日雨

行看野氣來方勇，臥聽秋聲落竟慳。浙瀝未生羅豆水，蒼茫空失皖公山。火耕又見無遺種，肉食何妨有厚顏。巫祝萬端曾不救，只疑天賜雨工閑。

### 次韻答丁端州

莫嗟荒僻又難羣，且喜風謠嶺北聞。銅柱雖然豐徵接，竹符還是漢家分。春書來逐衡陽雁，秋騎歸看隴首雲。相見會知南望苦，病骸今侶沈休文。

### 答劉季孫

偶著儒冠敢陋今，自憐多負少時心。輕軒已任人前後，揭厲安知世淺深。挾筴自思悲慷慨，負薪無力病侵淫。愧君綠綺虛投贈，更覺貧家報乏金。

### 次韻酬王太祝

塵土波瀾不自期，飄然身與願相違。衰根要路知難植，病羽  
長年欲退飛。高論已嗟能聽少，力行遠恨賦材微。慚君俊少今知  
我，一見心如客得歸。

### 寄吳成之

綠髮溪山笑語中，豈知翻手兩成翁。辛夷屋角搏香雪，躑躅  
江頭挽醉紅。想見舊山茅徑在，近隨今日板輿空。渭陽車馬嗟何  
及，榮祿方當與子同。

### 寄曾子固

斗粟猶慚報禮輕，耿嗟吾道獨難行。脫身負米將求志，戮力  
乘田豈爲名。高論幾爲衰俗廢，壯懷難值故人傾。荒城回首山川  
隔，更覺春風白髮生。

### 至開元僧舍上方次韻舍弟二月一

#### 日之作

溪谷澗澗嫩水通，野田高下綠蒙茸。和風滿樹笙簧雜，聳雪  
兼山粉黛重。萬里有家歸尚隔，一塵無地去何從。傷春故欲西南  
望，迺首荒城已暮鐘。

王安石全集 卷二十五 律詩

### 寄王回深甫

少年倏忽不再得，後日歡娛能幾何。願我面顏衰更早，憐君  
身世病還多。牕間黯淡月含霧，船底飄飄風送波。一寸古心俱未  
試，相思終夜起悲歌。

### 次韻答彥珍

手得封題手自開，一篇美玉綴玫瑰。衆知圓媚難論報，自顧  
窮愁敢角才。君臥南陽惟獻歎，我行西路亦風埃。相逢不必嗟勞  
事，尚欲賡歌詠起哉。

### 寄闕下諸父兄兼示平甫兄弟

父兄爲學衆人知，小弟文章亦自奇。家勢到今宜有後，士才  
如此豈無時。久聞陽羨溪山好，頗與淵明性分宜。但願一門皆貴  
仕，時將車馬過茆茨。

### 卷二十五

#### 律詩

七言 七言長律附

### 鍾山西庵白蓮亭



山亭新破一方苔，白帝留花滿四隈。野豔輕明非傳粉，秋光清淺不憑材。鄉窮自作幽人伴，歲晚誰為靜女媒。可笑遠公池上客，卻因松菊賦歸來。

贈老寧僧首

秀骨廬眉倦往還，自然清譽落人間。閑中用意歸詩筆，靜外安身比太山。欲倩野雲朝送客，更邀江月夜臨關。嗟予蹤迹飄塵土，一對孤峰幾厚顏。

次韻舍弟賞心亭卽事二首

檻折簷傾野水傍，臺城佳氣已消亡。難披梗莽尋千古，獨倚青冥望八荒。坐覺塵沙昏遠眼，忽看風雨破驕陽。扁舟此日東南興，欲盡江流萬里長。

二

霸氣消磨不復存，舊朝臺殿祇空村。孤城倚薄青天近，細雨侵凌白日昏。稍覺野雲成晚霽，卻疑山月是朝暉。此時江海無窮興，醒客忘言醉客喧。

次韻陳學士小園卽事

精屋雖無好鳥鳴，池塘亦未有蛙聲。樹含宿雨紅初入，草倚

朝陽綠更生，萬物天機何得喪，百年心事不將迎。與君杖策聊觀化，搔首春風眼尚明。

寄友人

飄然旅旅尚無涯，一望西南百嘆嗟。江擁涕洟流入海，風吹魂夢去還家。平生積慘應銷骨，今日殊鄉又見花。安得此身如草樹，根株相守盡年華。

登大茅山

一峯高出衆山顛，疑隔塵沙道里千。俯視煙雲來不極，仰攀蘿藦去無前。人間已換嘉平帝，地下誰通句曲天。陳迹是非今草莽，紛紛流俗尚師仙。

登中茅山

翛然杖屨出塵囂，雞犬無聲到次寥。欲見五芝葦葉老，向攀三鶴羽翰遙。容溪路轉迷橫約，仙几風來得墮樵。興罷日斜歸亦懶，更磨碑蕊認前朝。

登小茅山

捫蘿路到半天窮，下視淮州杳靄中。物外真游來几席，人間榮願付蒼通。白雲坐處龍池杳，明月歸時鶴馭空。回首三君誰更

似子房家世有高風

### 送張仲容赴杭州孫公辟

萬屋相誇漆與丹，笑歌長在綺紈間。綵船春戲城邊水，畫燭秋尋寺外山。憶我屢隨遊客入，喜君今赴辟書還。遙知曼倩成行久，赤筆應從到日閑。

### 贈李士寧道人

季主漫巡居卜肆，彌明還遁作詩翁。曾令宋賈欺車上，更使劉侯驚坐中。杳杳人傳多異事，冥冥誰識此高風。行歌過我非無謂，唯恨貧家酒盞空。

### 次韻春日即事

人間尚有薄寒侵，和氣先薰草樹心。丹白自分齊破蕾，青黃相向欲交陰。潺潺漱水生幽谷，漠漠輕煙動遠林。病得一官隨太守，班春無助愧周任。

### 次韻答陳正叔二首

青衫憔悴北歸來，髮有霜根面有埃。羣吠我方憎獠子，一鳴誰更識龍媒。功名落落求難值，日月瀟瀟去不回。勝事與身何等近，酒樽詩卷數須開。

王安石全集 卷二十五 律詩

田宅荒涼去復來，詩書顏髮兩塵埃。忘機自許鷗相狎，得禍誰期鶴見媒。此道未行身有待，古人不見首空回。何當水石他年住，更把菖蒲醉處開。

### 送崔左藏之廣東

怪石巉巖上沈寥，昔人於此奏蕭韶。水清但有嘉魚出，風暖何曾毒草搖。今日淹留君按節，當時嬉戲我垂髫。因尋舊政詢遺老，爲作新詩變俚謠。

### 苦雨

靈場奔走尚無功，去馬來車道不通。風助亂雲陰更密，水爭高岸氣尤雄。平時溝洫今多廢，下戶京囷久已空。肉食自嗟何所報，古人憂國願年豐。

### 江上

村落家家有濁醪，青旗招客解祗綯。春風似補林塘破，野水遙連草樹高。寄食舟車隨處弊，行歌天地此身勞。迴回自負平生意，豈是明時惜一毛。

### 午枕

百年春夢去悠悠，不復吹簫向此留。野草自花還自落，鳴禽相乳亦相酬。舊蹊埋沒開新徑，朱戶欹斜見畫樓。欲把一盃無伴侶，眼看興廢使人愁。

### 寄石鼓寺陳伯庸

鯨海無風白日閑，天門當面險難攀。塵埃揜臂離長陌，琴酒和雲入舊山。仁義未饒軒冕貴，功名莫信鬼神慳。郭東一點英雄氣，時伴君心夜斗間。

### 送熊伯通

歲暮欣逢蓋共傾，川途南北豈忘情。事經官路心應折，地入家山眼更明。江上月華空自照，梅邊春意恰相迎。關河不鎖真消息，野客猶能聽治聲。

### 送王覃

分走人間少五年，塵沙吹鬢各蒼然。山林渺渺長回首，兒女紛紛忽滿前。知子有才思奮發，嗟余無地與迴旋。相看一作秦吳別，身世何時兩息肩。

### 送明州王大卿

大歷才臣有此州，昆靈今駕鹿輻遊。從來所至邦人喜，真復

能分聖主憂；千里封疆何足治，一時名跡故應留。屬城舊吏雖疲懶，尚可揮毫敵李舟。

### 姑胥郭

誤褫雲巾別故山，抵吳由越兩間關。千家漁火秋風市，一葉歸舟暮雨灣。旅病情情如困酒，鄉愁脉脉似連環。情知帶眼從前綵，更恐頑毛自此斑。

### 嚴陵祠堂

漢庭來見一羊裘，默默俄歸舊釣舟。迹似磻溪應有待，世無西伯可能留。崎嶇馮衍才終廢，寂寞桓譚道不謀。勺水果非鱸館地，放身滄海亦何求。

### 藏春塢詩獻刁十四文學士

蘇山東渡得林丘，邂逅籃輿亦少留。今日更知萊氏隱，暮年長憶武陵遊。欲營垣屋隨穿斷，尙歎塵沙隔獻酬。遙約向吳亭下路，春風深駐五湖舟。

### 太湖恬亭

檻臨溪上綠陰圍，溪岸高低入翠微。日落斷橋人獨立，水涵幽樹鳥相依。清遊始覺心無累，靜處誰知世有機。更待夜深同徙

倚秋風斜月釣船歸

### 蒙城清燕堂

清燕新碑得自蒙，行吟如到此堂中。吏無田甲當時氣，民有莊周後世風。庭下早知閑木索，坐間遙想御絲桐。飄然一往何時得，俛仰塵沙欲作翁。

### 次韻酬吳彥珍見寄二首

時彥珍為教授，學有右軍墨池。

君作新詩故起予，一吟聊復報雙魚。杖藜高徑誰來往，散帙空堂自卷舒。樹外烏啼催晚種，花間人語趁朝虛。春風處處堪攜手，何事臨池苦學書。

一一

篔竹荒茅五畝餘，生涯山蕨與泉魚。家貧殖貨羞端木，鄉里傳書比仲舒。白日憶君聊遠望，青林嗟我似虛虛。春風渺渺烏塘尾，漫得東來一紙書。

### 自金陵如丹陽道中有感

數百年來王氣消，難將前事問漁樵。苑方秦地皆蕪沒，山借揚州更寂寥。荒城暗雞催月曉，空場老雉挾春驕。豪華祇有諸陵在，往往黃金出市朝。

王安石全集 卷二十五 律詩

### 初去臨川

東浮溪水渡長林，上坂回頭一拊心。已覺省煩非仲叔，安能養志似曾參。憂傷遇事紛紛出，疾病乘虛靡靡侵。未有半分求自贖，恐填溝壑更誰襟。一作馬頭西去百齋襟，一望親庭更苦心。已覺省煩非仲叔，安能養志似曾參。憂傷遇事紛紛出，疾病乘虛靡靡侵。手把空篇臥空屋，欲歌商頌不成音。

### 讀史

自古功名亦苦辛，行藏終欲付何人。當時黷闇猶承誤，末俗紛紜更亂真。糟粕所傳非粹美，丹青難寫是精神。區區豈盡高賢意，獨守千秋紙上塵。

### 讀詔書

慶歷七年

去秋東出汴河梁，已見中州旱勢強。日射地穿千里赤，風吹沙度滿城黃。近聞急詔收羣策，頗說新年又亢陽。賤術縱工難自獻，心憂天下獨君王。

每見王太丞邑事甚冗，而剽劇之暇，

能過訪山館，兼出佳篇為贈，仰歎

才力因成小詩。

我看繁訟頻搔首，君富才明見亦常。尚有閑襟尋水石，更留佳句似池塘。松苗地合分高下，鶯鶴天教有短長。徐上青雲猶未晚，可無音問及滄浪。

王浮梁太丞之聽訟軒有水禽三巢

於竹林之上，恬而自得，邑人作詩

以美之。因次元韻。

水邊舟動多驚散，何事林間近絕疑。野意肯從威令至，舊巢猶有主人知。（見王太丞詩）不關飲啄春江暖，自在飛鳴夏日遲。覽德豈無丹穴鳳，到時應讓向南枝。

寄虞氏兄弟

一身兼理百憂虞，忽忽如狂久廢書。疇昔心期俱喪勇，比來腰疾更乘虛。久聞楊羨安家好，自度淵明與世疎。亦有未歸滯整日，會應相近置田廬。

除夜寄舍弟

一尊聊有天涯憶，百感翻然醉裏眠。酒醒燈前猶是客，夢回

江北已經年，佳時流落真何得，勝事蹉跎只可憐。唯有到家寒食在，春風因泛預溪船。

答熊本推官金陵寄酒

鬱金香是蘭陵酒，枉入詩人賦詠來。庭下北風吹急雪，坐間南客送寒醅。淵明未得歸三徑，（金陵有舊廬）叔夜猶同把一盃。吟罷想君醒醉處，鍾山相向白崔嵬。

和錢學士喜雪

手把詩翁憶雪詩，坐愁窮海撥煙霏。誰令天上蒼翁合，忽見空中散漫飛。闔闔與風生氣勢，姮娥交月借光輝。山鷄瑟縮相依立，邑犬跳梁未肯歸。點綴丘園榮樹木，埋藏溝壑亂封圻。高歌業已傳都市，逸興何當叩隱扉。頗欲攜樽邀使騎，幾忘溫席薦親闈。公今早晚班春去，強勸滂田補歲饑。

送江寧彭給事赴闕

西江望士衆長兼，卓犖傳家在一男。壯志異時聞史牒，妙齡終日對書龕。桂堂發策收科選，櫻苑頒詩豫宴酣。大邑援琴聊試可，小州懷綬果才堪。分臺拜職榮先入，抗疏辭息恥橫覃。勁操比松寒不撓，忠言如藥苦非甘。龍鱗直爲當官觸，虎穴甯關射利探。朱戟獸頭終協夢，粉闈雞舌更須含。均輸北轉荆圖爲，勸課西臨

鬪市鷲胡信有兒迎郭，假食貧無地乞羊曇。蠶垂鈴棧駝鳴國，節  
擁棠郊虎視耽。歸見廣塲擲斧藻，對揚初服改朱藍。進班華省財  
方阜，出按窮邊虜稍戡。帝命賈琮當冀北，民歌姬爽次周南。投壺  
擾客魚無乙，伐鼓蒐兵馬有驪。鯨鱉掀紅旗背背，虬髯吒黑纛寥  
寥。咸加諸部風霜肅，惠浸連營雨露灑。大斗時時能劇飲，輕裘往  
往秣清談。乾龍已應天飛五，晉馬徐觀畫接三。道在君臣方自合，  
德侔卿長亦誰懸。便蕃肯較平生寵，放曠皆知雅性耽。委佩去辭  
廷殖殖，揚舲來得府潭潭。一尊客語從容盡，千里人情委曲諳。豈  
但縉紳稱召杜，故多扶杖祝彭聃。幕中俊又閑刀筆，帳下驍雄冷  
劍鐔。楚地怪須留滌黯，蕭規疑欲付曹參。從來貴勢公何慕，自是  
賢名上所貪。未信逸身今已老，且當憂國每如慙。論心邂逅膠投  
漆，搔首低徊雪滿簷。虱撫未驚移歲月，追攀曾許賞煙嵐。餘歡速  
隔新亭餞，宿惠難忘舊館驂。卷曲尙誰知散櫟，崢嶸空此詠枯楠。

## 卷二十六

### 律詩

五言絕句 同文 六言詩附

### 聊行

聊行弄芳草，獨坐隱團蒲。問客茅簷日，君家有此無？

### 染雲

王 安 石 全 集 卷二十六 律詩

染雲爲柳葉，翦水作梨花。不是春風巧，何緣有歲華。

### 溝港

溝港重重柳，山坡處處梅。小輿穿麥過，狹徑礙桑回。

### 霹靂溝

霹靂溝西路，柴荆四五家。憶曾騎款段，隨意入桃花。

### 午睡

籬日陰陰轉，牀風細細吹。翛然殘午夢，何許一黃鷄。

### 題齊安壁

日淨山如染，風喧草欲薰。梅殘數點雪，麥漲一溪雲。

### 昭文齋

宋徽題余定林所居因作

我自山中客，何緣有此名。當緣琴不鼓，人不見麴成。

### 臺上示吳愿

細書妨老讀，長簟愜昏眠。取簟且一息，拋書還少年。

### 示道原

久不仕城市，少留心悵然幽芳可攜結，仁子飲囊泉。

### 傳神自讚

此物非他物，今吾即故吾；今吾如可狀，此物若爲摹！

### 題何氏宅園亭

荷葉參差卷，榴花次第開；但令心有賞，歲月任渠催！

### 草堂一上人

一公持一鉢，想復度遙岑；地瘦無黃犢，春來草更深。

### 題黃司理園

爲憶去年梅，凌寒特地來；閣前空鵬盞，渾未有花開。

### 北山游亭

西嶠水泠泠，訟岡有游亭；自從春草長，遙見祇青青。

### 題永昭陵

神闕澹朝暉，蒼蒼露未晞；龍車不可望，投老涕霑衣。

### 詠穀

可憐臺上穀，轉目已陰繁；不解詩人意，何爲樂彼園？

### 池上看金沙花數枝過，除醜架盛開

故作醜醜架，金沙祇護裁；似矜顏色好，飛度雪前開。

### 五柳

五柳桑柴宅，三楊白下亭；往來無一事，長得見青青。

### 移松皆死

李白今何在，桃紅已索然；看看赤松子，猶自不長年。

### 山中

隨月出山去，尋雲相伴歸；春晨花上露，芳氣著人衣。

### 送王補之行風忽作因題四句於舟

中

淮口西風急，君行定幾時；故應今夜月，未便照相思。

### 被召作

榮祿嗟何及，明恩愧未酬；欲尋西掖路，更上北山頭。

## 再題南澗樓

北山雲漠漠，南澗水悠悠；去此非吾願，臨分更上樓。

## 南浦

南浦隨花去，迴舟路已迷；暗香無覓處，日落畫橋西。

## 題定林壁懷李叔時

雲與潮明出，風隨禦寇還；燎爐無伏火，蕙帳冷空山。

## 離蔣山

出谷頻回首，逢人更斷腸；桐鄉豈愛我，我自愛桐鄉。

## 江上

江水漾西風，江花脫晚紅；離情被橫笛，吹過亂山東。

## 春雨

苦霧藏春色，愁霖病物華；幽奇無可奈，強嚼一杯霞。

## 歸燕

馬上逢歸燕，知從何處來；食尋舊巢去，不帶錦書迴。

## 和惠思波上鷗

翩翩白鷗鷗，汎汎水上游；西來久不見，夢想在滄洲。

## 秣陵道中口占二首

經世才難就，田園路欲迷；慙慙將白髮，下馬照青溪。

## 二

歲熟田家樂，秋風客自悲；茫茫曲城路，歸馬日斜時。

## 次青陽

十載九華邊，歸期尚杳然；秋風一乘傳，更覺負林泉。

## 代陳景元書於太一宮道院壁

官身有吏責，觸事遇嫌猜；野性豈堪此，廬山歸去來。

## 山雞

山雞照渌水，自愛一何愚；文采爲世用，適足累形軀。

## 雜詠四首

故畦拋汝水，新鷺寄錦山；爲問揚州月，何時照我還。



二

已作湖陰客，如何更遠遊？  
章江昨夜月，送我到揚州。

三

證聖南朝寺，三年到百回；  
不知牆下路，今日幾荷開？

四

桃李石城場，餉田三月時；  
柴荆常自閉，花發少人知。

臥聞

臥聞黃栗留，起見白符鳩；  
坐引魚兒戲，行將鹿女遊。

秋興有感

宿雨清畿甸，朝陽麗帝城；  
豐年人樂業，隴上踏歌聲。

題八功德水

欲尋阿練若，曳屐出東岡；  
澗谷芳菲少，春風著野桑。

口占

去歲別南嶽，前年返渤潭；  
臨機一句子，今日遇同參。

偶書

雄也營身足，爾分悞汝多；  
捐書知聖已，絕學奈禽何。

送陳景初金陵持服舉族貧病煩君

藥石之功。

舉族貧兼病，煩君藥石功；  
長安何日到，一二問歸鴻。

汨姚江

軋軋櫓聲急，蒼蒼江日低；  
吾行有定止，潮汐自東西。

樓上

蕩漾舟中客，徘徊樓上人；  
滄波浩無主，兩槳遡難親。

春晴

新春十日雨，雨晴門始開；  
靜看蒼苔紋，莫上人衣來。

淨相寺

淨相前朝寺，荒涼二十秋；  
曾遭鹽劫壞，今遇勝緣修。

將母

將母邇溝上，留家白紵陰；月明聞杜宇，南北總關心。

### 朱朝議移法雲蘭

幽蘭有佳氣，千載闔山阿；不出阿蘭若，豈遭乾闥婆！

### 晚歸

岸迴重重柳，川低渺渺河；不愁南浦暗，歸伴有姮娥。

### 題舫子

愛此江邊好，留連至日斜；眠分黃犢草，坐占白鷗沙。

### 惠崇畫

斷取滄州趣，移來六月天；道人三昧力，變化只和顛。

### 蒲葉

蒲葉消淺水，杏花和暖風；地偏緣底綠，人老爲誰紅！

### 芳草

芳草知誰種，緣階已數叢；無心與時競，何苦綠恩恩！

### 與徐仲元自讀書臺上定林

王 安 石 全 集 卷二十六

律詩

橫絕滄溟度，深尋翠嶺行；百年同逆旅，一壑我自平。

### 病中睡起折杏花數枝二首

獨臥南牕榻，愴然五六句；已聞鄰杏好，故挽一枝春。

二

獨臥無心起，春風閉寂寥；鳥聲誰喚汝，屋角故相撩？

### 送望之赴臨江

黃雀有頭顱，長行萬里餘；想因君出守，暫得免包苴。

### 送丁廓秀才歸汝陰

風駛柳條乾，駝裘未勝寒；慙慙陌上日，爲客暖征鞍。

### 送王彥魯

北客憐同姓，南流感似人；相分豈相忘，臨路更情親！

### 送呂望之

池散田田碧，臺敷灼灼紅；年華豈有盡，心賞亦無窮。

### 別方叻秘校

二五

思迢建業水，中有武昌魚；別後應相憶，能忘數寄書。

### 梅花

牆獨數枝梅，凌寒獨自開；遙知不是雪，爲有暗香來。

### 紅梅

春半花纔發，多應不奈寒；北人初未識，渾作杏花看。

### 病起過寶覺

執手乍欣悵，霜毛應更新；依然舊童子，卻想夢前身。

### 書定林院牕

問遠大師師云夜來  
夢與說十波羅密

道人今較講，卷袖寄松蘿；夢說波羅密，當如習氣何？

### 題徐浩書法華經

一切法無差，水牛生象牙；莫將無量義，欲覓妙蓮華。

### 碧蕪

同文

碧蕪平野曠，黃菊晚村深；客倦留甘飲，身閑累苦吟。

### 夢長

夢長隨永漏，吟苦雜疎鐘；動盪荷風勁，沾裳菊露濃。

### 遊月

遊月川魚躍，開雲嶺鳥翻；徑斜荒草惡，臺廢冶花繁。

### 泊雁

泊雁鳴深渚，收霞落晚川；析隨風斂陣，樓映月低弦；漠漠汀

帆轉，幽幽岸火然；整危通細路，溝曲繞平田。

### 題西太一宮壁二首

六首

草色浮雲漠漠，樹陰落日潭潭；（一作柳葉鳴蜩綠暗，荷花

落日紅酣）三十六陂流（一作宮煙）水白頭想見江南

一一

三十年前此路，（一作地）父子持我東西；今日重來白首，

欲尋陳迹都迷。

### 西太一宮樓

草際芙蓉零落，水邊楊柳欹斜；日暮炊煙孤起，不知魚網誰

家？

# 卷二十七

律詩

七言絕句

## 歌元豐五首

水滿陂塘穀滿籩，漫移蔬果亦多收；  
神林處處傳簫鼓，共賽元豐第二秋。

一一

露積成山百種收，漁梁亦自富鰕鱖；  
無羊說夢非真事，豈見元豐第二秋。

三

湖海元豐歲又登，和生猶足暗溝塍；  
家家蘆積如山壘，黃髮蒼髭見未曾！

四

放歌扶杖出前林，遙和豐年擊壤音；  
會侍土階知帝力，曲中時有譽堯心。

五

王安石全集 卷二十七 律詩

豚栅雞埭曉鷺間，暮林搖落獻南山；  
豐年處處人家好，隨意飄然得往還。

棊

莫將戲事擾真情，且可隨緣道我贏；  
戰罷兩奩分（一作收）白黑，一枰何處有虧成？

題畫扇

王斧修成寶月圓，月邊仍有女乘鸞；  
青冥風露非人世，蠻亂釵斜特地寒。

夢

黃梁欲熟且留連，漫道春歸莫怏然；  
蝴蝶豈能知夢事，蘧蘧飛墮晚花前。

清明

東城酒散夕陽遲，南陌鞦韆寂寞垂；  
人與長緜臥芳草，風將急管度青枝。

東岡

東岡歲晚一登臨，共望長河映遠林；  
萬竅怒號風喪我，千波

鏡湧水無心！

### 春郊

奇秧漫漫出初齊，雞犬遙聞路卻迷；但見山花流出水，那知不是武陵溪。

### 元日

爆竹聲中一歲除，東風送暖入屠蘇；千門萬戶曠曠日，爭插（一作總把）新桃換舊符。

### 九日

九日無歡可得道，飄然隨意歷山陂；蔣陵西曲（一作面）風颯慘，（一作澹）也有黃花一兩枝。

### 初晴

幅巾慵整露光華，度隴深尋一徑斜；小雨初晴好天氣，晚花殘照野人家。

### 南蕩

南蕩東陂水漸多，陌頭車馬斷經過；鍾山未放朝雲散，奈此黃梅細雨何！

### 芙蓉

芙蓉耐夏復宜秋，一種今年便滿溝；南蕩東陂無此物，但隨深淺見游儻。

### 溝西

溝西直下看芙蓉，葉底三三兩兩魚；若比潏梁應更樂，近人渾不畏春鉤。

### 東臯

東臯攢結知新歲，西臯攀翻憶去年；肘上柳生渾不管，眼前花發即欣然。

### 一陂

一陂（一作段）酸水蔣陵西，含風卻轉與城齊；周遭碧銅磨作港，迥塞綠錦剪成畦。

### 園蔬

園蔬小摘嫩還抽，畦稻新春滑欲流；枕簟不移隨處有，飽餐甘寢更無求。

### 儻然

儻然三月閉柴荆，綠葉陰陰忽滿城；自是老年遊興少，春風何處不堪行。

### 杖藜

杖藜隨水轉東岡，興罷還來赴一牀；杖藜是時入夢，固知餘習未全忘。

### 圖書

圖書老矣尚紛披，神剎天驄似有知；茅竹結蟠聊一榻，卻尋三界外愚痴。

### 老嫌

老嫌智巧異形軀，欲就田翁學破除；百歲用癡能幾許，救吾黷則可無餘。

### 移柳

移柳當門何管五，穿松作徑適成三；臨流遇興還能賦，自比淵明或未慙。

### 誰將

王安石全集 卷二十七 律詩

誰將石黛染春潮，復撚黃金作柳條；西曠東溝從此好，荀與追我莫辭遙。

### 雪乾

雪乾雲淨見遙岑，南陌芳菲復可尋；換得千顰爲一笑，春風吹柳萬黃金。

### 南浦

南浦東岡二月時，物華撩我有新詩；含風鴨綠鄰鄰起，弄日鵝黃裊裊垂。

### 竹裏

竹裏編茅倚石根，竹筴疎處見前村；閉眠盡日無人到，自有春風爲掃門。

### 隨意

隨意柴荆手自開，公岡度壑復登臺；小橋風露隔舟月，迷鳥歸雌竟往來。

### 秋雲

秋雲放雨靜山林，萬壑崩湍共一音；欲記荒菲無善處，賴傳

悲壯有能琴

### 春風

春風過柳綠如縑，晴日烝紅出小桃；池暖水香魚出處，一環清浪湧亭臯。

### 陂麥

陂麥連雲慘淡黃，綠陰門巷不多涼；更無一片桃花在，借問春歸有底忙。

### 木末

木末北山煙冉冉，草根南澗水泠泠；縑成白雪桑重綠，割盡黃雲稻正青。

### 進字說二首

正名百物自軒輊，野老何知強耐論；但可與人覆醬餠，豈能令鬼哭黃昏。

一一

鼎湖龍去字書存，開闢神機有聖孫；湖海老臣無四目，謾將精粕汗修門。

### 窺園

杖策窺園日數巡，攀花弄草興常新；董生只被公羊惑，肯信捐書一語真。

### 嘲白髮

久應飄轉作蓬飛，眷惜冠巾未忍違；種種春風吹不長，星星明月照還稀。

### 代白髮答

從衰得白自天機，未怪長宵與願違；看取春條隨日長，會須秋葉向人稀。

### 外廚遺火二首

竈鬼何爲便赫然，似嫌刀机苦無短；圖書得免同煨燼，卻賴廚人清不眠。

一一

青煙散入夜雲流，赤焰侵尋上瓦溝；門戶便疑能炙手，比鄰何苦卻焦頭。

### 初夏卽事

石梁茅屋有彎碕，流水澗澗度兩陂；晴日暖風生麥氣，綠陰幽草勝花時。

### 千蹊

千蹊百隧散林斤，圖畫風煙一色秋；但有興來隨處好，楊朱何苦涕橫流。

### 和陳輔秀才金陵書事

南郭先生比鸛鶴，年年過我未愆期；休論王謝當時事，大抵烏衣祇舊時。

### 和耿天隲以竹冠見贈四首

竹根殊勝竹皮冠，欲著先須短髮乾；要使山人共見，不持方帽禦風寒。

### 二

無物堪持比此冠，竹皮柔脆穀皮乾；故人戀戀褊袍意，豈爲哀憐范叔寒。

### 三

滋潤金明信好冠，錯刀剜出繻紋乾；不忘君惠常加首，要使

王安石全集 卷二十七 律詩

權盟未可奪。

### 四

冠工新意對梅欒，霧卷雲蒸久未乾；遺我山林真自稱，何須貂暖配金寒。

### 和郭功甫

兄欲相邀臥看山，扁舟自可送君還；留連山郭今如此，知復何時伴我閒。

葉致遠置洲田，以詩言志，次其韻二

### 首

吟嘆君詩久掉頭，知君興不負滄洲；土山欲爲羊曇賭，且可專心學奕秋。

### 二

若將有限計無涯，自困真同算海沙；隨順世緣聊戲劇，莫言河渚是吾家。

### 又次葉致遠韻二首

庵成有興亦尋春，風暖荒萊步始勻；若遇好花須一笑，豈妨



迦葉杜多身。

一一

明時君尙富春秋，豈比衰翁遠自投。智略未應施缺缺，上前他日望吾丘。

### 次昌叔韻

寄公無國寄鍾山，垣屋青松曉鶴間。長以聲音爲佛事，野風蕭颯水潺湲。

### 次張唐公韻

憶昨同追八馬蹄，約公投老此山棲。公乘白鳳今何處，我適新年值白雞。

### 次俞秀老韻

解我蔥珩脫孟勞，暮年甘與子同袍。新詩比舊增奇峭，若許追攀莫太高。

### 酬宋廷評請序經解

未曾相識已相憐，香火靈山亦有緣。訓釋雖工君尙少，不應忽務世人傳。

### 送耿天隲至渡口

雪雲江上語依依，不比尋常恨有違。四十餘年心莫逆，故人如我與君稀。

### 承慶院送道原還儀真作詩要之。

歲暮青條已見梅，餘花次第相爭開。淮南爲此山林勝，作意春風更一來。

### 送方劭祕校

南浦柔條拂地垂，攀翻聊寄我西悲。武昌官柳年年好，他日春風憶此時。

### 芙蓉堂二首

投去歸來一幅巾，尙私榮祿備藩臣。芙蓉堂下疏秋水，且與龜魚作主人。

一一

乞得膠膠擾擾身，五湖煙水替風塵。祇將鳧雁同爲侶，不與龜魚作主人。

長干釋普濟坐化

投老唯公最故人，相尋長恨隔城闌。百年俯仰隨薪盡，畫手空傳淨戒身。

卷二十八

律詩 七言絕句

送黃吉甫入京題清涼寺壁

薰風洲渚齊花繁，看上征鞍立寺門。投老難堪與君別，倚江從此望還轅。

與道原自何氏宅步至景德寺

元豐七年三月十九日

前時偶見花如夢，紅紫紛紛披競淺。深；今日重來如夢覺，靜無餘馥可追尋。

過法雲

路過湖溝八九盤，招提雪脊隱雲端。金鈿一一花搖老，翠被風重山更寒。

王安石全集 卷二十八 律詩

光宅寺

梁武帝宅也。其北齊安隔淮，齊武帝宅也。宋興又在其北。

齊安孤起宋興前，光宅相仍一水邊。蜂分蟻爭今不見，故窠遺堦尚依然。

題勇老退居院

道人投老寄山林，偶坐翛然洗我心。夢境此身能且在，在明年寒食更相尋。

與寶覺宿龍華院三絕句

舊有詩云京口瓜州一水間，鍾山只隔數重山。春風自綠江南岸，明月何時照我還。

老於陳迹倦追攀，但見幽人數往還。憶我小詩成悵望，鍾山只隔數重山。

一

世間投老斷攀緣，忽憶東遊已十年。但有當時京日月，與公隨我故依然。

三

與公京口水雲間，問月何時照我還。邂逅我還還問月，何時照我宿金山。

### 清涼白雲庵

庵雲作頂峭無鄰，衣月爲衿靜稱身；木落岡巒因自默，水歸洲渚得橫陳。

### 自定林過西庵

午雞聲不到禪林，栢子煙中靜擁衾；忽憶西巖道人語，杖藜乘興得幽尋。

### 歸庵

稻畦藏水綠秧齊，松鬣初乾尙有泥；縱蹇尋岡歸獨臥，東庵殘夢午時雞。

### 雪中遊北山呈廣州使君和叔同年

南州歲晚亦花開，有底堪隨驛使來；看取鍾山如許雪，何須持寄嶺頭梅。

### 謝安墩二首

我名公字偶相同，我屋公墩在眼中；公去我來墩屬我，不應墩姓尙隨公。

一一

謝公陳迹自難追，山月淮雲祇往時；一去可憐終不返，暮年垂淚對桓伊。

### 東陂二首

東陂風雨臥黃雲，脰水翻溝隔壠分；春玉取新知不晚，腰鎌今日已紛紛。

一一

荷葉初開筍漸抽，東陂南蕩正堪游；無端壠上脩脩麥，橫起寒風占作秋。

### 山陂

山陂院落今按種，城郭樓臺已放燈；白髮逢春唯有睡，睡間啼鳥亦生憎。

### 欲往北山以雨止

北山朝氣濟高秋，欲往愁營獨少留；散策緣岡初見日，興隨雲盡復中休。

### 耿天驕惠梨次韻奉酬

故人家果獨難忘，秋實初成便得嘗；直使紫花形味勝，豈能

終日望咸陽。

一一

淮圃新陰百畝涼，分甘每得助秋嘗；張公大谷雖云美，誰肯苞苴出晉陽。

三二

甘滋南北共傳勝，栽接還如老圃家；誰謂交梨非外獎，因君澆灌已萌芽。

### 北山有懷

香火因緣寄北山，主恩投老更人間。傷心躑躅岡頭路，明日春風自往還。

### 定林

窮谷經春不識花，新松老栢自欹斜；慙慙更上山頭望，白下城中有幾家。

### 封舒國公三首

陳迹難尋天柱源，疏封投老謾明恩；國人欲識公歸處，楊柳蕭蕭白下門。

王安石全集 卷二十八 律詩

一一

桐鄉山遠復川長，紫翠連城碧滿隍；今日桐鄉誰愛我，當時我自愛桐鄉。

三二

開國桐鄉已白頭，國人誰復記前遊；故情但有吳塘水，轉入東江向我流。

### 北陂杏花

一陂春水繞花身，花影妖嬈各占春；縱被春風吹作雪，絕勝南陌碾成塵。

### 五更

青燈隔幔映悠悠，小雨含煙凝不流；祇聽雷聲已無夢，五更桐葉強知秋。

### 與薛肇明弈碁賭梅花詩輸一首

華髮尋春喜見梅，一株臨路雪培堆；鳳城南陌他年憶，杳杳難隨驛使來。

### 又代薛肇明一首

三五

野水荒山寂寞濱，芳條弄色最關春；故將明艷浚霜雪，未怕青腰玉女嗔。

### 溝上梅花欲發

亭亭骨暖臨溝處，脈脈含芳映雪時；莫恨夜來無伴侶，月明還見影參差。

### 紅梅

江南歲盡多風雪，也有紅梅漏洩春；顏色凌寒終慘澹，不應掃落始愁人。

### 耿天驤許浪山千葉梅見寄

聞有名花卽謾栽，慇懃準擬故人來；故人歲歲相逢晚，（一作能相見）知復同看幾度開。

### 與天驤宿清涼廣惠僧舍

故人不惜馬虺隤，許我年年一度來；野館蕭條無準擬，與君相殖浪山梅。

### 池上看金沙花數枝過酴醾架盛開

#### 二首

午陰寬占一方苔，映水前年坐看栽；紅蕊似嫌塵染污，青條風上別枝開。

#### 一一

酴醾一架最先來，夾水金沙次第栽；濃綠扶疎雲對起，醉紅撩亂雪爭開。

### 北山

北山輸綠漲橫陂，直壘回塘澗澗時；細數落花因坐久，綏尋芳草得歸遲。

### 詠菊二首

補落迦山傳得種，閻浮檀水染成花；光明一室眞金色，復似毗耶長者家。

#### 一一

院落深深數菊叢，綠花錯莫兩三蜂；蜜房歲晚能多數，酒盡重陽自不供。

### 楊柳

楊柳杏花何處好？石梁茅屋雨初乾；綠垂靜路要深駐，紅寫

清波得細看。

### 北山道人栽松

陽坡風暖雪初融，度谷遙看積翠重；磊砢拂天吾所愛，他年來此聽樓鐘。

### 山櫻

山櫻抱石蔭松枝，比並餘花發最遲；賴有春風嫌寂寞，吹香渡水報人知。

### 償薛肇明秀才檀木

灑錦江邊木有禮，小園封植竹華滋；地偏或免（淵聖御名）雕伐，歲晚聊同庾信移。

### 馬斃

恩寬一老寄松筠，晏臥東牕度幾春；天賜駒龍化去，謾容小蹇戲閑身。

### 出郊

川原一片綠交加，深樹冥冥不見花；風日有情無處著，初迴光景到桑麻。

王安石全集 卷二十八 律詩

### 懷府園

槐陰過雨盡新秋，盆底看雲映水流；忽憶小金山下路，綠蘋稀處看游鯈。

### 江寧夾口二首

鐘山咫尺被雲埋，何況南樓與北齋；昨夜月明江上夢，逆隨潮水入秦淮。

一一

日西江口落征帆，卻望城樓淚滿衫；從此夢歸無別路，破頭山北北山南。

### 蔣山手重松

青青石上歲寒枝，一寸巖前手自移；開道近來高數尺，此身蒲柳故應衰。

### 中年

中年許國邯鄲夢，晚歲還家壙壤遊；南望青山知不遠，五湖春草入扁舟。

### 寄四姪旂

三七

數篇持往助歡哈，想見封題手自開；  
春草已生無好句，阿連空復夢中來。

一一

一日東岡上幾迴，百重雲水隔蘇臺；  
（一作一日東岡望百迴，迢迢雲水隔蘇臺）遙知別後詩無數，  
黃犬歸時總寄來。

### 寄吳氏女子

夢想平生在一丘，暮年方此得優游；  
江湖相忘真魚樂，怪汝長齋特地愁。

### 寄蔡天啓

杖藜緣壑復穿橋，誰與高秋共寂寥；  
佇立東岡一搔首，冷雲衰草暮迢迢。

### 呈陳和叔

數椽生草覆莓苔，（一作數椽牢落長莓苔）  
一徑牆陰斷雪開；玉匣囊衣新徙舍，  
杖藜從此爲君來。

一一

數椽庫屋茨生草，三畝荒園種晚蔬；  
永日終無一杯酒，可能

留得故人車。

### 招葉致遠

白下長千一水間，竹雲新筍已斑斑；  
明朝若有扁舟興，落日潮生尙可還。

### 招楊德逢

山林投老倦紛紛，獨臥看雲卻憶君；  
雲尙無心能出岫，不應君更懶於雲。

### 和叔招不往

門前秋水可揚舠，有意西尋白下亭；  
只欲往來相邂逅，卻嫌招喚苦丁甯。

### 和叔雪中見過

捐書去寄老山林，無從追緣（緣一作尋）  
往事心；忽值故人乘雪興，玉堂前話得重尋。

### 俞秀老忽然不見

忽去飄然遊泊盤，共疑杖策在梁端；  
禪心暫起何妨寂，道骨雖清不畏寒。

# 與耿天隲會話

邯鄲四十餘年夢，相對黃梁欲熟時；萬事祇如空鳥迹，怪君強記尙能追。

## 卷二十九

### 律詩

七言絕句

### 與沈道原過西莊遂遊寶乘

周顛宅作阿蘭若，裏約身歸窳堵坡；今日隱侯孫亦老，偶尋陳迹到煙蘿。（一作蕙帳銅屏皆舊事，飄然陳迹在松蘿。）

### 庚申正月遊齊安

水南水北重重柳，山後山前處處梅；未即此身隨物化，年年長趁此時來。

序申正月，遊齊後有詩云：「水南水

北重重柳。」壬戌正月再遊。

招提詩：巖漫黃埃，忽忽籠紗兩過梅；老值白雞能不死，復隨春色破寒來。

王安石全集 卷二十九 律詩

壬戌正月晦與仲元自淮上復至齊

安

風暖柴荆處處開，雪乾沙淨水洄洄；憶行卻得前年路，看盡梅花看竹來。

### 壬戌五月與和叔同遊齊安

綠成白雪桑重綠，割盡黃雲稻正青；它日玉堂揮翰手，芳時同此賦林坰。

成字說後與曲江譚君丹陽蔡君同

遊齊安

據梧枝策事如毛，久苦諸君共此勞；遙望南山堪散釋，故尋西路一登高。

元豐二年十月政公改路故作此詩

獨龍東路得平岡，始免遊人屐齒妨；更有主林身半現，與公隨轉作陰涼。

### 書定林院牕

與安太師同宿，既曉問昨夜有何夢師云有數夢皆忘記。竹雞呼我出華胥，起滅篝燈擁燉爐；試問道人何所夢，但言

三九



渾忘不言無。

### 同熊伯通自定林過悟真二首

與客東來欲試茶，倦投松石坐欹斜；  
暗香一陣連風起，知有薔薇澗底花。

一一

城郭紛紛老倦尋，幅巾來寄北山岑；  
長遭客子留連我，未快穿雲涉水心。

### 悟真院

野水從橫漱屋除，午牕殘夢鳥相呼；  
春風日日吹香草，山北山南路欲無。

### 傳神自讚

我與丹青兩幻身，世間流轉會成塵；  
但知此物非他物，莫問今人猶昔人。

### 定林院昭又齋

定林齋後鳴禽散，只有提壺守屋簷；  
苦勸道人沽美酒，不應無意引醴醞。

### 經局感言

罷相出守江甯，仍領經局。

自古能全已不才，豈論騏驥與鶖胎；  
放歸自食情雖適，絡首猶存亦可哀！

### 鍾山晚步

小城賣酒家。 小雨輕風落棟花，  
細紅如雪點平沙；  
橫籬竹屋江村路，時見

### 散策

散策東岡亦已勞，橫塘西轉有亭臯；  
絮飛度屋何許柳，花落墳溝無數桃。

### 書靜照師塔

簡老已歸黃土陌，淵師今日白頭翁；  
百憂三十餘年事，陳迹山林草野中。

### 記夢

辛酉九月二十二夜夢高郵土山道人，  
赴蔣山北集雪峯爲長老，已而坐化，復出南興國寺，  
與余同臥一榻，禪榻出片竹數寸，  
上繞生絲，屬余藏之。余弃弗取，  
作詩與之。

月入千江體不分，道人非復世間人；  
鍾山南北安禪地，香火

他時共（一作供）兩身。

### 勸會賀蘭溪主

賀蘭溪，洛京地名。陳繹買地築居於郵中問之。

賀蘭溪上幾株松，南北東西有幾峯？買得往來今幾日，尋常誰與坐從容。

### 書湖陰先生壁二首

茅簷長掃靜無苔，花木成畦手自栽；一水護田將綠鵝，兩山排闥送青來。

一一

桑花索漠楝花繁，風斂餘香暗度垣；黃鳥數聲殘午夢，尙疑身屬半山園。

### 過劉全美所居

西嶺晴天得強扶，出林知有故人居；數能過我論奇字，當復令公見異書。

### 書何氏宅壁

有興提魚就公養，此言雖在已三年；晚纔終負幽人約，空對湖山坐惘然。

王安石全集 卷二十九 律詩

### 題永慶壁有雱遺墨數行

永慶招提墨數行，歲時風露每悽傷；殘骸豈久人間世，故有情鍾未可忘！

### 江寧府園示元度

畫船南北水遙通，日暮幅巾篔簹中；行到月臺逢翠碧，背人飛過子城東。

### 金陵郡齋

談經投老拚悠悠，爲吏文書子卽休；深炷鑪煙（一作香）閉齋閣，臥聽簷雨瀉高秋。

### 戲示蔣穎叔

扶衰南陌望長楸，燈火如星滿地流；但怪傳呼殺風景，豈知禪客夜相投。

### 遊城東示深之德逢

欲牽淮舸共尋源，且踏青青繞杏園；憶我舊時光宅路，依然桑柳映花繁。

四一

王安石全集 卷二十九 律詩

麗澤門

麗澤門西日未俄，水明沙淨卷纖羅；  
綠瓊洲渚青瑤嶂，付與詩工敢琢磨。

示公佐

殘生傷性老耽書，年少東來復起予；  
各據橋梧同不寐，偶然聞雨落堦除。

示俞秀老二首

不見故人天際舟，小亭殘日更回頭；  
綠成白雪三千丈，細草孤雲一片愁。

一一

君詩何以解人愁，初日紅蕖碧水流；  
未怕元劉妨獨步，每思陶謝與同遊。

示李叔時二首

知子鳴絃意在山，一官聊復戲人間；  
能爲白下東南尉，藜杖緇巾得往還。

一一

四二

千山訪我幾摧舟，清坐來看十日留；  
勢利白頭何足道，古人傾蓋有綢繆。

示寶覺二首

火暖窻明粥一盂，晨興相對寂無魚；  
超然聖寺山林外，別有禪天好淨居。

一一

重將壞色染衣裙，共臥鍾山一塢雲；  
客舍黃鸝今始熟，鳥殘紅柿昔曾分。

仲元女孫

雙鬢嬉戲我庭除，爭挽新花比繡繡；  
親結香纓知不久，汝翁那更鬢髭鬚。

示永慶院秀老

禪房借枕得重欹，陳迹翛然尙有詩；  
曉我與公皆老矣，拂天松柏見栽時。

示王鐸主簿

君正忙時我正閑，如何同得到鍾山；  
夷門二十年前事，回首

黃塵一夢間。

### 戲城中故人

城郭山林路半分，君家塵土我家雲；莫吹塵土來汚我，我自  
有雲持寄君。

### 戲贈段約之

竹栢相望數十楹，藕花多處復開亭；如何更欲通南埭，割我  
鍾山一半青。

### 示俞處士

魯山眉宇人不見，只有歌辭來向東；借問樓前踏子鴛，何如  
雲臥唱松風？

### 懷張唐公

直諒多爲世所排，有懷長向我前開；暮年惆悵誰知此，南陌  
東阡獨往來。

### 憶金陵二首

覆舟山下龍光寺，元武湖泮五龍堂；想見舊時遊歷處，煙雲  
渺渺水茫茫。

王安石全集 卷二十九 律詩

一一

煙雲渺渺水茫茫，綠繞蕪城一帶長；蒿目黃塵憂世事，追思  
陳迹故難忘。

三二

追思陳迹故難忘，翠木蒼藤水一方；聞設精廬今更好，好隨  
殘汁理歸艖。

### 離昇州作

殘菊冥冥風更吹，雨如梅子欲黃時；相看握手總無語，愁滿  
眼前心自知。

### 望淮口

白煙洲漫接天涯，黯黯長空一道斜；有似錢塘江上望，海潮  
初落見平沙。

### 入瓜步望揚州

落日平林一水邊，蕪城掩映祇蒼然；白頭追想當時事，幕府  
青衫最少年。

### 泊船瓜洲

四三

京口瓜洲一水間，鍾山祇隔數重山；春風自綠江南岸，明月何時照我還！

### 重過余婆岡市

憶我東遊未有鬚，扶衰重此駐肩輿；市中年少今誰在，魯叟當街六十餘。

### 秦淮泛舟

強扶衰病牽淮舸，尙怯春風泝午潮；花與新吾如有意，山於何處不相招。

### 中書卽事

投老翻爲世網嬰，低徊終恐負平生；何時白下岡頭路，渡水穿雲取次行。

### 萬事

萬事黃梁欲熟時，世間談笑漫追隨；雞蟲得失何須算，鷓鴣逍遙各自知。

### 寄金陵傳神者李士雲

衰容一見便疑真，李子揮毫故有神；欲去鍾山終不忍，謝渠

分我死前身。

### 贈外孫

南山新長鳳凰雛，眉目分明畫不如；年小從他愛梨栗，長成須讀五車書。

東流頓令罷官，阻風示文有，按風伯

奏天閭之語，答以四句。

令尹犀舟失去期，撫然凭几占文移；勸君慎莫譏風伯，會有開帆破浪時。

楊德逢送米與法雲二老作此詩

盧全不出憎流俗，我卜郊居避俗憎；全有鄰僧去乞米，我今送米乞鄰僧。

送黃吉父將赴南康官歸金谿三首

柘岡西路白雲深，想子東歸得重尋；亦見舊時紅腳蹤，爲言春至每傷心。

一一

還家一笑卽芳辰，好與名山作主人；邂逅五湖乘興往，相邀

錦繡谷中春。

三

歲晚相逢喜且悲，莫占風日恨歸遲；我如逆旅當去客，復會有無那得知！

卷三十

律詩

七言絕句

金陵卽事二首

水際柴門一半開，小橋分路入青苔；背人照影無窮柳，隔屋吹香併是梅。

一

結綺臨春歌舞地，荒蹊狹巷兩三家；東風漫漫吹桃李，非復當時仗外花。

三

昏黑投林曉更驚，背人相喚百般鳴；柴門長閉春風暖，事外還能見鳥情。

王安石全集 卷三十 律詩

烏塘

烏塘渺渺綠平隄，隄上行人各有攜；試問春風何處好？辛夷如雪柘岡西。

柘岡

萬事紛紛祇偶然，老來容易得新年；柘岡西路花如雪，迥首春風最可憐。

城北

青青千里亂春袍，宿雨催紅出小桃；迥首北城無限思，日酣川淨野雲高。

金陵

金陵陳迹老莓苔，南北遊人自往來；最憶春風石城塢，家家桃李過牆開。

午枕

午枕花前簾欲流，日催紅影上簾鉤；窺人鳥喚悠鷗夢，隔水山供宛轉愁。

州橋

州橋踏月想山椒，迥首哀湍未覺遙；今夜重聞舊鳴咽，卻看山月話州橋。

觀明州圖

明州城郭畫中傳，尙記西亭一棹船；投老心情非復昔，當時山水故依然。

九日賜宴瓊林苑作

金明馳道柳參天，投老重來聽管絃；飽食太官還惜日，夕陽臨水意茫然。

王子偶題

熙寧五年，東府庭下作盆池，故作。

黃塵投老倦怱怱，故搗盆池種水紅；落日欹眠何所憶，江湖秋夢鷓鴣中。

和張仲通憶鍾陵二首

一夢章江已十年，故人重見想幡然；祇應兩岸當時柳，能到春來尙可憐。

一一

逸少池邊有一丘，西山南浦慣曾遊；殘年歸去終無樂，聞說

章江卽淚流

送和甫至龍安暮歸

隱隱西南月一鉤，春風落日澹如秋；房櫺半掩無人語，鼓角聲中始欲愁。

鍾山卽事

湖水無聲繞竹流，竹西花草弄春柔；茅簷相對坐終日，一鳥不鳴山更幽。

南澗樓

在江寧尉司

撲撲烟嵐遶四阿，物華終恨未能多；故應陡起三千丈，始奈重山複嶺何！

京城

三年衣上禁城塵，撫事惘然愧古人；明月滄波秋萬頃，扁舟長寄夢中身。

隴東西二首

隴東流水向東流，不肯相隨過隴頭；祇有月明西海上，伴人征戍替人愁。

臨西流水向西流，自古相傳到此愁！添卻征人無限淚，怪來  
嗚咽已千秋！

### 斜徑

斜徑偶通南隸路，數家遙對北山岑；草頭映蝶黃花晚，菱角  
蜻蜓翠蓼深。

### 暮春

北山吹雨送殘春，南澗朝來綠映人；昨日杏花渾不見，故應  
隨水到江濱。

### 雨晴

晴明山鳥百般催，不待桃花一半開；雨後綠陰空繞舍，總將  
春色付莓苔。

### 日西

日西階影轉梧桐，簾卷山青窻半空；金鴨火銷沈水冷，悠悠  
殘夢鳥聲中！

### 禁直

王安石全集 卷三十 律詩

翠木交陰覆雨簷，夜天如水碧橫橫；帝城風月看常好，人世  
悲哀老自添！

### 御柳

御柳新黃已迸條，宮溝薄凍未全消；人間今日春多少，祇看  
東方北斗杓！（一作習習春風拂柳條，御溝春水已冰消，欲知四  
海春多少，先向天邊問斗杓。）

### 祥雲

冰入春風漲御溝，上林花氣欲飛浮；未央屋瓦猶殘雪，卻爲  
祥雲映日流。

### 題中書壁

夜開金鑰詔辭臣，對御抽毫草帝綸；須信朝家重儒術，一時  
同榜用三人。

### 禁中春寒

青（一作浮）煙漠漠雨紛紛，水殿西廊北苑門；已著單衣  
猶禁火，海棠花下怯黃昏。

### 試院中



少時操筆坐中庭，子墨文章頗自輕；聖世選材終用賦，白頭來此試諸生。

學士院燕侍郎畫圖

六幅生綉四五峯，暮雲樓閣有無中；去年今日長千里，遙望鍾山與此同。

道旁大松人取以為明

龍甲虬髯不可攀，亭亭千丈蔭南山；應嗟無地逃斤斧，豈願爭明燭火間。

見鸚鵡戲作四句

雲木何時兩翅翻，玉籠金鎖祇煩冤；真須強學人間語，舉世無人解鳥言。

池雁

羽毛摧落向人愁，當食哀鳴似有求；萬里衡陽冬欲暖，失身尤為稻梁謀。

六年

六年湖海老侵尋，千里歸來一寸心；西望國門搔短髮，九天

宮闕五雲深。

世故

世故紛紛漫白頭，欲尋歸路更遲留；鍾山北繞無窮水，散髮何時一釣舟？

邵平

天下紛紛未一家，販繪屠狗尚雄夸；東陵豈是無能者，澤傍青門手種瓜。

中牟

頽城百雉擁高秋，驅馬臨風想聖丘；此道門人多未悟，爾來千載判悠悠。

王章

壯（一作志）士軒昂非自謀，近臣當為國深憂；區區女子無高意，追念牛衣暖即休。

神物

神物登天捷可騎，如何孔甲但能羈？當時若更無劉累，龍意茫然豈得知。

# 文成

文成五利老紛紛，方丈蓬萊但可聞；萬里出師求寶馬，飄然空有意凌雲。

# 讀漢書

京房劉向各稱忠，詔獄當時跡自窮；畢竟論心異恭顯，不妨迷國略相同。

# 賜也

賜也能言識未真，誤將心許漢陰人；桔槔俯仰妨何事，抱甕區區老此身。

# 重將

重將白髮旁牆陰，陳迹茫然不可尋；花鳥總知春爛漫，人間獨自有傷心。

# 載酒

載酒欲尋江上舟，出門無路水交流；黃昏獨倚春風立，看卻花開觸地愁。

# 楚天

王安石全集 卷三十 律詩

楚天如夢水悠悠，花底殘紅漫不收；獨繞去年揮淚處，還將牢落對滄洲。

# 江上

江北秋陰一半開，晚鶯含雨卻低回；青山綠繞疑無路，忽見千帆隱映來。

# 春江

春江渺渺抱牆流，煙草茸茸一片愁；吹盡柳花人不見，青旗催日下城頭。

# 春雨

城雲如夢柳依依，野水橫來強滿池；九十日春渾得雨，故應略潤作花時。

# 初到金陵

江湖歸不及花時，空撓扶疎綠玉枝；夜直去年看蓓蕾，晝眠今日對紛披。

# 送利甫至龍安微雨因寄吳氏女子

荒煙涼雨助人悲，淚染衣巾不自知；除卻春風沙際綠，一如

看汝過江時。

### 與北山道人

蒨果疏泉帶淺山，柴門雖設要常關；別開小徑連松路，祇與隣僧約往還。

### 過外弟飲

一自君家把酒杯，六年波浪與塵埃；不知烏石岡邊路，至老相尋得幾回。

### 若耶溪歸輿

若耶溪上踐莓苔，興罷張帆載酒回；汀草岸花渾不見，青山無數逐人來。

### 烏石

烏石岡邊繞綠山，柴荆細路（一作徑）水雲間；吹（一作拈）花嚼蘂長來往，祇有春風似我閑。

### 定林

定林青（一作修，又作喬。）木老參天，橫貫東南一道泉；六月杖藜尋石路，午陰多處弄潺湲。

### 定林所居

屋繞灣溪竹繞山，溪山卻在白雲間；臨溪放艇依山坐，溪鳥山花共我閑。

### 臺城寺側獨行

春山撩亂水縱橫，籬落荒畦草自生；獨往獨來山下路，筍輿看得綠陰成。

### 遊鍾山

終日看山不厭山，買山終待老山間；山花落盡山長在，山水空流山自閑。

### 松間

被召將行作

偶向松間覓舊題，野人休誦北山移；丈夫出處非無意，猿鶴從來不自知。

### 雨未止王臣欲行以詩留之

紛紛應接使人愁，與子從容喜間酬；他日故將泥自底，今朝欲以雨相留。

# 卷三十一

## 律詩

七言絕句

### 題張司業詩

蘇州司業詩名老，樂府皆言妙入神；看似尋常最奇崛，成如容易卻艱辛。

### 同陳和叔遊北山

春風蕩屋雨填溝，東閣翛然擁麴裘；鄰壁黃梁炊未熟，喚迴殘夢有鳴驢！

### 次吳氏女子

吳氏詩云：西風不入小窻紗，秋氣應憐我憶家；極目江南千里恨，依然和淚看黃花。南朝九月臺在孫陵曲街旁，去吾園只數百步。

孫陵西曲岸烏紗，知汝淒涼正憶家；人世豈能無聚散，亦逢佳節且吟花。

### 再次前韻

秋燈一點映籬紗，好讀楞嚴莫念家；能了諸緣如夢事，世間唯有妙蓮花！

王安石全集 卷三十一 律詩

## 卽席

曲沼融融汗盡潮，暖煙籠瓦碧參差；人情共恨春猶淺，不問寒梅有幾枝。

### 遊城南卽事二首

神姦變化久難知，禹鼎由來更不疑；螭魅合謀非一日，太丘眞復社亡遲。

### 二

秦壇東路樹重營，獨背朝陽信馬行；漫道城南天尺五，荒林時見一柴荆。

### 寄沈道原

城郭千家一彈丸，剗岡擁腫作蛇蟠；眼前不道無蒼翠，偷得鍾山隔水看。

### 哭張唐公

堂（一作棠）邑山林久寂寥，屬車前日駐雞翎；冥冥獨鳳隨靈霧，（一作知何處）南陌空聞自引簫。

### 生日次韻南郭子二首

五一

救鯨壽剗世無方，斷簡陳編付藥房；祝我壽齡君好壽，毗耶一夜滿城香。

二

寒濕清枝故有梅，草堂先對白頭開；殘骸已若雜年夢，猶見騷人幾度來。

### 八公山

淮南但有八公名，鴻寶燒金竟不成；身與仙人守都廨，可能雞犬得長生？

### 過徐城

七年五過徐城縣，自笑皇皇此世間；安得身如倉廩氏，一官能到子孫閑？

### 送丁廓秀才歸汝陰二首

好去翩然丁令威，昔人且在不應非；淮靈豈與遼天關，想復留情故一歸。

二

西州行路日蕭條，執手傷懷不自聊；遊子故鄉終念返，豈能

無意冶城潮

### 和惠思韻二首

#### 醴泉觀

邂逅相隨一日閑，或緣香火共靈山；夕陽興罷黃塵陌，直似蓬萊墮世間。

#### 蟬

白下長干何可見？風塵愁死庾蘭成；去年今日青松路，亦自聞蟬第一聲。

### 送王石甫學士知湖州

吳興太守美如何，柳惲詩才未足多；遙想郡人迎下擔，白蘋洲渚正滄波。

### 懷鍾山

投老歸來供奉班，塵埃無復見鍾山；何須更待黃粱熟，始覺人間是夢間。

### 江寧夾口三首

茅屋滄洲一酒旗，午煙孤起隔林炊；江清日暖蘆花轉，祇  
（一作恰）似春風柳絮時。

一一

月墮浮雲水捲空，滄洲店坵五更風；北山草木何由見，夢盡  
青燈展轉中。

三三

落帆江口月黃昏，小店無燈欲閉門；側出岸沙楓半死，繫船  
應有去年痕。

寄碧巖道光法師

去馬來車擾擾塵，自難長寄水雲身；碧巖後主今爲客，何況  
開山說法人。

省中

萬事悠悠心自知，強顏於世轉參差；移牀獨臥秋風裏，靜看  
蜘蛛絕網絲。

一一

大梁春雪滿城泥，一馬常瞻落日歸；身世自知還自笑，悠悠

三十九年非

崇政殿後春晴卽事

悠悠獨步水西軒，百舌枝頭語更繁；山鳥不應知地禁，亦邊  
春暖卽啾喧。

省中沈文通廳事

竹上秋風吹網絲，角門常閉吏人稀；蕭蕭一榻卷書坐，直到  
日斜騎馬歸。

吳任道說應舉時事

縣弧城南陂水深，春泥滿眼路嶮嶇；獨騎瘦馬衝殘雨，前伴  
茫茫不可尋。

送河中通判朱郎中迎母東歸

綵衣東笑上歸船，萊氏歡娛在晚年；嗟我白頭生意盡，看君  
今日更悽然！

寄題杭州明慶院修廣師明碧軒

明碧軒南竹數叢，別來江外幾秋風；道人無復人間世，嗟我  
今爲白髮翁！

夜直

金爐香盡漏聲殘，翦翦輕風陣陣寒；  
春色惱人眠不得，月移花影上欄干。

試院中四首

白髮無聊病更侵，移牀臥竹向秋陰；  
朝來雁背西風急，吹折江湖萬里心。

一一

咫尺淹留可奈何，東西虛共一娉娥；  
堦前穠樹應搖落，此夜清光得幾多。

三

青燈照我夢城西，坐上傳觴把菊枝；  
忽忽覺來頭更白，隔牆聞語趁朝時。

四

蕭蕭疎雨吹簷角，噎噎暝蛩啼草根；  
閑卻荒庭歸未得，一燈明滅照黃昏。

人間

人間投老事紛紛，才薄何能強致君；  
一馬黃塵南陌路，眼中唯見北山雲。

後殿牡丹未開

紅蕖未開如婉婉，紫囊猶結想芳菲；  
此花似欲留人住，山鳥無端勸我歸。

春日

柴門照水見青苔，春遶花枝漫漫開；  
路遠遊人行不到，日長啼鳥去還來。

寄韓持國

淥遶宮城漫漫流，明黃小蝶弄春柔；  
問知公子朝陵去，歸得花時卻自愁。

答韓持國

知公尙憶洛城中，醉裏穿花滿袖風；  
花亦有知還有恨，今爲紅藥主人翁。

出城

慣作野人多野興，欲爲時用少時材；  
出城偶與沙塵背，轉覺

谿山入眼來。

### 涿州

涿州沙上望桑乾，鞍馬春風特地寒；萬里如今持漢節，卻尋此路使呼韓。

### 出塞

涿州沙上飲盤桓，看舞春風小契丹；塞雨巧催燕淚落，濛濛吹濕漢衣冠。

### 入塞

荒雲涼雨水悠悠，鞍馬東西鼓吹休；尚有燕人數行淚，回身卻望塞南流。

### 書汜水關寺壁

汜水鴻溝楚漢間，跳兵走馬百重山；如何咫尺商於地，便有園公綺季閑。

### 題北山隱居王閑叟壁

荒村日午未開門，雨後餘花滿地存；舊世未能旌隱逸，誰人知道是王孫。

### 和惠思歲二日二絕

懶讀書來已數年，從人嘲我腹便便；為嫌歸舍兒童聒，故就僧房借榻眠。

二

沙磧藏春未放來，荒庭終日守陳麥；遙憐草色裙腰綠，湖寺西南一徑開。

### 赴召道中

海氣冥冥漲楚氛，汀洲回薄水橫分；青松十里鍾山路，祇隔西南一片雲。

### 江東召歸

昨日君恩悞賜環，歸腸一夜繞鍾山；雖然眷戀明時祿，羞見琅邪有邴丹。

### 平甫如通州寄之

北山搖落水崢嶸，想見揚帆出廣陵；平世自無憂國事，求田應不忤陳登。



寄顯道

舟約刀頭止歲前，故人專使手書傳；出門江口問消息，極目  
寒沙空渺然！

和平父寄道光法師

欲見道人非一朝，杖藜無路剗青霄；千巖萬壑排風雨，想對  
銅鑪柏子燒。

三品石

草沒苔侵弃道周，誤恩三品竟何酬；國亡今日頑無恥，似爲  
當年不與謀。

和崔公度家風琴八首

屋山終日信飄飄，似與幽人破寂寥；爲有機心須強聒，直教  
懸解始聲消。

一一

簾幕無風起沉寥，誰悲精鐵任飄飄；隨商應角知無意，不待  
歌成韻已消。

三三

萬物能鳴爲不平，世間歌哭兩營營；君知此物心何卻，自信  
天機自有聲。

四

風鐵相敲固可鳴，朔兵行夜響行營；如何清世容高臥，翻作  
幽窗枕上聲。

五

南風屋角響蕭蕭，白日簾垂坐寂寥；愛此官商有真意，與君  
傾耳盡今朝。

六

風來風去豈管要，隨分鏗鏘與寂寥；不似人間古鐘磬，從來  
文飾到今朝。

七

繫身高處本無心，萬壑鳴時有玉音；欲作錢耶爲物使，知君  
能笑不祥金。

八

疏鐵箏間持作琴，清風纔到遽成音；伊人欲問無真意，向道

從來不博金。

### 送陳靖中舍歸武陵

知君欲上武陵溪，水自東流入自西；到日桃花應已謝，想君應不爲花迷。

### 北山

別木爲舟數丈餘，臥看風月映芙蓉；清香一陣渾無暑，時有鷺根躍出魚。

### 適意

一燈相伴十餘年，舊事陳言知幾編；到了不如無累後，困來顛倒枕書眠。

### 辱井

結綺臨春草一丘，尙殘宮井戒千秋；奢淫自是前王恥，不到龍沈亦可羞。

### 題金沙

海棠開後數金沙，高架層層吐絳葩；咫尺西城無力到，不知誰賞魏家花？

王安石全集 卷三十二 律詩

### 夜聞流水

千丈崩奔落石碣，秋聲散入夜雲悲；州橋月下聞流水，不忘鍾山獨宿時。

### 詠月三首

寒光乍洗山川瑩，清影遙分草樹纖；萬里更無雲物動，中天只有兔隨蟾。

一一

江海清明上下兼，碧天遙見一毫纖；此時只欲浮雲盡，窟穴何妨有兔蟾。

三二

一片清光萬里兼，幾回圓極又纖纖；君看出沒非無意，豈爲辛勤養玉蟾？

### 卷三十二

### 律詩

七言絕句

### 次韻杏花三首

五七

只愁風雨劫春回，怕見枝頭爛漫開；野鳥不知人意緒，啄教零亂點蒼苔。

一一

心憐紅藥與移栽，不惜年年糞壤培；風雨無時誰會得？欲教零亂強催開。

三

看時高艷先驚眼，折處幽香易滿懷；野女強簪看亦醜，少教憔悴逐荆釵。

杏園卽事

蟠桃移種杏園初，紅抹燕脂嫩臉蘇；聞道鬢零落人世，清香得似舊時無？

宋城道中

都城花木久知春，北路餘寒尙中人；宿草連雲青未得，東風無賴只驚塵。

對客

窗壁風回午枕涼，清談相對一胡牀；心知帝力同天地，能使

人間白日長。

愍儒坑

智力區區不爲身，欲將何力助強秦？只應埋沒千秋後，更足詩書發冢人。

遇雪

定知花發是歸期，不奈歸心日日歸；風雪豈知行客恨，向人更作落花飛。

殊勝淵師八十餘，因見訪，問之近來

如何？答曰：隨緣而已。至示寂，作是詩。

寄託荒山鬼與鄰，一生黃卷不離身；百年薪盡隨緣去，莫學緇郎更誤人。

懷舊

吹破春風水放光，山光澗草百般香；身閑處處堪行樂，何事低徊兩鬢霜？

### 訪隱者

童子穿雲晚未歸，誰收松下著殘棋。  
先生醉臥落花裏，春去人間總不知。

### 海棠花

綠嬌隱約周輕掃，紅嫩妖嬈臉薄妝。  
巧筆寫傳功未盡，清才咏吟興何長。

### 證聖寺杏接梅花未開

紅藥曾遊此地來，青青今見數枝梅。  
只應尚有嬌春意，不肯凌寒取次開。

### 雜詠五首

勳業無成照水羞，黃塵入眼見山愁。  
煙中漠漠江南岸，更與家人一少留。

### 一一

白頭重到太寧宮，玉珮瓊瑤在眼中。  
歌舞可憐人暗換，花開花落幾春風。

### 三

王安石全集 卷三十二 律詩

朝陽映屋擁書眠，夢想鍾山一慨然。  
投老安能長忍垢，會當歸此濯寒泉。

### 四

烏石岡頭躑躅紅，東江柳色漲春風。  
物華人意曾相值，永日留連草莽中。

### 五

小雨瀟瀟潤水亭，花風颭颭破浮萍。  
看花聽竹心無事，風竹聲中作醉醒。

### 書陳祈兄弟屋壁

千里歸來倦宦身，欲尋田宅豫求鄰。  
能將孝友傳家世，鄉邑如君更幾人。

### 郊行

柔桑採盡綠陰稀，蘆箔蠶成密繭肥。  
聊向村家問風俗，如何勤苦尙凶飢。

### 破家二首

埋沒殘碑草自春，旋風時出地中塵。  
墻間夜半分珠玉，猶是

五九

當時乞祭人

一一

殘樽穿來欲幾春，蕭蕭長草沒麒麟；  
塔間或有樵蘇客，未必他年醉飽人。

題景德寺試院壁

至和三年八月十日

屋東瓜蔓已扶疎，小石藍花破萼初；  
從此到寒能幾日，風沙還見一年除。

金陵報恩大師西堂方丈二首

簷花映日午風薰，時有黃鸝隔竹聞；  
香爇一爐春睡足，上方車馬正紛紛。

一一

蕭蕭出屋千竿玉，蕭蕭當牕一炷雲；  
心力長年人事外，種花移石尙殷勤。

題正覺院籜龍軒二首

此軒名字輕平子，愛此吾能爲賦詩；  
山雨江風一披拂，籜龍還自有吟時。

一一

仙事茫茫不可知，籜龍空此見孫枝；  
壺中若有閑天地，何苦歸來問葛陂。

相州古瓦硯

吹盡西陵歌舞塵，當時瓦硯始稱珍；  
甄陶往往成今手，尙託聲名動世人。

望夫石

雲鬢塵髮與誰期，一去天邊更不歸；  
還似九疑山下女，千秋長望舜裝衣。

山前

山前溪水漲潺潺，山後雲埋不見山；  
不趁雨來耕水際，卽穿雲去臥山間。

江雨

冥冥江雨濕黃昏，天入滄洲漫不分；  
北澗欲通南湖水，南山正過北山雲。

楊子二首

儒者陵夷此道窮，千秋止有一楊雄。當時薦口終虛語，賦擬相如卻未工。

一一

道真沉溺九流渾，獨泝頽波討得源。歲晚強顏天祿閣，祇將奇字與人言。

獨臥二首

誰有鋤耰不自操，可憐園地滿蓬蒿。欲尋春物無蹊徑，獨臥南牀白日高。（一作日自高）

一一

茅簷午影轉悠悠，門閉青苔水亂流。百轉黃鸝看不見，海棠無數出牆頭。

孟子

沉魄浮魂不可招，遺編一讀想風標。何妨舉世嫌廷闕，故有斯人慰寂寥。

商鞅

自古驅民在信誠，一言爲重百金輕。今人未可非商鞅，商鞅

王安石全集 卷三十二 律詩

能令政必行

蘇秦

已分將身死勢權，惡名磨滅幾何年。想君魂魄千秋後，卻悔初無二頃田。

范雎

范雎相秦傾九州，一言立斷魏齊頭。世間禍故不可忽，餐中死屍能報讎。

張良

漢業存亡俯仰中，留侯當（一作於）此每從容。固陵始議韓彭地，複道方圖雍齒封。

曹參

東吳河山百戰功，白頭富貴亦成空。華堂不築新歌舞，卻要區區一老翁。

韓信

貧賤侵凌富貴驕，功名無復在芻蕘。將軍北面師降虜，此事人間久寂寥。

伯牙

高山心自知。千載朱絃無此悲；欲彈孤絕鬼神疑；故人捨我閉黃壤，流水

范增二首

中原秦鹿待新羈，力戰紛紛此一時；有道弔民天即助，不知何用牧羊兒。

一一

鄭人七十漫多奇，爲漢毆民了不知；誰合軍中稱亞父，直須推讓外黃兒。

賈生

一時謀議略施行，誰道君王薄賈生；爵位自高言盡廢，古來何啻萬公卿。

兩母

兩生才器亦超羣，黑白何勞強自分；好與騎奴可一處，此時俱事信將軍。

謝安

謝公才業自超羣，誤長清談助世紛；秦晉區區等亡國，可能王衍勝商君？

世上

仁賢不敢行。范蠡五湖收遠迹，管寧滄海寄餘生；可憐世上風波惡，最有

讀後漢書

天爭漢鼎歸。劉黨紛紛果是非，當時高士見精微；可憐寶武陳蕃輩，欲與

讀蜀志

求田意最高。千載紛爭共一毛，可憐身世兩徒勞；無人語與劉玄德，問舍

讀唐書

文皇立太平。志士無時亦少成，山才隨世就功名；并汾諸子何爲者，坐與

讀開成事

姦罔紛紛不爲明，有心天下共無成；空令執筆螭頭者，日記

君臣口舌爭。

### 別利甫赴南徐

都城落日馬蕭蕭，雨壓春風暗柳條；天際歸艖那可望，只將心寄海門潮。

### 寄茶與和甫

綵絳縫囊海上舟，月團蒼潤紫煙浮；集英殿裏春風晚，分到井門想麥秋。

### 寄茶與平甫

碧月團團墮九天，封題寄與洛中仙；石樓試水宜頻啜，金谷看花莫漫煎。

### 戲長安嶺石

附嶽憑崖豈易躋，無心應合與雲齊；橫身勢欲填滄海，肯爲行人惜馬蹄。

### 代答

破車傷馬亦天成，所託雖高豈自營；四海不無容足地，行人何事此中行？

王安石全集 卷三十三 律詩

### 促織

金屏翠幔與秋宜，得此年年醉不知；祇向貧家促機杼，幾家能有一絢絲？

### 臘享

明星慘澹月參差，萬竅含風各自悲；人散廟門燈火盡，卻尋殘夢獨多時。

### 卷三十三

### 律詩

七言絕句

### 杏花

垂楊一徑紫苔封，人語蕭蕭院落中；獨有杏花如喚客，倚牆斜日數枝紅。

### 城東寺菊

黃花漠漠弄秋暉，無數蜜蜂花上飛；不忍獨醒孤爾去，慙慙爲折一枝歸。

### 拒霜花

六三



落盡羣花獨自芳，紅英渾欲拒嚴霜；開元天子千秋節，戚里人家承露宮。

燕

處處定知秋後別，年年長向社前逢；行藏自欲追時節，豈是人間不見容！

吐綬雞

樊籬寄食老低摧，組麗深藏肯自媒；天日清明聊一吐，兒童初見互驚猜！

黃鸝

野花吹盡竹娟娟，尚有黃鸝最可憐！姪姪不知緣底事，背人飛過北山前。

蝶

翅輕於粉薄衣繪，長被花牽不自勝；若信莊周尚非我，豈能投死爲韃靼！

暮春

無限殘春著地飛，谿頭煙樹翠相圍；楊花獨得東風意，相逐

晴空去不歸。

眞州東園作

十年歷遍人間事，卻遶新花認故叢；南北此身知幾日，山川長在淚痕中。

過皖口

皖城西去百重山，陳迹今埋杳霭間；白髮行藏空自感，春風江水照衰顏。

發粟至石陂寺

暮水穿山近水除，三更燃火飯僧家；乘田有秩難逃責，從事雖勤敢嘆嗟！

別皖口

浮煙漠漠細沙平，飛雨濺濺歎水生；異日不知來照影，更添華髮幾千莖！

別灑皖二山

鄉學新恩借舊朱，欲辭灑皖更躊躇；攢條列岫應譏我，飽食窮年報禮虛！

# 舒州被召試不赴偶書

戴盆難與望天兼，自怪虛名亦自嫌；  
檣纜太牢俱有味，可能蚯蚓獨清廉？

# 舟過長蘆

木落草搖洲渚昏，泊船深閉雨中門；  
回燈只欲尋歸夢，兒女紛紛強笑言。

# 金山三首

北櫂南橋四垂，共憐金碧爛參差；  
孤根萬丈滄波底，除卻蛟龍世不知。

一一

波瀾蕩沃乾坤大，氣象包藏水石間；  
祇有此中宜曠望，誰令天作海門山。

三三

天日蒼茫海氣深，一船西去此登臨；  
丹樓碧閣皆時事，只有江山古到今。

# 泊姚江

王安石全集 卷三十三 律詩

山如碧浪翻江去，水似青天照眼明；  
喚取仙人來住此，莫教辛苦上層城。

# 遊鍾山

兩山松櫟暗朱藤，一水中間勝武陵；  
午梵隔雲知有寺，夕陽歸去不逢僧。

# 龍泉寺石井二首

山腰石有千年潤，海（一作石）眼泉無一日乾；  
天下蒼生待霖雨，不知龍向此中看。

一一

人傳秋水未嘗枯，滿底蒼苔亂髮鬪；  
四海旱多霖雨少，此中端有臥龍無？

# 興國樓上作

松篁不動翠相重，日射流塵四散紅；  
地上行人愁暈死，那知高處有清風。

# 別澧閣

一溪清瀉百山重，風物能留兩鬢容；  
後夜肯思幽興極，月明

孤影伴寒松。

### 杭州望湖樓回馬上作呈玉汝樂道

水光山氣碧浮浮，落日將歸又少留；從此祇應長入夢，夢中還與故人遊。

### 奉和景純十四丈三絕

身先諸老幹樞機，再見王門闔左扉；但恨東歸相值晚，豈知臨別更心違！

### 一一

幾年相約在林丘，眼見京江更阻遊；遺我珠璣何以報，恨無瑤玉與公舟。

### 三二

藏春花木望中迷，水複山長道阻躋；留恨老年塵世累，無因重到武陵溪。

### 臨津

臨津艷艷花千樹，夾徑斜斜柳數行；卻憶金明池上路，紅裙爭看綠衣郎。

### 汀沙

汀沙雪漫水溶溶，睡鴨殘蘆曉鷺中；歸去北人多憶此，每家圖畫有屏風。

### 西山

西山映水碧潭潭，楚老長謠淚滿衫；但道使君留不得，那知肯更憶江南。

### 和文淑

張氏女弟

天梯雲棧蜀山岑，下視嘉陵水萬尋；我得一舟江上去，恐君東望亦傷心！

### 春入

春入園林百草香，池塘冰散水生光；身閑是處堪攜手，何事低徊兩鬢霜。

### 暮春

芙蓉的歷抽新葉，首蓓闌干放晚花；白下門東春已老，莫嗔楊柳可藏鴉。

### 烏江亭

百戰疲勞壯士哀，中原一敗鬱難迴；江東子弟今雖在，肯與君王卷土來？

### 漢武

壯士悲歌出塞頻，中原蕭瑟半無人；君王不負長陵約，直欲功成賞漢臣。

### 諸葛武侯

慟哭何顏爲一言，餘風今日更誰傳；區區庸蜀支吳魏，不是虛心豈得賢？

### 望越亭

亂山千頃翠相圍，袞袞滄江去復歸；安得病身生羽翼，長隨沙鳥自由飛？

### 春日席上

十年流落負歸期，臨水登山各有思；今日樽前千萬恨，不堪頻唱鷓鴣辭！

### 旬容道中

荒煙寒雨暮山重，草木冥冥但有風；二十四年三往返，一身

王安石全集 卷三十三 律詩

多在百憂中！

### 晏望驛釋舟走信州

病起行山山更險，下窮溪谷上通天；乘高欲作東南望，背壁松杉滿我前。

### 祈澤寺見許堅題詩

藹藹春風入水村，森森喬木映朱門；高人遺蹟空佳句，誰識旌陽後世孫。

### 送陳景之

陳善

慘淡淮山水墨秋，行人不飲奈離愁；藥囊直入長安市，誰識柴車載伯休？

### 巫峽

神女音容詎可求，青山回抱楚宮樓；朝朝暮暮空雲雨，不盡襄王萬古愁。

### 徐秀才園亭

茂松修竹翠紛紛，正得山阿與水濱；笑傲一生雖自樂，有司還欲選方聞。

六七

中茅峯石上徐錯篆字題名

百年風雨草苔昏，尚有當年墨法存；  
祇恐終隨燬碑盡，西風吹曉滿秋原。

欲雪

天上雲驢未肯同，晚來雪意已填空；  
欲開新酒邀嘉客，更待天花落座中。

上元夜戲作

馬頭乘興尙誰見，曲巷橫街一  
一穿；  
盡道滿城無國艷，不知朱戶鎖嬋娟。

石竹花

春歸幽谷始成叢，地面芬敷淺淺紅；  
車馬不臨誰見賞，可憐亦解度春風。

黃花

四月揚州芍藥多，先時爲別苦風波；  
還家忽忽驚秋色，獨見黃花出短莎。

木芙蓉

水邊無數木芙蓉，露染臙脂色未濃；  
正似美人初醉著，強攙青鏡欲粧慵。

精衛

帝子銜冤久未平，區區微意欲何成；  
情知木石無云補，待見桑田幾變更！

戲贈育王虛白長老

白雲山頂病禪師，昔日公卿各贈詩；  
行盡四方年八十，卻歸荒寺有誰知！

黃河

派出崑崙五色流，一支黃濁貫中州；  
吹沙走浪幾千里，轉側尾閭無處求。

東江

東江木落水分洪，伐盡黃蘆洲渚空；  
南湖夕陽煙自起，西山漠漠有無中。

北望

欲望淮南更白頭，杖藜蕭颯倚滄洲；  
可憐新月爲誰好，無數

晚山相對愁

### 驪山

六籍然除七不磨，驪山如此盜兵何；五陵珠玉歸人世，卻爲時書發冢多。

### 縣舍西亭二首

山根移竹水邊栽，已見新篁破嫩苔；可惜主人官便滿，無因長向此徘徊。

### 二

主人將去菊初栽，落盡黃花去卻迴；到得明年官又滿，不知誰見此花開。

### 鐵幢浦

憶昨初爲海上行，日斜來往看潮生；如今身是西歸去，迴首山川覺有情。

### 臨吳亭作

補穿新漏備區區，志養殊嗟士大夫；欲致太平非一日，謾勞使者報新書。

王安石全集 卷三十四 律詩

### 蘇州道中順風

北風一夕阻東舟，清早飛帆落虎丘；運數本來無得喪，人生萬事不須謀。

### 卷三十四

### 律詩

七言絕句

### 送僧惠思歸錢塘

淥淨堂前湖水淥，歸時正復有荷花；花前亦見餘杭姥，爲道仙人憶酒家。

### 松江

來時似去時，天欲道來時已惘然；祇有松江橋下水，無情長送去來船。

### 秋日

莫言草木未知秋，今日風雲已自愁；獨傍黃塵騎一馬，行看蕭索聽颼颼。

六九

### 中秋夕寄平甫諸弟

浮雲吹盡數秋毫，燭燭金波滿滿醪；千里得君詩挑戰，夜壇誰敢將風颯？

### 靈山

靈山寧與世爲仇，斤斧侵凌自不休；水玉比來聞長價，市人無數起相讎。

### 荷花

亭亭風露擁川坻，天放嬌嬈豈自知；一舸超然他日事，故應將爾當西施。

### 殘菊

黃昏風雨打園林，殘菊飄零滿地金；攬得一枝猶好在，可憐公子惜花心。

### 竹窗

竹窗紅苜雨三根，山色遙供水際門；只我近知牆下路，能將屐齒記苔痕。

### 出定力院作

江上悠悠不見人，十年塵垢夢中身；慙慙爲解丁香結，放出枝間自在春。

### 寄育王大覺禪師

山木悲鳴水怒流，百蟲專夜思高秋；道人方丈應無夢，想復長吟擬懣休。

### 送僧遊天台

天台一萬六千丈，歲晏老僧攜錫歸；前程好景解吟否，密雪亂雲緘翠微。

### 次韻張仲通水軒

池雨含煙暎不收，草根長見水交流；愛君古錦囊中句，解道今秋似去秋。

### 送陳令

長谿流水碧潺潺，古木蒼藤暗兩山；把臂道人今在否，長官白首尙人間。

### 無錫寄正之

健席高橋送病身，亂山荒閣障歸津；應須一曲千回首，西去

論心更幾人

### 謾成

清時無路取封侯，病臥牛衣已數秋；日月不膠時易失，感今懷昔使人愁。

### 初晴

一抹明霞暗淡紅，瓦溝已見雪花融；前山未放曉寒散，猶鎖白雲三兩峯。

### 釣者

釣國平生豈有心，解甘身與世浮沈；應知渭水車中老，自是君王著意深。

### 將次鎮南

豫章江面朔風驚，浩蕩帆船破浪行；目送家山無幾許，千年空想蠓蛄聲。

### 出金陵

白石岡頭草木深，春風相與散衣襟；浮雲暗郭留佳氣，飛鳥隨人作好音。

### 鬪王微之

一雨迴鷗助暮收，炎曦不復畏金流；君家咫尺堪乘興，想岸鳥紗對弈秋。

### 題玉光亭

傳聞天下此埋壘，千古誰分偽與真；每向小庭風月夜，卻疑山水有精神。

### 贈僧

紛紛擾擾十年間，世事何嘗不強顏；亦欲心如秋水靜，應須身似嶺雲閑。

### 嘲叔孫通

馬上功成不喜文，叔孫繇繇共經綸；諸君可笑貪君賜，便計當時作聖人。

### 和淨因有作

朝紅一片墮聽塵，禪客翛然感此辰；更覺城中芳意少，不如山野草知春。

### 張工部廟



使紛紛下禁中，幾人曾到此城東；獨君遺像今如在，廟食  
真須德與功。

### 次韻和張仲通見寄三絕句

高山流水意無窮，三尺空絃膝上桐；默默此時誰會得，坐凭  
江閣看飛鴻。

一一

收拾乾坤付一壺，世間無物直鎔銖；醉鄉舊業拋來久，更欲  
因君稍問塗。

三三

欹枕狂歌擊唾壺，直將軒冕等鎔銖；醉鄉岐路君知否，不似  
人間足畏塗。

### 宣州府君喪過金陵

百年難盡此身悲，眼入春風祇涕洟；花發鳥啼皆有思，忍詩  
棠棣鶴鴒詩。

### 觀王氏雪圖

崔嵬相映雪重重，茅屋柴門在半峯；想有幽人遺世事，獨臨

青嶂倚長松。

### 韓子

紛紛易盡百年身，舉世何人識道真；力去陳言夸末俗，可憐  
無補費精神（一本作默默註令識道真）

### 宰話

謀臣本自繫安危，賤妾何能作禍基；但願君王誅宰話，不愁  
宮裏有西施。

### 郭劬

籍交唯有不贊恩，漢法歸成棄市論；平日五陵多任俠，可能  
推刃報王孫。

### 古寺

寥寥禪寺半遺基，遊客經年斷履綦；猶有齊梁舊時殿，塵昏  
金像雨昏碑。

### 越人以幕養花，因遊其下，二首。

幕天無日地無塵，百紫千紅占得春；野草自花還自落，落時  
還有惜花人。

二

尚有殘紅已可悲，更憂回首祇空枝；莫嗟身世渾無事，睡過春風作惡時。

### 魚兒

邊岸車鳴水欲乾，魚兒相逐尚相歡；無人挈入滄江去，汝死那知世界寬。

### 離鄞至菁江東望

村落蕭條夜氣生，側身東望一傷情；丹樓碧閣無處所，祇有谿山相照明。

### 信州迴車館中作二首

太白山根秋夜靜，亂泉深水盪牀鳴；病來空館聞風雨，恰似當年枕上聲。

二

山木深搖臥弋陽，因思太白夜淋瀝；西窗一榻芭蕉雨，（一作芭蕉一枕西窗雨）復似當時水盪牀。

### 天童山溪上

王安石全集 卷三十四 律詩

溪水清澗樹老蒼，行穿溪樹踏春陽；溪深樹密無人處，唯有幽花渡水香。

### 鄞縣西亭

收功無路去無田，竊食窮城度兩年；更作世間兒女態，亂栽花竹養風煙。

### 寄和甫

水村悲喜拆書看，聞道并州九月寒；憶得此時花更好，舉家憐女不同盤。

### 寄伯兒

身留海上去何時，祇看春鴻北向飛；安得先生同一飲，蘇芽香嫩鯉魚肥。

### 別鄞女

行年三十已衰翁，滿眼憂傷祇自攻；今夜扁舟來訣汝，死生從此各西東。

### 真州馬上作

身隨飢馬日中行，眼入風沙因欲盲；心氣已勞形亦弊，自憐

於世欲何營？

### 登飛來峯

飛來山上千尋塔，聞說雞鳴見日昇；不長浮雲遮望眼，自緣身在最高層。

### 讀漢功臣表

漢家分土建忠良，鐵券丹書信誓長；本待山河如帶礪，何緣重醢賜侯王！

### 詠月

追隨落日盡還生，點綴浮雲暗又明；江有蛟龍山虎豹，清光雖在不堪行。

### 金山

怪祕陰靈與縷持，重丹複碧煥參差；滄江見底應無日，萬丈孤根世不知。

### 鬪翠亭

煙籠遠浦迷芳草，日照澄湖浸碧峯；幸有清樽甚醅酌，忍陪良友不從容。

### 默默

默默長年有所思，世間談笑強追隨；蒼髯欲出朱顏謝，更覺求田問舍遲。

### 達本

未能達本且歸根，真照無知豈待言；枯木巖前猶失路，那堪春入武陵原。

### 寓言二首

太虛無實可追尋，葉落松枝謾古今；若見桃花生聖解，不疑還自有疑心。

### 二

本來無物使人疑，卻為參禪買得癡；聞道無情能說法，面牆終日妄尋思。

### 偶書

穰侯老擅關中事，長恐諸侯客子來；我亦暮年專一壑，每逢車馬便驚猜。

### 楊子

千古雄文造聖眞，  
眈然幽思入無倫；  
他年未免投天祿，  
虛爲新都著劇秦。

### 議維摩經有感

身如泡沫亦如風，  
刀割香塗共一空；  
宴坐世間觀此理，  
維摩雖病有神通。

### 春日卽事

重北池南春水生，  
桃花深處好閑行；  
細思擾擾夢中事，  
何用悠悠身後名。

### 贈安大師

獨龍岡北第三峯，  
遺客歸來老更慵；  
敗屋數椽青嶽繞，  
冷雲深處不聞鐘。

### 送李生白華巖修道

白華巖主是金僊，  
假作山僧學道禪；  
珍重此行吾不及，  
爲傳消息結因緣。

### 寄道光大師

秋雨漫漫夜復朝，  
可嗟葺屋望重霄；  
遙知宴坐無餘念，  
萬事

都從劫火燒

### 示報寧長老

白下亭東鴨一牛，  
山林跛港淨高秋；  
新營穢穢我懷越，  
會偈布毛誰比丘。

### 紅梨

紅梨無葉庇花身，  
黃菊分香委路塵；  
歲晚蒼官纔自保，  
日高青女尙橫陳。

### 鷓鴣

依倚秋風氣象豪，  
似欺黃雀在蓬蒿；  
不知羽翼宵冥上，  
寒風相隨勢亦高。

### 驢二首

力侔龍象或難堪，  
臂比仙人亦未慙；  
臨路長鳴有真意，  
盤山弟子欠同參。

### 一一

雖得康莊亦好還，  
每逢溝壑便知難；  
由來此物非他物，  
莫道何曾似仰山。

# 卷三十五

## 挽辭

### 仁宗皇帝挽辭四首

去序三朝聖，行崩萬國天。憂勤無曠古，治洽最長年。仁育齊高厚，哀思罄幅員。欲知千載美，道德冠遺編。

#### 一一

馮几微言絕，羣臣涕泗揮。哀號三級陛，縞素九重圍。天上仙遊遠，宮中御座非。最悲帷幄侍，不復未明衣。

#### 一二

厭代人間世，收神天上游。遽然虛玉座，不復望珠旒。待且移中幘，饗人改膳羞。常飛白几兒，寂寞暗塵浮。

#### 一三

同軌羣方至，因山十月催。永違天日表，空有肺肝摧。帳殿流蘇卷，鈴歌薤露哀。宮中垂曉輅，西去不更回。

### 英宗皇帝挽辭二首

御氣方尊極，乘雲已泆寥。衣冠萬國會，陵寢百神朝。夏鼎傳歸啓，虞裳想見堯。誰當投椽筆，論德在瓊瑤。

#### 一一

玉冊上鴻名，猶殘警蹕聲。忽辭千歲祝，虛卜五年征。羽衛悲哀送，山陵指顧成。謳歌歸聖子，世孝在持盈。

### 神宗皇帝挽辭二首

將聖由天縱，成能與鬼謀。聰明初四達，俊乂盡旁求。一變前無古，三登歲有秋。謳歌歸子啓，欽念禹功修。

#### 一二

城闕宮車轉，山林隧路歸。蒼梧雲未遠，姑射霧先晞。玉暗蛟龍蟄，金寒雁鷺飛。老臣他日淚，湖海想遺衣。

### 慈聖侍獻皇后挽辭二首

國賴姜任盛，門歸馬鄧高。關雎求窈窕，卷耳念劬勞。聖淑才繼難，擬休明速遭。岡原今獻卜，惟展正樂韶。

#### 一一

崑山女德茂，京室母才難。具美多前志，餘光永後觀。遺衣遍

館御，祖職出宮。終始神孫孝，長留萬國歡。

### 正肅吳公挽辭二首

公嘗舉賢真，終河南守。  
葬則子舉進士時公知

舉。

從容邊塞議，慷慨廟堂爭。曲突非無驗，方穿有不行。縉紳終倚賴，贈槨極哀榮。豈慕公孫貴，平生學董生。

一一

應世文章手，宜民政事才。朝多側目忌，士有拊心哀。書蠹平生簡，香寒後夜灰。悠悠國西路，空得葬車回。

三

昔繼吳公治，今從子產遊。里門無舊客，鄉國有新丘。謀讓裨靈遠，文歸賈誼優。此時辜怨寵，西望涕空流。

### 文元賈公挽辭二首

功名烜赫在三朝，經術從容輔漢條。儒服早紆丞相絨，戎冠再插侍中貂。開倉六塔流人復，出甲甘陵叛黨銷。東第祇今空畫像，當時於此識風標。

二

銘旌飄颻九秋風，薤露悲歌落月中。華屋幾人思賈傅，佳城今日閉滕公。名垂竹帛書勳在，神寄丹青卷象同。天上貂蟬曾夢賜，歸魂應佩紫陽宮。

### 元獻晏公挽辭二首

文章晉康樂，經術漢公孫。舊秩疑水貴，前功保傳尊。傳呼猶在耳，會哭已填門。鷺瑟城南路，鳴笳上九原。

一一

終賈年方妙，蕭曹地已親。優游太平日，密勿老成人。抗論辭多祕，庶歌迹已陳。功名千載下，不負漢庭臣。

三

感會真奇遇，飛揚獨妙齡。他年西餞日，此夜上騎年。宿惠留藩屏，餘忠在禁庭。音容無處所，髣髴寄丹青。

### 忠獻韓公挽辭二首

心期自與衆人殊，骨相知非淺丈夫。獨幹斗杓環帝座，親扶日轂上（一作繼）天衢。鋤耄萬里山無盜，衮黼三朝國有儒。爽氣忽隨秋露盡，但留陳迹在龜趺。

一一

兩朝身與國安危，典策哀榮此一時！木稼嘗聞達官怕，山頹果見哲人萎。英姿爽氣歸圖畫，茂德元勳在鼎彝。幕府少年多白髮，傷心無路送靈輜。

### 正憲吳公挽辭

丙魏雖遭漢道昌，豈如公出值虞唐？秀鍾舊國山川氣，榮附中天日月光。更化事功參虎變，贊元時序得金穰。傷心鼓吹城南陌，回首新阡柏一行。

### 孫威敏公挽辭

功名一世事，興廢豈人謀？重爲蒼生起，終隨逝水流。淒涼歸部曲，零落掩山丘。許國言猶在，姦諛可使羞。

### 崇禧給事同年馬兄挽辭二首

慶歷公偕起，元豐我獨傷。兩楹終昔夢，五鼎繼前喪。燕獄會攀桂，甘留所憩棠。素風知不墜，能世有諸郎。

一一

藏室亡三篋，得之公最多。露晞當晚景，川逝作前波。惠寄與

人誦，悲傳挽者歌。竹西攜手處，清淚遶山河！

### 陳動之祕丞挽辭二首

年高漢賈誼，官過楚荀卿。望古君無憾，論今我未平。有風吹畫翫，無日照佳城。空復文章在，流傳世上名。

一一

人間三十六，追逐孔鸞飛。似欲來爲瑞，如何去不歸？琴樽已寂寞，筆墨尙光輝。空復平生友，西華豈易依。

### 贈工部侍郎鄭公挽辭

地蟠江漢久知靈，通德門中見老成。南去伏波推將略，北來光祿擅詩名。密章贈極連三組，畫纓喪車載一旌。陰德故應多後福，可能生子但升卿。

### 致仕虞部曲江譚君挽辭

同時獻賦久無人，握手悲歡迹已陳。它日白衣霄漢志，暮年朱紱水雲身。虛容幾几今長夜，小隱山林祇舊春。豈惜埋辭追往事，齒衰才盡獨傷神！

### 馬珪大夫挽辭

冠蓋青門道，知君自少時。從容他日喜，奄忽暮年悲。江月明丹旄，湖風冷繡帷。音容雖可想，材力竟何施。

### 宋中道挽辭

文史傳家學，聲名動帝除。蘭堂空作賦，金匱不歸書。勝事悲曠昔，清談想緒餘。吹簫索上去，歸國有魂車。

### 王中甫學士挽辭

同學金陵最少年，奏書曾用牘三千。盛名非復居人後，壯歲如何棄我先。種橘園林無舊業，採蘋洲渚有新篇。蒜山東路春風綠，埋沒誰知太守阡。

### 王逢原挽辭

萬里竟何在，死生從此分。謾傳仙掌籍，誰見鬼修文。蔡琰能傳業，侯芭爲起墳。傷心北風路，吹淚濕江雲。

### 葛興祖挽辭

憶隨諸彥附青雲，場屋聲名看出羣。孫寶暮年猶主簿，卜商今日更修文。山川凜凜平生氣，草木蕭蕭數尺墳。欲寫此哀終不盡，但令千載少知君。

### 河中使君修撰陸公挽辭二首

文采機雲後，此名實妙年。銀鉤工壯麗，金薤富清研。批鳳多新貴，凭熊數外遷。空令猗氏監，遺愛有良田。

#### 一

皖城初得故人詩，歎息龍媒晚壯時。太史滯留終不偶，中郎制作遂無施。二千石祿今何有，四十車書昔漫知。海曲冷雲埋拱木，延州空掛暮年悲。

#### 二

前旌一幅粉書名，行路知君亦涕零。遂失詞人空甫里，謾留悲鶴老華亭。主張壽祿無三甲，收拾文章有六丁。歸處仙翁終不遠，新墳東見海山青。

### 王子直挽辭

多才自合至公卿，豈料青衫困一生。太史有書能殺事，子雲於世不微名。丘墳慘淡箕山綠，門巷蕭條潁水清。握手笑言如昨日，白頭東望一傷情。

### 孫君挽辭

名適



喪車上新塋，哀挽轉空山。名與碑長在，魂隨帛暫還。無兒漫  
黃卷，有母亦朱顏。俛仰平生事，相看一夢間。

### 處士葛君挽辭

楚人黃歇地，晉代葛洪家。特擅山川秀，相承黼冕華。猗君有  
清尚，於世不雍夸。令子能傳業，流光未可涯。

### 永壽縣太君周氏挽辭

鄂忠臣母

永壽開新邑，長沙返舊營。金瓶冷細軸，粉字暗銘旌。藹久露  
難濕，蘭餘風尚清。慶鍾知有在，令子合升卿。

二

子引金閨籍，身開石窹封。靈輜悲吉路，象服儼虛容。楚挽雖  
多相，萊衣不更縫。誰知逝川底，自喜相逢。

### 致仕邵少卿挽辭二首

謝眺城中守，梁鴻墓下歸。素車馳吉路，丹旆卷寒輝。撫几虛  
容在，曠圖實貌非。無因置一酌，空此嘆長違。

二

杯酒邗溝上，紛紛已十年。音容常想見，風跡每流傳。老去元

卿位，新開太守阡。慶門當更大，子弟固多賢。

### 葛郎中挽辭二首

卷卷總帷輕，空堂畫哭聲。衣冠遺故日，杯案若平生。白馬有  
悲送，赤車非古行。低徊九原日，光景在銘旌。

二

蠻荆長往地，湖海獨歸時。旅魄蛟龍護，銘旌雁鷺隨。此生要  
有盡，何物告無期。一片幽堂石，公知我不欺。

### 悼王致處士

處士生涯水一瓢，行年七十更蕭條。老妻榻下分遺粟，弱子  
松間拾墮樵。豈有聲名高後世，遂無體粥永今朝。窮魂散漫知何  
處，甬水東西不可招。

### 蘇才翁挽辭二首

空餘一丹旌，無復兩朱轡。寂寞蒜山渡，跛陀京口原。音容歸  
繪畫，才業付兒孫。尚有故人淚，滄江相與翻。

二

翰墨隨談嘯，風流在弟兄。浮名同逆旅，壯志負平生。使節何

年去，喪車故老迎。悠悠京口外，落日照銘旌！

### 悼慧休

休公遂不起，難料復難忘；玉骨隨薪盡，空留一分香！

## 卷三十六

### 集句

古律詩

### 送吳顯道五首

五湖大浪如銀山，問君西遊何當還？以手撫膺坐長歎，空手無金行路難！丈夫意有在，吾徒且加餐。屏風九疊雲錦張，千峯如連環。上有橫河斷海之浮雲，可望不可攀。飛空結樓臺，動影震窅冲融間。沛然華天遊，下看塵世悲人寰！泊舟潯陽郭，去去翔寥廓。君今幸未成老翁，衰老不復如今樂！

一一

滕王高閣臨江渚，東邊日出西邊雨。十五年前此會同，天際張帷列樽俎。公今此去何時歸？我今停杯一問之。春風兩岸水楊柳，昔日青青今在否？偶向東湖更向東，杏花兩株能白紅。落拓舊遊應記得，插花走馬月明中。荏苒荏苒瞻西海，明年花開復誰在！

杏花楊柳年年好，南去北來人自老。少壯幾時奈老何，與君把箸擊盤歌。歌罷仰天歎，六龍忽蹉跎。眼中了了見鄉國，自是不歸歸便得。欲往城南望城北，此心炯炯君應識！

三

臨川樓上柁園中，羅幃繡幕圍香風。舫船一棹百分空，看朱成碧顏始紅。杏花楊柳年年好，南去北來人自老。舊事無人可共論，惟君與我同懷抱！

四

忽憶舊鄉頭已白，牙齒欲落真可惜！臨江把臂難再得，江水江花豈終極！

五

百年多病獨登臺，知有歸日眉放開。功名富貴何足道，且賦淵明歸去來。

### 送吳顯道南歸

君不見蔡澤栖遲世看醜，豪氣英風亦何有？忽然變軒昂，盛事傳不朽。君今幸未成老翁，二十八宿羅心胸。何不上書自薦達，封侯起第一日中。秋月春風等閑度，山中舊宅無人住。宅中青桑

藥宛宛，澗水流過田中路。遙知楊柳是門處，萬里蒼蒼煙水暮。我欲尋之不憚遠，君又暫來還徑去。紅亭驛路掛城頭，惜君祇欲苦死留。天際張帷列罍俎，君歌聲酸辭且苦。人生憔悴生理難，使人聽此凋朱顏。勸君更盡一杯酒，明日路長山復山。

### 送劉貢甫謫官衡陽

劉郎劉郎莫先起，遇酒當歌且歡喜。船頭朝轉暮千里，眼中之人吾老矣。九疑聯縣皆相似，負雪崔嵬插花裏。萬里衡陽雁尋常到此迴，行逢二三月，好與雁同來。雁來人不來，如何不飲令心哀。莫厭瀟湘少人處，謫官罍俎定常開。

### 贈寶覺

并序

予始與寶覺相識於京師，因與俱東。後以翰林學士召，會宿金山。一昔今復見之，聞化城閣甚壯麗，可登眺，思往遊焉，故賦是詩。

大師京國舊，興趨江湖迴。往與惠詢輩，一宿金山頂。懷哉若留戀，王事有朝請。別來能幾時，淨念劇含哽。今朝忽相見，眸子清炯炯。夜闌接軟語，令人發深省。化城出天半，遠色有諸嶺。白首對汀洲，猶思理煙艇。

### 金山寺

招提憑高閣，四面斷行旅。勝地猶在險，浮梁裏相拄。大江當我前，颯灑翠綃舞。通流與廚會，甘美勝牛乳。扣欄出鼉鼉，幽姿可時視。夜深殿突兀，太微凝帝宇。壁立兩崖對，迢迢隔雲雨。天多曠得月，月落聞津鼓。夜風一何喧，大舶夾雙鷁。顛沉在須臾，我自檝迎汝。始知像教力，但度無所苦。憶昨狼狽初，只見石與土。榮華一朝盡，土梗空俯俚。人事隨轉燭，蒼茫竟誰主。咄嗟檀施開，繡楹盤萬礎。高閣切星辰，新秋照牛女。湯休起我病，轉上青天去。擲身凌蒼霞，同覓朱欄語。我歌爾其聆，幽憤得一吐。誰言張處士，雄筆映千古。

### 化城閣

會宮憑風回，兩岸聞鐘聲。百里見秋毫，（一作鑿翠開戶牖）構雲有高營。化城若化出，仰攀日月行。俛視大江奔，衆山遙相迎。（一作茫茫與天平）大江蟠嵌根，旋流（一作回波）自成浪。卻略羅翠屏，秀色各異狀。楞伽海中山，迴（一作杏）出霄漢上。中有不死庭，天龍盡回向。惜哉不得往，側坐渺難望。擁掩難恕有，（一作登茲翻百憂）意欲鏘疊嶂。登臨獨無語，一望一招恨。（一本無此二句）忽憶少年時，孤嶼坐題詩。空懷焉能果，唯有故人知。

### 明妃曲

我本漢家子，早入深宮裏。遠嫁單于國，憔悴無復理。穹廡爲  
室旃爲牆，胡塵暗天道路長。去住彼此無消息，明明漢月空相識。  
死生難有卻回身，不忍回看舊寫真。玉顏不是黃金少，愛把丹青  
錯畫人。朝爲漢宮妃，暮作胡地妾。（一作今日漢宮妃，明朝胡地  
妾。）獨留青塚向黃昏，顏色如花命如葉。

### 懷元度四首

秋水纔深四五尺，扁舟斗轉疾於飛；可憐物色阻攜手，正是  
歸時君不歸。

### 一一

舍南北皆春水，恰似蒲萄初釀醅；不見祕書心若失，百年  
多病獨登臺。

### 三二

思君攜手安能得，上盡重城更上樓；時獨看雲淚橫臆，長安  
不見使人愁。

### 四

自君之出矣，何其挂懷抱；孤坐屢窮辰，山林跡如掃。數枝石  
榴發，豈無一時好？不可持寄君，思君令人老。

王安石全集 卷三十六 集句

### 招元度

早知皆（一作身）是自拘囚，年少因何（一作何因）有  
旅愁？自是不歸歸便得，陸乘肩輿（一作籃輿）水乘舟。

### 示黃吉甫

三山半落青天外，勢比凌歊宋武臺；盛世難逢開口笑，生前  
相遇且銜杯。

### 送張明甫

舫船一棹百分空，十五年前此會同；南去北來人自老，桃花  
依舊笑春風。

### 贈張軒民贊善

湖打空城寂寞迴，百年多病獨登臺；誰人得似張公子，有底  
忙時不肯來。

### 望之將行

江涵秋景雁初飛，沙尾長橋發漸稀；惆悵無因見范蠡，夕陽  
長送釣船歸。

### 招葉致遠

山桃野杏兩三栽，嫩葉（一作藥）商量細細開；最是一年春好處，明朝有意抱琴來。

### 獨行

朱顏日夜（一作漸）不如故，深感杏花相映紅；盡日獨行春色裏，醉吟誰肯伴衰翁！

### 江口

六朝文物草連空，今古無端入望中；江上晚來堪盡處，參差煙樹五湖東。

### 戲贈洪源

恰有三百青銅錢，憑君爲算小行年；坐中亦有江南客，自斷此生休問天。

### 與北山道人

可惜昂藏一丈夫，生來不讀半行書；子雲獻字終投閣，幸是元無免破除。

### 梅花

白玉堂前一樹梅，爲誰零落爲誰開；唯有春風最相惜，一年

一度一歸來。

### 卽事五首

漸老逢春能幾回，蓬門今始爲君開；莫嫌野外無供給，更向花前把一杯。

#### 一

一樹籬籬玉刻成，遊蜂多思正經營；攀枝弄雪時回顧，還繞櫻桃樹下行。

#### 二

幽棲地僻經過少，鐘梵聲中掩竹門；唯有多情枝上雪，暗香浮動月黃昏。

#### 三

遮莫鄰雞下五更，願爲閑客此閑行；欲知前面花多少，顛倒青苔落絳英。

#### 四

春光冉冉歸何處，細雨斜風作夜寒；猶有數葩紅好處，老年花似霧中看。

#### 五

## 春風

春風吹闌雜花開，青天露坐始此迴。一杯一杯復一杯，笑言溢口何歡哈。古人白骨生青苔，我獨不飲何爲哉。何時出得禁酒國，豈麪便築糟戶臺。

## 春雪

春雪墮如糝，渾家醉不知。泥留虎鬪跡，愁殺路傍兒。

## 花下

花下一壺酒，定將誰舉杯。雪英飛落近，疑是故人來。

## 春山

春山春水流，曲折方屢渡。荒乘不知疲，行到水窮處。依然舊童子，要予竹西去。歸時始覺遠，草萋已多露。

## 金陵懷古

六代豪華空處所，金陵王氣漠然收。煙濃草遠望不盡，物換星移幾度秋。至竟江山誰是主，卻因歌舞破除休。我來不見當時事，上盡重城更上樓。

沈坦之將歸溧陽，值雨，留吾廬久之。

### 三首

一 天雨蕭蕭滯茅屋，冷猿秋雁不勝悲。牀屋漏無乾處，獨立蒼茫自詠詩。

### 二

簷雨亂淋幔，風悲蘭杜秋。相看更促膝，人老自多愁。

### 三

片雲頭上黑，淅淅野風秋。室婦歎鳴鶴，分爲兩地愁。

## 示蔡天啓二首

一 蔡子勇成癖，能騎生馬駒。銛鋒瑩鸚鵡，價重百碑礫。脫身事幽討，禪龕只晏如。劃然變軒昂，慎勿學哥舒。

### 二

蔡子勇成癖，劍可萬人敵。讀書百紙過，穎銳物不隔。開口取將相，志氣方自得。偃仄何偃仄，未見有一獲。鴟條兩翅蓬蒿下，未能生彼升天翼。焉能學堂上燕，綉練新羽翮。

### 三

身著青衫騎惡馬，日馳三百尙嫌遲；心源落落堪爲將，卻是君王未備知。

### 烝然來思

井序

烝然來思，送程公也。公來以薨，饗饋我，我飲餞之，宿西水滸，故作是詩。

念我獨兮，亦莫我顧。烝然來思，程伯休父。我有旨酒，兩設伊脯。酌言醕之，式歌且舞。不留不處，適彼樂土。言秣其馬，率西水滸。有客宿滸，于時語語。山有喬松，江有渚式。溢其歸，不我與。作此好歌，唱予和女。

### 示楊德逢

我行其野，春日遲遲。有覺者柳，在水之涓。有鳴者庚，豈曰不時。求其友聲，頡之頡之。嗟我懷人，何日忘之。六日詹詹，方何爲期。期逝不至，我心四悲。跂予望之，其室則邇。一者之來，我心則喜。我之懷矣，升彼虛矣。愛而不見，云何吁矣。

### 示道光及安大師

春日載陽，陟彼高岡。樂彼之園，維水泱泱。維筍及蒲，既生既育。拏飛維鳥，集於灌木。嚶其鳴矣，亂我心曲。有懷二人在彼空谷。既往既來，獨寐寤宿。陟則在巖，或降於阿。瞻望弗及，傷如之何。

### 老人行

老人低心逐年少，年少還爲老人調。兩家挾詐自相欺，四海傷真誰復詭。翻手作雲覆手雨，當面論心背面笑。古來人事已如此，今日何須論久要。

### 離昇州作

相看不忍發，慘澹暮潮平；語罷更攜手，月明洲渚生。

### 倉頡

倉頡造書，不詰自明。於乎多言，祇誤後生。

## 卷三十七

### 集句

### 胡笳十八拍十八首

中郎有女能傳業，顏色如花命如葉。命和葉薄將奈何，一生抱恨常咨嗟。良人持戟明光裏，所慕靈妃嬋嬋史。空房寂寞施施，帷棄我不待白頭時。

一一

天不仁兮降亂離，嗟余去此其從誰？自胡之反持干戈，翠蘿雲梢相蕩靡。流星白羽腰間插，鼙鼓遙翻瀚海波。一門骨肉散百草，安得無淚如黃河！

一二

身執略兮入西關，闕山阻修兮行路難。水頭宿兮草頭坐，在野只教心力破。更備彫鞍教走馬，玉骨瘦來無一把。幾迴拋鞍抱鞍橋，往往驚墮馬蹏下。

一三

漢家公主出和親，御廚絡繹送八珍。明心初嫁與胡時，一生衣服盡隨身。眼長看地不稱意，同是天涯淪落人。我今一食日還供短衣數挽不掩脛，乃知貧賤別更苦，安得康強保天性？

一四

十三學得琵琶成，繡幕重重卷畫屏。一見郎來雙眼明，勸我酌酒花前傾。齊言此夕樂未央，豈知此聲能斷腸。如今正南看北斗，言辭傳情不如手。低眉信手續續彈，彈看飛鴻勸胡酒。

一五

青天漫漫覆長路，一紙短書無寄處。月下長吟久不歸，當時還見雁南飛。彎弓射飛無遠近，青塚路邊南雁盡。兩處音塵從此絕，唯向東西望明月！

一六

明明漢月空相識，道路只今多擁隔。去住彼此無消息，時獨看雲淚橫臆。豺狼喜怒難姑息，自倚紅顏能騎射。千言萬語無人會，漫倚文章真末策。

一七

死生難有卻回身，不忍重看舊寫真。暮去朝來顏色改，四時天氣總愁人。東風漫漫吹桃李，盡日獨行春色裏。自經喪亂少睡眠，鸞飛燕語長悄然。

一八

柳絮已將春去遠，攀條弄芳畏日晚。憂患衆兮歡樂鮮，一去可憐終不返。日夕思歸不得歸，山川滿目淚沾衣。暮生苑裏西風起，歎息人間萬事非！

一九



寒夜一聲傳刁斗，雲雪埋山蒼兒吼。詩成吟詠轉淒涼，不如獨坐空搔首。漫漫胡天叫不聞，胡人高鼻動成羣。寒盡春生洛陽殿，回首何時復來見。

十一

晚來幽獨恐傷神，唯見沙蓬水柳春。破除萬事無過酒，虜酒千盃不醉人。含情欲說更無語，一生長懼奈何許。飢對酪肉兮不能餐，強來前帳臨歌舞。

十二

歸來展轉到五更，起看北斗天未明。秦人築城備胡處，擾擾唯有牛羊聲。萬里飛蓬映天過，風吹漠地衣裳破。欲往城南望城北，三步回頭五步坐。

十三

自斷此生休問天，學得胡兒擬棄捐。一始扶牀一初坐，抱攜撫視皆可憐。寧知遠使問名姓，引袖拭淚悲且慶。悲莫悲兮生別離，悲在君家留兩兒。

十四

鞠之育之不羞恥，恩情亦各言其子。天寒日暮山谷裏，腸斷

非關隴頭水。時呼母兮嗷失聲，依然離別難爲情。灑血仰頭兮訴蒼蒼，知我如此兮不如無生。

十五

當時悔來歸又恨，洛陽宮殿焚又盡。紛紛黎庶逐黃巾，心折此時無一寸。慟哭秋原何處村，千家今有百家存。爭持酒食來相饋，舊事無人可共論。

十六

此身飲罷無歸處，心懷百憂復千慮。天翻地覆誰得知，魏公垂淚嫁文姬。天涯憔悴身，託命於新人。念我出腹子，使我歎懼勞精神。新人新人聽我語，我所思兮在何所。母子分離兮意難任，死生不相知兮何處尋。

十七

燕山雪花大如席，與兒洗面作光澤。悅然天地半欲白，閨中祇是空相憶。點注桃花舒小紅，與兒洗面作華容。欲問平安無使來，桃花依舊笑春風。

十八

春風似舊花仍笑，人生豈得長年少。我與兒兮各一方，憔悴

看成兩鬢霜。如今豈無腰裏與驪駒，安得送我置汝傍？胡塵暗天，道路長，隨令再往之計，墮渺茫。胡笳本出自胡中，此曲哀怨何時終？第一會兮琴一拍，此心炯炯君應識！

### 虞美人

虞美人，態濃意遠淑且真。同聲隨君侍君側，六宮粉黛無顏色。楚歌四面起，形勢反蒼黃。夜聞馬嘶曉無迹，蛾眉蕭颯如秋霜。漢家離宮三十六，緩歌慢舞凝絲竹。人間舉眼盡堪悲，獨在陰崖結茅屋。美人爲黃土，草木皆含愁。紅房紫苔處處有，聽曲低昂如有求。青天漫漫覆長路，今人犁田昔人墓。虞兮虞兮奈若何，不見玉顏空死處。

### 甘露歌

折得一枝香在手，人間應未有。疑是經春雪未消，今日是何朝。盡日含毫難比興，都無色可並。萬里晴天何處來，真是解瓊瑰。天寒日暮山谷裏，的皪愁成水。地上漸多枝上稀，唯有故人知。

### 桂枝香

歌曲

登臨送目，正故國晚秋，天氣初肅。千里澄江似練，翠峯如簇。歸帆去棹殘陽裏，背西風酒旗斜矗。採舟雲淡，星河鷺起，畫圖難足。念往昔繁華競逐，歎門外樓頭，悲恨相續。千古憑高，對此謾

嗟榮辱。六朝舊事隨流水，但寒煙芳草凝綠。至今商女，時時猶歌後庭遺曲。

### 菩薩蠻

數家茅屋閉臨水，單衫短帽垂楊裏。今日是何朝？看予度石橋。梢梢新月偃，午醉醒來晚。何物最關情？黃鸝一兩聲。

### 漁家傲二首

燈火已收正月半，山南山北花撩亂。聞說洴亭新水漫，騎款段，穿雲入鳥尋遊伴。卻拂僧牀裹素幔，千巖萬壑春風暖。播弄松聲悲急筦，吹夢斷，西看臆日猶嫌短。

### 二

平岸小橋千嶂抱，柔藍一水縈花草。茅屋數間窺窈窕，塵不到，時時自有春風掃。午枕覺來聞語鳥，欲眠似聽朝雞早。忽憶故人今總老，貪夢好，茫然忘却邯鄲道。

### 清平樂

雲垂平野，掩映竹籬茅舍；閨寂幽居實瀟灑，是處綠嬌紅冶。丈夫運川堂堂，且莫五角六張；若有一卮芳酒，迢遞自在無妨。

### 浣溪沙

百畝中庭半是苔，門前白道水萊迥。愛閑能有幾人來？小  
院回廊春寂寂，山桃溪杏兩三栽。為誰零落為誰開？

### 浪淘沙令

伊呂兩衰翁，歷遍窮通。一為釣叟一耕傭。若使當時身不遇，  
老了英雄。湯武偶相逢，風虎雲龍。興王祇在笑談中。直至如今  
千載後，誰與爭功？

### 南鄉子二首

嗟見世間人，但有繞毫卽是塵。不住舊時無相見，沉淪，祇爲  
從來認識神。作麼有疎親？我自降魔轉法輪。不是搆心除妄想，  
求真，幻化空身卽法身。

### 二

自古帝王州，鬱鬱葱葱佳氣浮。四百年來成一夢，堪愁，晉代  
衣冠成古丘。繞水恁行遊，上盡層城更上樓。往事悠悠君莫問，  
回頭，檻外長江空自流。

### 訴衷情五首

和俞秀  
老鮑韻

常時黃色見眉間，松桂我同攀。每言天上辛苦，不肯餌金丹。  
憐水靜，愛雲閑，便忘還。高歌一曲，巖谷迢遞，宛似商山。

### 一

練巾藜杖白雲間，有興卽躋攀。追思往昔如夢，華轂也曾丹。  
塵自擾，性長閑，更無還。達如周召，窮似丘軻，祇箇山山。

### 三

茫然不肯口林間，有處卽追攀。將他死語圖度，怎得離真丹。  
藥水價匹如閑，也須還。何如直截，踢倒軍持，贏取潑山。

### 四

營巢燕子逞翱翔，微志在雕梁。碧雲舉翮千里，其奈有鸞皇。  
臨濟處，德山行，果承當。自時降住，一切天魔，掃地焚香。

### 五

莫言普化祇顛狂，眞解作津梁。豁然打箇筋斗，直跳過羲皇。  
臨濟處，德山行，果承當。將他建立，認作心誠，也是尋香。

### 望江南歸依三寶讚

歸依衆，梵行四威儀。願我遍遊諸佛土，十方賢聖不相離，永

滅世間癡

歸依法，法法不思議，願我六根常寂靜，心如寶月映琉璃，了法更無疑

歸依佛，彈指越三祇，願我速登無上覺，還如佛坐道場時，能智又能悲

三界裏，有取總災危，普願衆生同我願，能於空有善思惟，三賢共扶持

# 卷三十八

四言詩 古賦 樂章 上梁文 銘

讚

## 譚州新學詩

井序

治平元年，天章閣待制興國吳公，治潭州之明年正月，改築廟學於城東南，越五月，告成。孔子用幣，潭人曰：「公爲善政以德，我又不勸我而爲此學，以嘉我士子，誰能詩乎？」以誦我公於無窮，皆辭不敢，乃使來請詩曰：

有嘉新學，潭守所作。守者誰歟？仲庶氏吳。振養矜寒，衣之襪。櫛黔首，鼓歌吏，靜不求，乃相廟序。生師所廬，上漏旁穿，燥濕不除。日噴遷蔽，迫陋卑污。當其壞時，適可以謀。營地慮工，伐榱相楹。撤

故就新，爲此渠渠。潭人來止，相語而喜。我知視成，無豫經始。公升在堂，從者如水。公曰：「誨汝潭之士子，古之讀書，凡以爲己躬行孝悌，由義而仕，神聽汝助，况於閭里無實而孝，非聖自是。雖大得意，吾猶汝恥。士下其手，公言無尤。請詩我歌，以遠公休！」

## 新田詩

井序

唐治四縣，田之人於草莽者十九，民如寄客。雖簡其賦，緩其徭，而不可以必留。尙書比部郎中趙君尙寬之來，問敞於民，而知其故。乃委推官張君恂以兵士，與大渠之廢者一，大陂之廢者四，諸小渠陂，教民自爲者數十。一年流民作而相告以歸，二年而淮之南湖之北，操囊耜以率其妻子者，其來如雨；三年而唐之士不可賤取。昔之菽粟者，多化而爲稌。環唐皆水矣，唐獨得歲焉。船漕車輓，負擔出於四境，一日之間，不可爲數。唐之私裏固有餘，循吏之無稱於世久矣。予聞趙君如此，故爲作詩。詩曰：

離離新田，其下流水。孰知其初，灌莽千里。其南背江，其北逾淮。父抱子扶，十百其來。其來僕僕，饑我新屋。趙侯劬之，作者不饑。歲仍大熟，飽及雞鶩。儻船與車，四鄙出穀。今游者處，昔止者流。維昔牧我，不如今侯。侯來適野，不有觀者。稅於水濱，問我饑寒。侯其歸矣，三歲於茲。誰能止侯，我往求之。

## 獵較詩

井序

獵較，刺時也。昔孔子仕於魯，魯人獵較，孔子亦獵較。或問乎孟軻曰：「孔子之仕，非事道歟？」曰：「事道也。」事道奚獵較也？曰：孔子先薄正祭器，不以四方之食供薄正。不獵較，則若無以祭。然蓋孔子所以小同於俗，猶有義也。義固在於可為之域，而後之人習於隨者，一不權以義之可否，汙身貶道，豫然以和衆自得，甚者傷人倫，敗風俗，至於無號，則諉曰：孔子亦嘗獵較矣。悲夫！作是詩以刺焉。

獵較，獵較，誰禽我有國人之憚，君子所醜。獵較獵較，祭占其祥。國人之序，君子何傷？

### 雲之祁祁答董傳

雲之祁祁，或雨於淵。苗之翹翹，或槁於田。雲之祁祁，或雨於野。有槁於田，豈不自我？奮兮其隴，其在西郊。匪我為之，我歌且謠。爵兮其復，南山之側。我歌且謠，維以育德！

### 龍賦

龍之為物，能合能散，能潛能見，能弱能強，能微能章。惟不可見，所以莫知其鄉；惟不可畜，所以異於牛羊。變而不可測，動而不可馴，則常出乎害人而未始出乎害人。夫此所以為仁，為仁無止，則常至乎喪己而未始至乎喪己。夫此所以為智，止則身安，曰：「惟知幾。」動則物利，曰：「惟知時。」然則龍終不可見乎？曰：「與

為類者，常見之。」

### 歷山賦

并序

餘抗縣人，有與季父爭田於縣，於州於轉運使，不直。提點刑獄，令余來直之。將歸，閱然望歷山而賦之。歷山在縣西上虞縣界中，或曰舜所耕云。

歷山之峩峩兮，予汝耕之，孰汝疆之？此匪予私云然兮，誰汝使？人之子兮，余師歷山之峩峩兮，則維其常人之子兮，云曷而亡？云曷而亡兮，我之思，今孰繼兮我之悲，嗚呼已矣兮，來者為誰？

### 思歸賦

蹇吾南兮安之，莽吾兮親之思。朝吾舟兮水波，暮吾馬兮山阿。亡濟兮維夷，夫孰驅兮亡羸。風條兮來去，日翳兮溟濛之雨。萬物紛披，蕭索兮歲逶迤。其今暮兮，吾感不知夫塗兮，徘徊傍徨以反顧。盍歸兮，盍去兮，獨何為乎此旅？

### 釋謀賦

雲冥冥兮蔽日，風浩浩兮吹沙出。予馳兮不得，塊獨處兮咨嗟。嗟天地兮無窮，暑與寒兮相客。以短褐兮憂親，孰知予兮孔棘。維抱關兮擊柝，乃予仕兮所宜。祿可辭兮，倘冒養孰割兮方虧。豈

苦事分固拙寧我辰分獨悖。信物默分有制，尙可俟分內外。

### 明堂樂章二首

#### 歆安之曲

穆穆在堂，肅肅在庭。於顯辟公，來想思成。神既歆止，有聞惟馨。錫我休嘉，燕及羣生。

#### 皇帝還大次憩安之曲

有奕明堂，萬方時會。宗予聖考，作帝之配。樂酌虞典，禮從周制。釐事既成，於皇來暨。

### 景靈宮修蓋英宗皇帝神御殿上梁

#### 文

兒郎偉，天都左界，帝室中經。誕惟仙聖之祠，夙有神靈之宅。闢開宏構，追奉辟容。方將廣舜孝於無窮，豈特尚漢儀之有舊。先皇帝道該五泰，德貫二儀。文摛雲漢之章，武布風霆之號。華夏歸仁而砥風，蠻夷馳義以駿奔。清蹕甫傳，靈輿忽往。超然姑射，山無一物之疵。邈矣壽丘，臺有萬人之畏。已葬鼎湖之弓劍，將游高廟之衣冠。今皇帝孝奉神明，恩涵動植。纂禹之服，期成萬世之功。見繞於葵，未改三年之政。乃眷熏修之吉壤，載營館御之新宮。考協

前奔，迹追先志。孝嚴列峙，寢門可象於平居。廣拓旁開，輦路故存於陳迹。官師肅給，斤築隆施。揆吉日以庀徒，舉修梁而考室。敢申善頌，以相歡語。

兒郎偉，拋梁東，聖主迎陽坐禁中。明似九天昇曉日，恩如萬國轉春風。

兒郎偉，拋梁西，瀚海兵銷太白低。王母玉環方自獻，大宛金馬不須齎。

兒郎偉，拋梁南，內地星高每歲占。千障滅烽開嶺徼，萬艘輸寶引江潭。

兒郎偉，拋梁北，邊城自此無鳴鏑。卽看呼韓渭上朝，休務賢憲燕然勒。

兒郎偉，拋梁上，彷彿神遊今可想。風馬雲車世世來，金與玉笋年年享。

兒郎偉，拋梁下，萬靈隳社扶宗社。天垂嘉種已豐年，地產珍符方極化。

伏願上梁之後，聖躬樂豫，寶命靈長。松茂獻兩宮之壽，椒繁占六寢之祥。宗室蕃維之彥，朝廷表幹之良。家傳慶譽，代襲龍光。肩一心而顯相，保饋祀之無疆。皇帝萬歲。

### 蔣山鐘銘

於皇正覺，訓用音聞。肆作大鐘，以警沉昏。

### 明州新刻漏銘

戊子王公始治於明。丁亥孟冬，刻漏具成。追謂屬人，嗟汝予銘！自古在昔，聖靈有職。匪器則弊，人亡政息。其政謂何？弗棘弗遲。君子小人，興息維時。東方未明，自公召之。彼寧不勤，得罪於時。厥覺懈廢，乃政之疵。嗚呼有州，謹哉維茲。茲惟其中，俾我後思。

### 伍子胥廟銘

予觀子胥，出死亡遺竄之中，以客寄之一身，卒以說吳，折不測之楚。仇報恥雪，名震天下，豈不壯哉！及其危疑之際，能自慷慨，不顧萬死，畢諫於所事，此其才與夫自恕以偷一時之利者異也。孔子論古之士大夫，若管夷吾、臧武仲之屬，苟志於善，而有補於當世者，咸不廢也。然則子胥之義，又曷可少耶！康定二年，予過所謂胥山者，周行廟庭，嘆吳亡千有餘年，事之興壞廢革者，不可勝數。獨子胥之祠，不徙不絕，何其盛也。豈獨神之事吳之所興，蓋亦子胥之節，有以動後世而愛尤在於吳也。後九年，樂安蔣公為杭，使其州人力而新之，余與為銘也。

烈烈子胥，發節窮逋，遂為冊臣，奮不圖軀。謀合謀行，隆隆之吳，厥廢不遂。邑都俄墟，以智死昏，忠則有餘。胥山之頽，殿屋渠渠。千載之祠，如祠之初。孰作新之，民勸而趨。維忠肆懷，維孝肆孚。我銘祠庭，示後不誣。

### 璨公信心銘

湧彼有流，載浮載沉。為可以濟，一壺千金。法譬則水，窮之彌深。璨公所傳，等觀初心。

### 蔣山覺海元公真讚

賢哉人也！行廣而容寂，知言而能默。譽榮弗喜，辱毀弗戚。弗矜弗克，人自稱德。有緇有白，自南自北。弗勾弗逆，弗抗弗仰。弗觀汝華，惟食已定。孰其嗣之，我有遺則。

### 梵天畫讚

梵天尙實，厥乘孔雀。難知時語，鈴戒沈濁。崎身黃衣，於淨無著。乃持赤幡，歸趣正覺。

### 維摩像讚

是身是像，無有二相。三世諸佛，亦如是像。若取真實，還成虛妄。應持香花，如是供養。

### 空覺義示周彥真

覺不徧空而迷，故曰覺迷。空不徧覺而頑，故曰空頑。空本無頭，以色故頭。覺本無迷，以見故迷。

# 卷三十九

書疏

## 上仁宗皇帝言事書

臣愚不肖，蒙恩備使一路，今又蒙恩召還闕廷，有所任屬，而當以事歸報陛下。不自知其無以稱職，而敢緣使事之所及，冒言天下之事。伏惟陛下詳思而擇其中，幸甚。臣竊觀陛下有恭儉之德，有聰明睿智之才，夙興夜寐，無一日之懈，聲色狗馬，觀游玩好之事，無纖介之蔽，而仁民愛物之意，孚於天下，而又公選天下之所願以爲輔相者，屬之以事，而不貳於讒邪傾巧之臣。此雖二帝三王之用心，不過如此而已。宜其家給人足，天下大治，而效不至於此。願內則不能無以祗稷爲憂，外則不能無懼於夷狄，天下之財力日以困窮，而風俗日以衰壞，四方有志之士，譏譏然常恐天下之久不安，此其故何也？患在不知法度故也。今朝廷法嚴令具，無所不有，而臣以謂無法度者何哉？方今之法度，多不合乎先王之政故也。孟子曰：「有仁心仁聞，而澤不加於百姓者，爲政不法於先王之道故也。」以孟子之說，觀方今之失，正在於此而已。夫以今之世，去先王之世遠，所遭之變，所遇之勢不一，而欲一一修先王之政，雖甚愚者猶知其難也。然臣以謂今之失，患在不法

先王之政者，以謂當法其意而已。夫二帝三王，相去蓋千有餘載，一治一亂，其盛衰之時具矣，其所遭之變，所遇之勢，亦各不同。其施設之方，亦皆殊，而其爲天下國家之意，本末先後，未嘗不同也。臣故曰：「當法其意而已。」法其意，則吾所改易更革，不至乎傾駭天下之耳目，驚天下之口，而固已合乎先王之政矣。雖然，以方今之勢揆之，陛下雖欲改易更革天下之事，合於先王之意，其勢必不能也。陛下有恭儉之德，有聰明睿智之才，有仁民愛物之意，誠加之意，則何爲而不成，何欲而不得？然而臣願以謂陛下雖欲改易更革天下之事，合於先王之意，其勢必不能者何也？以方今天下之人才不足故也。臣嘗試竊觀天下在位之人，未有乏於此時者也。夫人才乏於上，則有沈廢伏匿在下，而不爲當時所知者矣。臣又求之於閭巷草野之間，而未見其多焉。豈非陶冶而成之者，非其道而然乎？臣以謂方今在位之人才不足者，以臣使事之所及，則可知矣。今以一路數千里之間，能推行朝廷之法令，知其所緩急，而一切能使民以修其職事者，甚少而不才苟簡貪鄙之人，至不可勝數。其能講先王之意，以合當時之變者，蓋閭郡之間往往而絕也。朝廷每一令下，其意雖善，在位者猶不能推行，使膏澤加於民，而吏軋緣之爲姦，以擾百姓。臣故曰：「在位之人才不足，而草野閭巷之間亦未見其多也。」夫人才不足，則陛下雖欲改易更革天下之事，以合先王之意，大臣雖有能當陛下之意而欲領此者，九州之大，四海之遠，孰能稱陛下之旨，以一一推行



此而人人懷其施者乎？臣故曰：「其勢必未能也。」孟子曰：「徒法不以自行，」非此之謂乎？然則方今之急，在於人才而已。誠能使天下之才衆多，然後在位之才，可以擇其人而取足焉。在位者得其才矣，然後稍視時勢之可否，而因人情之患苦，變更天下之弊法，以趨先王之意，甚易也。今之天下，亦先王之天下，先王之時，人才皆衆矣，何至于今而獨不足乎？故曰：陶冶而成之者，非其道故也。商之時，天下嘗大亂矣，在位貪毒禍敗，皆非其人，及文王之起，而天下之才嘗少矣。當是時，文王能陶冶天下之士，而使之皆有士君子之才，然後隨其才之所有而官使之。詩曰：「豈弟君子，遐不作人。」此之謂也。及其成也，微賤且亶之人，猶莫不好德，龜亶之詩是也。又况於在位之人乎？夫文王惟能如此，故以征則服，以守則治。詩曰：「奉璋峨峨，髦士攸亶。」又曰：「周王于邁，六師及之。」言文王所用文武，各得其才而無廢事也。及至夷厲之亂，天下之才又嘗少矣。至宣王之起，所與圖天下之事者，仲山甫而已。故詩人歎之曰：「德輶如毛，維仲山甫舉之，愛莫助之。」蓋閔人士之少，而山甫之無助也。宣王能用仲山甫，推其類以新美天下之士，而後人才復衆。於是內修政事，外討不庭，而復有文武之境土。故詩人美之曰：「薄言采芣，于彼新田，于此畝畝。」言宣王能新美天下之士，使之有可用之才，如農夫新美其田而使之有可采之芣也。由此觀之，人之才未嘗不自人主陶冶而成之者。所謂陶冶而成之者何也？亦教之養之，取之任之，有其道而已。

所謂教之之道何也？古者天子諸侯，自國至於鄉黨，皆有學，博置教導之官，而嚴其選，朝廷禮樂刑政之事，皆在於學。士所觀而習者，皆先王之法言德行，治天下之意，其材亦可以為天下國家之用。苟不可以為天下國家之用，則不教也；苟可以為天下國家之用者，則無不在於學，此教之之道也。所謂養之之道何也？饑之以財，約之以禮，裁之以法也。何謂饑之以財？人之情，不足於財，則貪鄙，苟得無所不至。先王知其如此，故其制祿，自庶人之在官者，其祿已足以代其耕矣。由此等而上之，每有加焉，使其足以養廉恥，而離於貪鄙之行，猶以為未也，又推其祿，以及其子孫，謂之世祿。使其生也，既於父子兄弟妻子之養，婚姻朋友之接，皆無憾矣。其死也，又於子孫無不足之憂焉。何謂約之以禮？人情足於財，而無禮以節之，則又放僻邪侈，無所不至。先王知其如此，故為之制度，婚喪祭養燕享之事，服食器用之物，皆以命數為之節，而齊之以律度量衡之法，其命可以為之，而財不足以具，則弗具也。其財可以具，而命不得為之者，不使有銖兩分寸之加焉。何謂裁之以法？先王於天下之士，教之以道藝矣，不帥教則待之以棄遠，方終身不齒之法，約之以禮矣，不循禮則待之以流殺之法。王制曰：「變衣服者其君流。」酒誥曰：「厥或誥曰：羣飲汝勿佚，盡執拘以歸于周，予其殺。」夫羣飲變衣服小罪也，流殺大刑也，加小罪以大刑，先王所以忍而不疑者，以為不如是不足以一天下之俗而成吾治。夫約之以禮，裁之以法，天下所以服從無抵冒者，又非獨其

禁嚴而治察之所能致也。蓋亦以吾至誠懇憫之心，力行而爲之，倡凡在左右通貴之人，皆順上之欲而服行之。有一不帥者，法之加必自此始。夫上以至誠行之，而貴者知避上之所惡矣。則天下之不罰而止者衆矣。故曰：「此養之道也。」所謂取之之道者，何也？先王之取人也，必於鄉黨，必於庠序，使衆人推其所謂賢能，書之以告于上而察之。誠賢能也，然後隨其德之大小，才之高下，而官使之。所謂察之者，非專用耳目之聰明，而聽私於一人之口也。欲審知其德，固以行，欲審知其才，固以言。得其言行，則試之以事。所謂察之者，試之以事是也。雖堯之用舜，亦不過如此而已。又況其下乎？若夫九州之大，四海之遠，萬官億醜之賤，所須士大夫之才，則衆矣。有天下者，又不可以一一自察之也。又不可以偏屬於一人，而使之於一日二日之間，考試其行能而進退之也。蓋吾已能察其才行之大者，以爲大官矣。因使之取其類，以持久試之，而考其能者，以告于上，而後以俯命祿秩予之而已。此取之之道也。所謂任之之道者，何也？人之才德，高下厚薄不同，其所任有宜有不宜。先王知其如此，故知農者以爲后稷，知工者以爲共工，其德厚而才高者，以爲之長，德薄而才下者，以爲之佐屬。又以久於其職，則上狃習而知其事，下服馴而安其教。賢者則其功可以至於成，不肖者則其罪可以至於著。故久其任，而待之爲考績之法。夫如此，故智能才力之士，則得盡其智以赴功，而不患其事之不終，其功之不就也。偷惰苟且之人，雖欲取容於一時，而顧修辱在其

後，安敢不勉乎？若夫無能之人，固知辭避而去矣。居職任事之日，久不勝任之罪，不可以幸而免故也。彼且不敢冒而知辭避矣。尚何有比周讒諂爭進之人乎？取之既已詳，使之既已當，處之既已久，至其任之也，又專焉而不一，以法束縛之，而使之得行其意。堯舜之所以理百官而熙衆工者，以此而已。書曰：「三載考績，三考黜陟幽明。」此之謂也。然堯舜之時，其所黜者則聞之矣。蓋四凶是也。是所陟者，則臯陶稷契，皆終身一官而不徙。蓋其所謂陟者，特加之爵命祿賜而已耳。此任之之道也。夫教之養之，取之任之之道如此，而當時人君又能與其大臣，悉其耳目心力，至誠惻怛思念而行之，此其人臣之所以無疑，而於天下國家之事，無所欲爲而不得也。方今州縣雖有學，取牆壁具而已，非有教導之官，長育人才之事也。唯太學有教導之官，而亦未嘗嚴其選，朝廷禮樂刑政之事，未嘗在於學。學者亦漠然自以禮樂刑政爲有司之事，而非己所當知也。學者之所教，講說章句而已；講說章句，固非古者教人之道也。近歲乃始教之以課試之文章。夫課試之文章，非博誦強學，窮日之力，則不能及其能工也。大則不足以用天下國家，小則不足以爲天下國家之用。故雖白首於庠序，窮日之力，以帥上之教，及使之從政，則茫然不知其方者，皆是也。蓋今之教者，非特不能成人之才而已，又從而困苦毀壞之，使不得成才者，何也？夫人之才，成於專而毀於雜，故先王之處民才，處工於官府，處農於畝畝，處商賈於肆，而處士於庠序，使各專其業而不見異

物，權異物之足以審其業也。所謂士者，又非特使之不得見異物而已，一示之以先王之道，而百家諸子之異說，皆屏之而莫敢習者焉。今士之所宜學者，天下國家之用也。今悉使置之不教，而教之以課試之文章，使其耗精神，窮日之力以從事於此。及其任之以官也，則又悉使置之，而責之以天下國家之事。夫古之人，以朝夕專其業於天下國家之事，而猶才有不能，今乃移其精神，奪其日力，以朝夕從專於無補之學，及其任之以事，然後卒然責之以爲天下國家之用，宜其才之足以有爲者少矣。臣故曰：一非特不能成人之才，又從而困苦毀壞之，使不得成才也。一又有甚害者，先王之時，士之所學者，文武之道也。士之才，有可以爲公卿大夫，有可以爲士，其才之大小，不宜則有矣。至于武事，則隨其才之大小，未有不學者也。故其大者，居則爲六官之卿，出則爲六軍之將也；其次則比閭族黨之師，亦皆卒兩師旅之帥也。故邊疆宿衛，皆得士大夫爲之，而小人不得奸其任。今之學者，以爲文武異事，吾知治文事而已，至於邊疆宿衛之任，則推而屬之於卒伍。往往天下姦悍無賴之人，苟其才行足自託於鄉里者，亦未有肯去親戚而從召募者也。邊疆宿衛，此乃天下之重任，而人主之所當慎重者也。故古者教士以射御爲急，其他技能，則視其人才之所宜而後教之，其才之所不能，則不强也。至於射，則爲男子之事，人之生有疾則已，苟無疾，未有去射而不學者也。在庠序之間，固當從事於射也；有賓客之事，則以射，有祀祭之事，則以射，別士

之行，同能，偶則以射，於禮樂之事，未嘗不寓以射，而射亦未嘗不在於禮樂祭祀之間也。易曰：「弧矢之利，以威天下。」先王豈以射爲可以習揖讓之儀而已乎？固以爲射者，武事之尤大，而威天下守國家之具也。居則以是習禮樂，出則以是從戰伐。士既朝夕從事於此，而能者樂，則邊疆宿衛之任，皆可以擇而取也。夫士嘗學先王之道，其行義嘗見推於鄉黨矣，然後因其才而託之以邊疆宿衛之事，此古之人君所以推干戈以屬之人，而無內外之虞也。今乃以夫天下之重任，人主所當至慎之選，推而屬之姦悍無賴，才行不足，自託於鄉里之人，此方今所以認認然常抱邊疆之憂，而虞宿衛之不足恃，以爲安也。今孰不知邊疆宿衛之士不足恃，以爲安哉？顧以爲天下學士以執兵爲恥，而亦未有能騎射行陣之事者，則非召募之卒伍，孰能任其事者乎？夫不嚴其教，高其選，則士之以執兵爲恥，而未嘗有能騎射行陣之事，固其理也。凡此皆教之非其道故也。方今制祿，大抵皆薄，自非朝廷侍從之列，食口稍衆，未有不兼農商之利，而能充其養者也。其下州縣之吏，一月所得，多者錢八九千，少者四五千，以守選待除，守闕通之，蓋六七年而後得三年之祿，計一月所得，乃實不能四五千，少者乃實不能及三四千而已。雖廩養之給，亦窘於此矣。而其養生喪死，婚姻葬送之事，皆當於此。夫出中人之上者，雖窮而不失爲君子；出中人之下者，雖泰而不失爲小人；唯中人不然，窮則爲小人，泰則爲君子。計天下之士，出中人之上下者，千百而無十一；窮而爲

小人泰而爲君子者，則天下皆是也。先王以爲衆不可以力勝也，故制行不以己而以中人爲制，所以因其欲而利道之，以爲中人之所能守，則其志可以行乎天下，而推之后世。以今之制祿，而欲士之無毀廉恥，蓋中人之所不能也。故今官大者，往往交賂遺營貲產，以負累於世矣；則其偷惰取容之意起，而矜奮自強之心息，則恥以負累於世矣，則其偷惰取容之意起，而矜奮自強之心息，則職業安得而不弛，治道何從而興乎？又况委法受賂，侵牟百姓者，往往而是也。此所謂不能餽之以財也。婚喪奉養，服食器用之物，皆無制度以爲之節，而天下以奢爲榮，以儉爲恥，苟其財之可以具，則無所爲而不得，有司旣不禁，而人又以此爲榮，苟其財不足而不能自稱於流俗，則其婚喪之際，往往得罪於族人親姻，而人以爲恥矣。故富者貪而不知止，貧者則強勉其不足以追之，此士之所以重困而廉恥之心毀也。凡此所謂不能約之以禮也。方今陛下躬行儉約，以率天下，此左右通貴之臣所親見，然而其閨門之內，奢靡無節，犯上之所惡，以傷天下之教者，有已甚者矣。未聞朝廷有所放縱以示天下。昔周人之拘羣飲而被之以殺刑者，以爲酒之末流生害有至於死者衆矣，故重禁其禍之所自生。重禁禍之所自生，故其施刑極省，而人之抵於禍敗者少矣。今朝廷之法所尤重者，獨貪吏耳。重禁貪吏，而輕奢靡之法，此所謂禁其末而弛其本。然而世之議者，以爲方今官冗，而縣官財用已不足以供之，其亦蔽於理矣。今之入官誠冗矣，然而前世置員蓋甚少，而

賦祿又如此之薄，則財用之所不足，蓋亦有說矣。吏祿豈足計哉！臣於財利固未嘗學，然竊觀前世治財之大略矣。蓋因天下之力，以生天下之財；取天下之財，以供天下之費。自古治世，未嘗以不足爲天下之公患也。患在治財無其道耳。今天下不見兵革之具，而元元安土樂業，各致力以生天下之財，然而公私常以困窮爲患者，殆以理財未得其道，而有司不能度世之宜，而通其變耳。誠能理財以其道，而通其變，臣雖愚，固知增吏祿不足以傷經費也。方今法嚴令具，所以羅天下之士，可謂密矣；然而亦嘗教之以道藝，而有不帥教之刑以待之乎？亦嘗約之以制度，而有不循禮之刑以待之乎？亦嘗任之以職事，而有不任事之刑以待之乎？夫不先教之以道藝，誠不可以誅其不帥教；不先約之以制度，誠不可以誅其不循禮；不先任之以職事，誠不可以誅其不任事；此三者，先王之法所尤急也。今皆不可得，誅而薄物細故，非害治之急者，爲之法禁，月異而歲不同，爲吏者至于不可勝記，又況能一一避之而無犯者乎？此法令所以玩而不行，小人有幸而免者，君子有不幸而及者焉。此所謂不能裁之以刑也。凡此皆治之非其道也。方今取士，強記博誦，而略通於文辭，謂之茂才，異等賢良，方正，茂才，異等賢良，方正者，公卿之選也。記不必強，誦不必博，略通於文辭，而又嘗學詩賦，則謂之進士，進士之高者，亦公卿之選也。夫此二科所得之技能，不足以爲公卿，不待論而後可知。而世之議者，乃以爲吾常以此取天下之士，而才之可以爲公卿者，常出於

此不必法古之取人而後得士也，其亦蔽於理矣。先王之時，盡所以取人之道，猶懼賢者之難進，而不肖者之難於其間也。今悉廢先王所以取士之道，而取天下之才，悉使爲賢良進士，則士之才，可以爲公卿者，固宜爲賢良進士，而賢良進士，亦固宜有時而得才之可以爲公卿者也。然而不肖者，苟能雕蟲篆刻之學，以此進至乎公卿，才之可以爲公卿者，困於無補之學，而以此緇死於窮野，蓋十八九矣。夫古之人有天下者，其所以慎擇者，公卿而已。公卿既得其人，因使推其類以聚於朝廷，則百司庶物無不得其人也。今使不肖之人，幸而至乎公卿，因得推其類聚之朝廷，此朝廷所以多不肖之人，而雖有賢智，往往困於無助，不得行其意也。且公卿之不肖，既推其類以聚於朝廷，朝廷之不肖，又推其類以備四方之任使，四方之任使者，又各推其不肖以布於州郡，則雖有同罪舉官之科，豈足恃哉？適足以爲不肖者之資而已。其次九經、五經、學究、明法之科，朝廷固已嘗患其無用於世，而稍責之以大義矣。然大義之所得，未有以賢於故也。今朝廷又開明經之選，以進經術之士，然明經之所取，亦記誦而略通於文辭者，則得之矣。彼通先王之旨，而可以施於天下國家之用者，願未必得與於此選也。其次則恩澤子弟，庠序不教之以道藝，官司不考問其才能，父兄不保任其行義，而朝廷輒以官予之，而任之以事。武王數紂之罪，則曰：「官人以世。」夫官人以世而不計其才行，此乃紂之所以亂亡之道，而治世之所無也。又其次，曰流外，朝廷固已擯

之於廉恥之外，而限其進取之路矣。願屬之以州縣之事，使臨之士民之上，豈所謂以賢治不肖者乎？以臣使事之所及，一路數千里之閒，州縣之吏出於流外者，往往而有，可屬任以事者，殆無二三，而當防閑其姦者皆是也。蓋古者有賢不肖之分，而無流品之別。故孔子之聖，而嘗爲季氏吏，蓋雖爲吏而亦不害其爲公卿。及後世有流品之別，則凡在流外者，其所成立固嘗自置於廉恥之外，而無高人之意矣。夫以近世風俗之流弊，自雖士大夫之才，勢足以進取，而朝廷嘗獎之以禮義者，晚節末路，往往怵而爲姦，況又其素所成立無高人之意，而朝廷固已擯之於廉恥之外，限其進取者乎？其臨人親職，放僻邪侈，固其理也。至于邊疆宿衛之選，則臣固已言其失矣。凡此皆取之非其道也。方今取之既不以其道，至於任之又不同其德之所宜，而問其出身之後，先不論其才之稱否，而論其歷任之多少，以文學進者，且使之治財，已使之治財矣，又轉而使之典獄，已使之典獄矣，又轉而使之治禮，是則一人之身，而責之以百官之所能備，宜其人才之難爲也。夫責人以其所難爲，則人之能爲者少矣。人之能爲者少，則相率而不爲。故使之典禮，未嘗以不知禮爲憂，以今之典禮者，未嘗學禮故也。使之典獄，未嘗以不知獄爲恥，以今之典獄者，未嘗學獄故也。天下之人，亦已漸漬於失教，被服於成俗，見朝廷有所任使，非其資序，則相讓而誦之。至於任使之不當其才，未嘗有非之者也。且在位者數徙，則不得久於其官，故上不能狃習而知其事，下不肯服馴

於安其教。賢者則其功不可以及於成，不肖者則其罪不可以至於著。若夫迎新將故之勞，緣絕簿書之弊，固其害之小者不足悉數也。設官大抵皆當久於其任，而至於所部者遠，所任者重，則尤宜久於其官，而後可以責其有爲。而方今尤不得久於其官，往往數月輒遷之矣，取之既已不詳，使之既已不當，處之既已不久，至於任之則又不專，而又一一以法束縛之，不得行其意。臣故知當今在位多非其人，稍假借之權，而不一以法束縛之，則放恣而無不爲。雖然，在位非其人，其特法以爲治，自古及今，未有能治者也。卽使在位皆得其人矣，而一一以法束縛之，不使之得行其意，亦自古及今，未有能治者也。夫取之既已不詳，使之既已不當，處之既已不久，任之又不專，而又一一以法束縛之，故雖賢者在位，能者在職，與不肖而無能者殆無以異。夫如此，故朝廷明知其賢能足以任事，苟非其資序，則不以任事而輒進之，雖進之士猶不服也。明知其無能而不肖，苟非有罪爲在事者所劾，不敢以其不勝任而輒退之，雖退之士猶不服也。彼誠不肖無能，然其士不服者何也？以所謂賢能者任其事，與不肖而無能者亦無以異故也。臣前以爲不能任人以職事而無不任事之刑以待之者，蓋謂此也。夫教之養之，取之任之，有一非其道，則足以敗天下之人才，又況兼此四者而有之，則在位不才，苟簡貪鄙之人，至於不可勝數，而草野閭巷之間，亦少可任之才，固不足怪。詩曰：「國維靡止，或聖或否，民雖靡盬，或哲或謀，或賻或艾，如彼泉流，無淪胥以敗。」

此之謂也。夫在位之人才不足矣，而閭巷草野之間亦少可用之才，則豈特行先王之政而不得也。社稷之託，封疆之守，陛下其能久以天幸爲常，而無一旦之憂乎？蓋漢之張角，三十六萬同日而起，所在郡國，莫能發其謀。唐之黃巢，橫行天下，而所至將吏無敢與之抗者。漢唐之所以亡，禍自此始。唐既亡矣，陵夷以至五代，而武夫用事，賢者伏匿消沮，而不見在位無復有知君臣之義上下之禮者也。當是之時，變置社稷，蓋甚於弈碁之易，而元元肝腦塗地，幸而不轉死於溝壑者，無幾耳。夫人才不足爲患，蓋如此而方今公卿大夫，莫肯爲陛下長慮後顧，爲宗廟萬世計，臣竊惑之。昔晉武帝趨過目前，而不爲子孫長遠之謀，當時在位，亦皆偷合苟容，而風俗蕩然，棄禮義，捐法制，上下同失，莫以爲非，有識固知其將必亂矣。而其後果海內大擾，中國列於夷狄者二百餘年。伏惟三廟祖宗神靈，所以付屬陛下，固將爲萬世血食，而大庇元元於無窮也。臣願陛下鑒漢唐五代之所以亂亡，懲晉武苟且因循之禍，明詔大臣，思所以陶成天下之才，慮之以謀，計之以數，爲之以漸，期爲合於當世之變，而無負於先王之意，則天下之人才不勝用矣。人才不勝用，則陛下何求而不得，何欲而不成哉？夫慮之以謀，計之以數，爲之以漸，則成天下之才甚易也。臣始讀孟子見孟

子言王政之易行，心則以爲誠然，及見與慎子論齊魯之地，以爲先王之制國，大抵不過百里者，以爲今有王者起，則凡諸侯之地，或千里，或五百里，皆將損之，至于數十百里而後止，于是疑孟子

雖賢，其仁智足以一天下，亦安而毋劫之以兵革，而使數百千里之強國，一旦背損其地之十八九，比于先王之諸侯。至其後，觀漢武帝用主父偃之策，令諸侯王地悉得推恩封其子弟，而漢親臨定其號名，輒別屬漢，于是諸侯王之子弟，各有分土，而地大勢強者，卒以分析弱小，然後知慮之以謀，計之以數，爲之以漸，則大者固可使小，強者固可使弱，而不至乎傾駭變亂敗傷之弊。諸子之言不爲過，又況今欲改易更革，其勢非若孟子所爲之難也。臣故曰：「慮之以謀，計之以數，爲之以漸，則其爲甚易也。」然先王之爲天下，不思人之不爲，而思人之不能；不思人之不能，而思己之不勉。何爲不思人之不爲，而思人之不能？人所願得者，善行美名，尊爵，厚利也，而先王能操之以臨天下之士，天下之士有能遵之以治者，則悉以其所願得者以與之，士不能則已矣，苟能則孰肯舍其所願得而不自勉以爲才？故曰：「不患人之不爲，患人之不能。」何謂「不患人之不能，而患己之不勉」？先王之法，所以待人者，盡矣，自非下愚不可移之才，未有不能赴者也，然而不謀之以至誠，惻怛之心，力行而先之，未有能以至誠，惻怛之心，力行而應之者也。故曰：「不患人之不能，而思人之不勉。」陛下誠有意乎成天下之才，則臣願陛下勉之而已。臣又觀朝廷異時，欲有所施爲變革，其始計利害未嘗熟也，願有一流俗僥倖之人，不悅而非之，則遂止而不敢。夫法度立則人無獨蒙其幸者，故先王之政，雖足以利天下，而當其承弊壞之後，僥倖之時，其刑法立制，未

嘗不艱難也。以其刑法立制，而天下僥倖之人，亦順說以趨之，無有齟齬，則先王之法，至今存而不廢矣。惟其刑法立制之艱難，而僥倖之人，不肯順悅而趨之，故古之人欲有所爲，未嘗不先之以征誅，而後得其意。詩曰：「是伐是肆，是絕是忽，四方以無拂。」此言文王先征誅而後得意于天下也。夫先王欲立法度，以變衰壞之俗，而成成人之才，雖有征誅之難，猶忍而爲之，以爲不若是，不可以有爲也。及至孔子以匹夫遊諸侯，所至則使其君臣，捐所習，逆所順，強所劣，憧憧如也，卒困于排逐。然孔子亦終不爲之變，以爲不如是，不可以有爲，此其所守，蓋與文王同意。夫在上之聖人，莫如文王，在下之聖人，莫如孔子，而欲有所施爲變革，則其事蓋如此矣。今有天下之勢，居先王之位，想立法制，非有征誅之難也，雖有僥倖之人，不悅而非之，固不勝天下順悅之人衆也，然而一有流俗僥倖不悅之言，則遂止而不敢爲者，惑也。陛下誠有意乎成天下之才，則臣又願斷之而已。夫慮之以謀，計之以數，爲之以漸，而又勉之以成，斷之以果，然而猶不能成天下之才，則以臣所聞，蓋未有也。然臣之所稱，流俗之所不講，而今之議者，以謂迂闊而熟爛者也。竊觀近世士大夫，所欲悉心力耳目，以補助朝廷者，有矣，彼其意非一切利則害，以爲當世所能行者，士大夫既以此希世，而朝廷所取于天下之士，亦不過如此。至于大倫大法禮義之際，先王之所力學而守者，蓋不及也。一有及此，則羣聚而笑之，以爲迂闊。今朝廷悉心于一切之利害，有司法令于刀筆之間，非

一日也。然其效可觀矣。則夫所謂迂闊而熟爛者，惟陛下亦可以少留神而察之矣。昔唐太宗正觀之初，人人異論，如封德彝之徒，皆以爲非雜用秦漢之政，不足以爲天下；能思先王之事，開太宗者，魏文正公一人爾。其所施設，雖未能盡當先王之意，抑其大略，可謂合矣。故能以數年之間，而天下幾致刑措，中國安寧，夷狄順服。自三王以來，未有如此盛時也。唐太宗之初，天下之俗，猶今之世也。魏文正公之言，固當時所謂迂闊而熟爛者也。然其效如此。賈誼曰：「今或言德教之不如法令，胡不引商周秦漢以觀之？」然則唐太宗之事，亦足以觀矣。臣幸以職事歸報陛下，不自知其驚下無以稱職，而敢及國家之大體者，以臣蒙陛下任使而當歸報竊謂在位之人才不足，而無以稱朝廷任使之意；而朝廷所以任使天下之士者，或非其理，而士不得盡其才，此亦臣使事之所及。而陛下之所宜先聞者也。釋此一言，而毛舉利害之一二，以汗陛下之聰明，而終無補于世，則非臣所以事陛下憊倦之義也。伏惟陛下詳思而擇其中，天下幸甚！

## 上時政疏

年月日，具位臣某，昧死再拜，上疏尊號皇帝陛下。臣竊觀自古人主享國日久，無至誠惻怛憂天下之心，雖暴政虛刑加于百姓，而天下未嘗不亂。自秦已下，享國日久者，有晉之武帝，梁之武帝，唐之明皇。此三帝者，皆聰明智略有功之主也。享國日久，內

外無患，因循苟且，無至誠惻怛憂天下之心，趨過目前，而不爲久遠之計，自以禍災可以無及其身，往往身遇災禍，而悔無所及，雖或僅得身免，而宗廟固已毀辱，而妻子固以困窮，天下之民固以膏血塗草野，而生者不能自脫於困餓劫束之患矣。夫爲人子孫，使其宗廟毀辱，爲人父母，使其比屋死亡，此豈仁孝之主所宜忍乎？然而晉梁唐之三帝，以晏然致此者，自以爲其禍災可以不至於此，而不自知忽然已至也。蓋夫天下至大器也，非大明法度，不足以維持；非衆建賢才，不足以保守；苟無至誠惻怛憂天下之心，則不能詢考賢才，講求法度。賢才不用，法度不修，偷假歲月，則幸或可以無他，曠日持久，則未嘗不終於大亂。伏惟皇帝陛下有恭儉之德，有聰明睿智之才，有仁民愛物之意，然享國日久矣，此誠當惻怛憂天下，而以晉梁唐三帝爲戒之時。以臣所見，方今朝廷之位，未可謂能得賢才；政事所施，未可謂能合法度；官亂於上，民貧於下，風俗日以薄，才力日以困窮，而陛下高居深拱，未嘗有詢考講求之意，此臣所以竊爲陛下計而不能無慨然者也。夫因循苟且，逸豫而無爲，可以徵倖一時，而不可以曠日持久。晉梁唐三帝者，不知慮此，故災稔禍變生於一時，則雖欲復詢考講求以自救，而已無所及矣。以古準今，則天下安危治亂，尙可以有爲；有爲之時，莫急於今日。過今日則臣恐亦有所及之悔矣。然則以至誠詢考，而衆建賢才，以至誠講求，而大明法度，陛下今日其可以不以汲汲乎？書曰：「若藥不瞑眩，厥疾弗瘳。」臣願陛下以移身



之狼疾爲憂，而不以一日之瞑眩爲苦。臣既蒙陛下採摭使備從官，朝廷治亂安危，臣實預其榮辱。此臣所以不敢避進越之罪，而忘盡規之義。伏惟陛下深思，臣言以自警戒，則天下幸甚。

### 進戒疏

熙寧二年五月十一日，朝散大夫右諫議大夫桑知政事護軍賜紫金魚袋臣某，昧死再拜，上疏皇帝陛下。臣竊以爲陛下既終亮陰，考之於經，則羣臣進戒之時；而臣待罪近司，職當先事有言者也。竊聞孔子論爲邦，先放鄭聲，而後曰遠佞人。仲虺稱湯之德，先不邇聲色，不殖貨利，而後曰用人惟己。蓋以謂不淫耳目於聲色，玩好之物，然後能精於用志；能精於用志，然後能明於見理；能明於見理，然後能知人能知人，然後佞人可得而遠。忠臣良士與有道之君子，類進於時，有以自竭，則法度之行，風俗之成，甚易也。若夫人主雖有過人之材，而不能早自戒於耳目之欲，至於過差以亂其心之所思，則用志不精，用志不精，則見理不明；見理不明，則邪說蔽行，心窺間乘，始而作，則其至於危亂也，豈難哉！伏惟陛下卽位以來，未有聲色玩好之過聞於外，然孔子聖人之盛，尙自以爲七十而後敢從心所欲也。今陛下以鼎盛之春秋，而享天下之大奉，所以惑於耳目者爲不少矣。則臣之所豫慮，而陛下之所深戒，宜在於此。天下之生聖人之材甚吝，而人之值聖人之時甚難。天旣以聖人之材付陛下，則人亦將望聖人之澤於此時。伏

惟陛下自愛以成德，而自強以赴功，使後世不失聖人之名，而天下皆蒙陛下之澤，則豈非可願之事哉！臣愚不勝倦倦，唯陛下恕其狂妄，而幸賜省察。

### 卷四十

#### 奏狀

#### 乞免就試狀

准中書劄子，奉聖旨：依前降指揮，發來赴闕就試者。伏念臣祖母年老，先臣未葬，弟妹當嫁，家貧口衆，難住京師。比嘗以此自陳，乞不就試，慢廢朝命，尙宜有舉。幸蒙寬赦，卽賜聽許，不闕遜事之臣，更以臣爲恬退，令臣無舉奉養之急，而遂巡辭避，不敢當清要之選，雖曰恬退可也。今特以營私家之急，擇利害而行，謂之恬退，非臣本意。兼臣罷縣守闕，及今二年有餘，老幼未嘗寧宇。方欲就任，卽令赴闕，實於私計有妨。伏望聖慈，察臣本意，止是營私，特寢召試指揮，且令終滿外任，一面發赴本任去訖。

#### 辭集賢校理狀四

右臣今月二十二日，准中書差人賈到勅牒一追，除臣集賢校理，卽命震怖，不知所以。伏念臣頃者，再蒙聖恩召試，臣以先臣

未葬。二妹當嫁，家貧口衆，難住京師。乞且終滿外任，比蒙矜允，獲畢所圖。而門衰祚薄，祖母二兄一嫂，相繼喪亡，奉養婚嫁，葬送之窘，比於向時爲甚。所以今茲纒至闕下，卽乞除一在外差遣，不願就試。以臣疵賤，謬蒙拔擢，至於館閣之選，豈非素願所榮。然而不願就試，正以舊制入館，則當供職一年。臣方甚貧，勢不可處。此臣所以不敢避干譽朝廷之舉，而苟欲就其營養之私。不圖朝廷不加考試，有此除授。臣若避犯命之罰，受而不能自列，則是臣前所乞爲以私養，要君而誤陛下，以無名加寵也。又聞朝廷特與推恩，不候一年，卽與在外差遣。且一年供職，乃是朝廷舊制。臣以何名，敢當此恩，而累朝廷廢廢久行公共之法？又見新制，近臣薦舉官吏，非條詔指揮，不得用例。施行令出已來，未能十日，今臣有此除授，乃因近臣薦舉，不加考試，又非條詔指揮，臣雖不肖，獨何敢冒過分之寵，而以身爲廢法之首乎？伏望聖慈察臣本意，從臣私欲，追還所授，特與除一在外合分差遣，則使公義不虧於上，私行不失於下，臣不任激切祈恩待報之至。所有劾牒，臣不敢受，謹具狀奏聞。

## 一一

右臣三月二十二日，准中書差人齎到勅牒一道，除臣集賢校理，臣以分不當得，已具狀陳列，乞追還所授。今月五日，又准中書差人齎到勅牒，令臣受職，不得辭免。臣以微賤，誤蒙采取，非臣

隕首足以報稱。然分有所不敢受，名有所不敢居，寧以慮上得，終不敢冒恩苟止。何則？臣以擇利辭試，而朝廷因與免試推恩，是臣以辭試上要朝廷，而朝廷果以恩澤副之也。不獨傷臣私義，固以上累國體。此臣所以惓惓至於再三，而終不敢止。且勸沮之方，失不在大。如臣心實擇利而迹有辭讓之嫌，以故朝廷特有優假，臣恐進趨之士，有以窺度聖世，將或立小異以近名，託虛名以邀利，浸成弊俗，非復法令所能禁止。此亦朝廷所宜慎惜，不當遂已成之命，而難於追改也。竊見近臣比有辭讓官職，皆義所當得，而特以禮辭讓，朝廷固宜必使受之而不聽。如臣卑賤，今所陳列，直以分不當得，非敢以爲讓也。伏望聖慈聽臣所守，特與追還所授。臣區區之誠，期於得請而後敢已。所有劾牒，臣不敢受。

## 一二

右臣三月二十二日，准中書差人齎到勅牒一道，除臣集賢校理，臣以分不當得，已再具狀奏聞，乞追還所授。今月九日，又准中書差人齎到勅牒，令臣不得辭免，是臣區區之意，終未蒙朝廷省察。臣於他官苟可以得，則或悉力以求之，唯恐利之不多，而勢之不便，非能有所辭讓也。至於私養之不給，則苟求冒取，亦無所不至。今朝廷特除以爲校理，則再三于紊朝廷終不敢受者，誠以要君罔上之罪大，故寧以他得罪，而於此不敢順命苟止也。所謂要君者，臣前狀已言之矣。所謂罔上者，朝廷除校理必先考試，今

獨推恩異於尋常，朝廷不以臣爲小有異能，則必以臣爲小有異行，臣無其實而敢冒此恩，此乃所謂罔上也。且臣蒙恩與試久矣，臣非敢終辭也，特以勢未便爾。若朝廷且從臣欲，使臣他日之力足以供職京師，而無乏養之憂，則臣自當援恩求試，豈敢上煩朝廷教道，何必遽加特恩，使朝廷爲苟舉，而臣爲苟得者乎？臣聞之古人曰：「明主可以理奪。」又曰：「匹夫不可奪志。」臣敢守此，所以至於再三。伏乞聖慈，特賜矜允，煩冒天威，臣無任祈恩待報，惶恐迫切之至。

四

右臣蒙恩，除集賢校理，以分不當得，已累會具狀奏聞，乞追還所授。今月二十四日，准中書劄子奉聖旨：「更不許辭讓。」臣以小官，非敢以禮爲讓也，直以分不當得，理當自言。蓋聞當得而讓，則上有所不得聽，不當得而授，則下有所不敢承。不聽不爲，迫下不承，不爲慢上，以其義也。臣誠不肖，然區區之私，具狀四奏者，竊以爲匹夫之志，有近於義，是以仰迫恩威，至於再三，終不敢受。伏望聖慈，俯察臣愚，特與追還所授。

辭同修起居注狀七

臣蒙恩，差臣同修起居注者，聖恩深厚，非臣隕首所能報稱。然臣去年始蒙恩，特除直集賢院，當是時，臣黽勉不敢久違恩指。

至今就職，纔及數日，又蒙恩有此除授，臣竊觀朝廷用人，皆以資序；臣入館最爲日淺，而材何以異人，終不敢貪冒寵榮，以干朝廷公論。伏望聖慈，察臣誠心，非敢飾讓，特賜追還所授。

一一

臣昨進狀，乞追還所授同修起居注勅，准中書劄子奉聖旨：「不許辭讓，便令受勅供職。」伏念臣前奏所陳，實繫朝廷用人之體，今特於臣私義有所不安，伏望聖慈，檢會臣前奏，特賜追還所授。

一二

臣昨進狀，乞追還所授同修起居注勅，准中書劄子奉聖旨：「不許辭讓，便令受勅供職。」疏遠小臣，上煩朝廷教獎如此，而區區所陳，終不敢止者，誠以謂進在臣先，而才行當蒙選擇，則與之宜有先後。臣入館資序最爲在後，而獨先被選，竊以爲非朝廷用人之體，此臣所以不敢也。念臣異時得以被進，臣雖不肖，豈敢復辭？且臣已緣辭避職事，而不爲朝廷所察，今若又迫於敦喻，黽勉供職，則是臣每飾辭讓之虛文，以玩躑朝廷，人雖不以爲言，臣亦何顏以立於世？蓋以臣事君，苟心知其甚不可，則寧得舉而有不從。況臣幸在聖人至仁隆寬盡下之時，謹分守以辭其所不當得之寵榮，必無方命之罰，則朝廷之命雖欲必行而不改，臣之愚心，亦將固守而不移。伏望聖慈，察臣如此，早賜追還所授。

#### 四

臣累進狀，乞免同修起居注，又准中書劄子奉聖旨不許辭讓，便令受勅供職。卑賤之臣，屢煩聖恩敦諭，誠惶誠恐，不知所措。然臣聞人無信不立，臣事君以忠，忠者不飾行以微榮信者，不食言以從利。臣固嘗曰：「朝廷之命雖欲必行而不改，臣之愚心亦將固守而不移。」若臣既有此言，而終於託不得已以饜寵，則是臣飾行食言，而實無自守之義，非所以稱朝廷獎遇之意，而明區區避讓之本心。寧以違命受譴，終不敢身為浮僞之首，以傷聖時忠實之化。伏望聖慈，早賜追還所授。

#### 五

臣進狀乞免同修起居注，准中書劄子奉聖旨依累降指揮，更不得辭讓，便令受勅供職。聖恩所以加臣者如此，非臣陷胸陷首所能報稱。然臣愚不肖，不知朝廷必欲度越衆人而加臣以此者，何也？爲其賢於人也。固有廉讓忠信之實也，度越衆人而貪其所不當得，非所以爲廉讓，知其不當得而辭於上，以爲朝廷之命雖欲必行而不改，臣之愚心亦將固守而不移。然終於託不得已以私其寵利，非所以爲忠信。無廉讓，無忠信，然而朝廷必欲度越衆人而加之，以其所不當得之職事，臣恐執政大臣必受比周朋黨之嫌，陛下必獲不察蔽欺之謗。臣亦不得自託於忠廉之行，而

居不姦利之人。窺朝廷之閒，爭飾僞讓以徼一時之幸，而有傷忠厚之俗。其事如此，在朝廷不可以不深思，而聽臣之辭，臣亦不可以不固守而違朝廷之命。誠願陛下日月之明，察臣今日之請。辭窮理極，非如向時辭讓職事猶在可冒之地。雖由此得舉，必不敢以身爲亂俗之首。伏乞斷自聖心，無牽於左右大臣之過論，特賜追還所授。

#### 六

臣累進狀，乞免同修起居注，奉聖旨不許進狀辭讓者。聖恩深厚，一至于此！臣誠惶誠恐，震怖不知所出。竊觀朝廷近日辭讓職事，未嘗有蒙聽許者。而臣又嘗辭讓職事，而不爲朝廷聽許矣。今復守辭讓之說，以請於朝廷，固宜聖恩不即聽許。然臣已習見朝廷未嘗許人辭讓職事，而猶惓惓自陳所守，不避僞讓之嫌，誠以螻蟻微誠，自誓終不敢受。冀蒙天聰，終初省察而已。今若迫於恩指，遂叨寵利，則人雖不以爲言，臣實無顏以處。使臣負僞讓之謗，則朝廷豈免濫恩之譏？臣雖不肖，義實不敢安此。且方今之所患而務絕者，方在於進取而不在於辭讓，方在於欺罔而不在於忠信。臣若託不得已終叨寵利，不顧其已出之言，則是去辭讓而引進取毀忠信而爲姦罔。朝廷本欲拔取人才，而所得者乃有去辭讓毀忠信之嫌，恐非所以示天下而厲士大夫之操也。此臣所以不敢避方命之罰，而守其區區之說，誠不敢以身累國，非特欲

全其私義而已也。伏望聖慈，卽賜聽許，令朝廷不失所授之宜，臣亦不失所守之信。

七

臣昨進狀，乞免同修起居注，准中書劄子奉聖旨朝廷已行擢用，依累降指揮不得違避者。孤賤之臣，行能淺薄，當朝廷清明，收用賢俊之時，幸得著位外庭，豈非榮顯。况又蒙拔擢，備任清要，丁寧獎勵，使必就官，此雖傾首刳心，自知無以報稱。然臣所以不敢受命，而猶守其區區之說者，誠以資於臣前，尚有未蒙選者。臣若苟見寵利之可得，而忘避讓之義，苟知避讓而不能固其所守，非朝廷所以拔擢臣之意，又非臣所以報稱朝廷之心。且謂已行之命，以伸自守之志者，朝廷之令名，食言喪志，以順命爲悅，鑿寵利者，臣之醜行。今朝廷重得令名，而使臣輕爲醜行，此臣之所不諭也。臣幸蒙任使，備官三司，列職儒館，若朝廷以爲可任，異時以次降擢，於分不爲進越，則臣雖不肖，其亦何說之敢辭。誠望聖慈，哀臣懇迫，檢會臣前後所奏，察其理有可言，特賜追還所授。

再辭同修起居注狀五

右臣今月二十六日，准勅差臣同修起居注。伏念臣行能無異衆人，入館最爲日淺。向叨選擇，嘗已固辭。幸蒙聖恩，方賜聽許。今同館之士，才能資序出臣右者尙多，而又蒙誤恩有此除授，在

臣理分，固不敢當。兼臣久住京師，親老口衆，而自春至今，疾病相仍，醫藥百端，未得平愈。近已進狀，乞一知州軍差遣。伏望聖慈，察臣誠懇，特賜追還所授。除一知州軍差遣，使臣無進越冒榮之舉，而得紓私養之急。所有同修起居注勅牒，臣不敢受，謹具狀奏聞，伏候勅旨。

一

右臣進狀，乞免同修起居注，准中書劄子奉聖旨不許辭讓，便令受勅。臣愚不肖，幸當朝廷拔擢賢雋之時，獨蒙不次之選，豈不榮哉。然臣入館最爲日淺，而行能無異衆人，故不敢度越衆人以鑿寵利。向時守此說以辭朝廷之命，至於八九，而聖恩不以臣言爲不信，幸賜聽許。今纔數月，同館之士資序在臣右而行能足充此選者尙多，蒙聖恩有此除授，令臣今而可受，則向之辭命至於八九者，果何心也。昔鄭以伯石爲卿，則辭太史，退則又使之命已，命已則又辭焉。三辭而後受策，於是子產始惡其爲人。夫子產所以惡之者，不以其飾辭讓而無忠實之志乎。臣之蒙恩，雖出於無求，然始則託辭讓之名，以煩黷朝廷，終則徼一日之利，以忘前言之信。推事考情，亦何以異於伯石。臣誠固陋，終不敢奸子產之所惡，以上昭聖時任人之失。且朝廷必以臣粗習文藝而忠信可使，則臣固嘗曰：「異時循次選用，則臣不敢辭。」伏望聖恩，察臣誠懇，特賜追還所授。除臣一知州軍差遣，使臣得遂前言之信。

而又有以紆親養之急。臣不任祈恩待報之至！

### 三

右臣近進狀，乞免同修起居注，准中書劄子奉聖旨依前。後指揮不許辭免，便令受勅者。聖恩加臣無窮，臣愚固守無已。臣誠惶恐震怖，不知所爲。然臣義有所不敢爲，故不敢冒恩而苟止。伏念臣以資序在右，右而行能宜蒙此選者尚多，拔管自列。至於八九，幸蒙聖恩聽察，而所除始終無擇一人。若臣今遂冒居，則是謂在右者已無可選。臣以應舉入仕，磨勸遷官，本圖宦達，非敢苟爲高抗。至於恩踰理分，度越衆人，官謫所歸，臣亦不敢苟得。以忘前言之信。兼臣自春至今，疾病相仍，加以氣衰，舊學幾廢，親老口衆，久住京師。近管進狀，乞一閑慢州軍差遣，伏見近例見任修起居注，以便親求罷出補外官，嘗蒙朝廷聽許。蓋當聖時，務以仁恕，優容臣下，則以便親而求外補，朝廷之所宜從。伏望聖慈，哀臣懇迫，特賜追還所授。除臣一知州軍差遣，以便私養，且令臣無進越冒榮之舉。所有同修起居注勅牒，臣不敢受，臣不任祈恩待報激切之至！

### 四

右臣近進狀，乞免同修起居注，准中書劄子奉聖旨依前。降指揮便受勅，更不得辭免者。臣之懇懇已具前奏，螻蟻微誠，未

能上動聖聽，臣誠惶怖不知所爲。然臣愚不肖，以謂朝廷革因循之弊，以不次官人當得異能之士，然後允衆人之望，而因循之弊可以遂除。臣治身則行能不備，居官則職業無稱，雖知好學，而所得未可以施於實用。故嚮蒙選擇，卽自以行能無異衆人，而不敢度越衆人受職，幸蒙聽許。纔及數月，卽欲度越衆人，言行本末不相顧如此，豈稱朝廷選擇之意。雖令言者不以其爲臣舉，臣實無顏以處。伏望聖慈，察臣累奏情理備盡，特賜追還所授，臣不任祈恩待報激切之至！

### 五

右臣近進狀，乞免同修起居注，准中書劄子奉聖旨依前降指揮便受勅供職。臣之區區辭說已窮，然不敢避通慢之舉，而苟止者，非特欲守前言之信，亦不敢上累朝廷。蓋臣有冒榮失守之舉，則朝廷亦有選授失人之謫。因啓天下好利之士，僞讓以要君，則甚傷聖時風俗。此臣之所大懼也。若聖恩幸聽臣言，使臣得安理分，則臣爲不失所守，臣能不失所守，則朝廷不失所選矣。朝廷不失所選，而又降寬廣裕，以曲盡臣志，謂宜所傷而適足以感厲天下之士。且朝廷以臣粗涉藝文，忠信可使，不復責其行能之備，必欲擢置從官，則臣固嘗曰：「臣已備官三司，列職儒館，若終免於舉，則循次受選，自不爲遲。」當朝廷清明，拔用賢儔有志之士，孰不幸願寵榮如臣之愚，豈獨異於衆人。誠以不敢度越衆人，

故嘗自列至於八九，朝廷降寬盡下，已嘗幸聽臣言，曾未數月。臣即不復自顧前言之信，若令言者謂臣要君以偽，臣誠無辭可以自明。伏望聖慈，察臣所守如此，臣誓堅死節，上報聖知，臣不任祈恩待報之至。

### 辭赴闕狀三

治平二年七月二十七日

右臣准中書劄子，伏奉聖恩，以臣喪禍既除，特授故官，召令赴闕。曩適餘生，尙蒙齒錄，非臣隕首所能報稱，理當即日奔走就塗，而臣抱病日久，未任跋涉，見服藥調理，乞候稍瘳，即時赴闕，謹具狀奏聞。

### 二

右臣伏准中書劄子，奉聖旨，令體認朝廷累降指揮，疾速發來赴闕。臣愚無狀，屢蒙聖恩，逮及自非抱疾，不任職事，豈敢故爲通慢。臣近已奏陳，乞一外司官於江寧府居住，伏望聖慈，特賜矜許，所冀便於將理，終獲有瘳，則臣雖自知無補於聖時，猶當乞備官使，仰副朝廷眷錄之意。

### 三

右臣伏准中書劄子，奉聖旨，合依累降指揮，發來赴闕。螻蟻微誠，不能感動，至煩朝廷恩旨，屢降，臣實惶怖，不知所爲。伏念臣

本以孤生，實無才用，誤蒙仁宗拔擢，備數從官。當大行皇帝亮陰之際，始以親喪解職，久尸榮祿，無補聖時。今陛下以仁孝之資，紹承聖緒，臣於私養既無所及，唯當追先帝之遇，致身於陛下之時。若自度力用堪任職事，何敢違慢朝廷詔令。至於經涉歲時，緣臣自春以來，抱疾有加，心力稍有所營，即所苦滋劇，所以昧冒奏陳，乞且分司，實冀稍可支持，即乞復備官使。天聽高邈，未蒙矜允，雖欲扶伏奔走闕庭，而力與願違，不能自強。伏望聖慈，察臣懇迫，命檢會臣累奏，特賜指揮，臣無任瞻天屏營激切之至。

### 辭知江寧府狀

右臣今月十九日，進奏院遞到勅牒，蒙恩差知江寧軍府事。犬馬之疾，自隔清光，天地之恩，曲垂眷恤，以臣丘墓所在，就付兵民之權，非臣肝膽塗地所能報稱。萬一然，臣所抱疾病，迄今無損。若輒冒恩，匪勉，典當領路大藩，恐力用無以上副朝廷委任。伏望陛下察臣如此，憐以臣逮侍先帝，未許分司，則乞除臣一留臺宮觀差遣，冀便將理，終獲有瘳，當捐軀少報聖德。所有勅牒，臣未敢祇受，已送江寧府收管，謹具狀奏聞。

### 舉陳樞充錢穀職司狀

前件官明敏方直，有政事之材。臣奉使江東，時樞爲旌德縣令，聽訟鞠獄，尤爲精明，隨所施設，皆有方略。

## 舉錢公輔自代狀

伏覩尚書兵部員外郎知制誥錢公輔，忠信篤實，富於文學，職事所及，不爲苟且，以臣鄙薄，實爲不如。真之禁林，必有補助，今舉自代。

## 舉呂公著自代狀

具某官呂公著，沖深而能謀，寬博而有制。其器可以大受，而退然似不能言，故衆人知之有所不盡。如蒙選用，得試其才，必有績効，不孤聖世。臣實不如，今舉自代。

## 舉謝卿材充陞擢任使狀

前件官公廉自守，曉達民事，普知撫州臨川縣，縣人至今稱說，以爲良吏。督率百姓，修復陂防，所溉頃畝甚多，水旱皆蒙其利。若朝廷興修功利，或選人材典領劇郡，皆可任使。

## 舉屯田員外郎劉彝狀

屯田員外郎溫州通判劉彝，聰明敏達，有濟務之材，堪充陞擢，繁難任使。

## 勅舉兵官未有人堪充狀

王安石全集 卷四十 奏狀

具位臣某，准今年六月二十三日，宣令臣同舉，保舉大使使，堪充主兵官二員，限一月內具姓名聞奏。即不得舉見任兩府親戚，并係路分都監及知軍州，已上人數。右具如前。伏緣臣所職，不係路分都監及知州軍大使，即不見有堪充主兵官者，謹具狀奏聞，伏候勅旨。

## 舉渭州兵馬都監蓋傳等充邊上任

### 使狀

具位臣某，准宣同舉，保舉不拘路分，有武勇謀略，三班度臣二員，不得舉見任兩府親戚者。右謹具如前。臣伏覩東頭供奉官權渭州兵馬都監兼在城巡檢蓋傳，有智略，能訓治軍旅，東頭供奉官江寧府龍安鎮巡檢王崇稷，有武勇，能擒捕盜賊。臣今保舉堪充邊上任使。如蒙朝廷擢用，後犯正入已贓，不如舉狀。臣甘當同舉。其人並不是臣親戚，亦無親戚見任兩府，謹具狀奏聞，伏候勅旨。

## 舉古渭寨都監段充兵官任使狀

具位臣某，准宣節文同舉，保舉大使使，堪充主兵官二員姓名聞奏，即不得舉見任兩府親戚，并係路分都監及知州軍，已上人數者。右謹具如前。臣伏覩內殿崇班閉門祇候秦州古渭寨都監段充，武勇才略可用，嘗以戰鬪有功，堪充主兵官任使。如蒙



朝廷擢用，及不如所奏，及犯正入已贓，臣甘當同臬。其人與臣不是親戚，亦無親戚見任兩府，不係路分都監及知州軍已上人資。所准宣命，令舉兩人，今日保舉到段充一員，尙闕一員，見訪求別狀舉次，謹具狀奏聞，伏候勅旨。

## 卷四十一

### 劄子

#### 擬上殿劄子

臣竊思奉使歸報陛下，敢因邊事之所及，冒言天下之事。伏惟陛下詳思而擇其中，天下幸甚！臣竊見陛下有恭儉之德，有聰明睿智之才，有仁民愛物之意，顧內不能無以社稷爲憂，外則不能無患於夷狄。天下之才力日以窮困，而風俗日以衰壞，四方有智之士，惴惴然常恐天下之不久安，此其故何也？患在無法度故也。今朝廷法嚴令具，無所不有，而臣以謂無法度者，方今之法度，多不合於先王之法度故也。孟子曰：「有仁心仁聞，而人不被其澤者，爲政不法先王之道故也。」非此之謂乎？以今之時，方先王之時遠矣，所遭之時，所遇之變不同，而欲一一修先王之政，雖甚愚者，猶知其難也。而臣以謂當今之失，患在不法先王之政者，以謂當法其意而已。夫五帝三王，相去蓋千有餘歲，一治一亂，盛衰

之時具矣，其所遭之變，所遇之勢不同，其施設之方亦皆殊，而其爲國家之意，本末先後未嘗不同也。臣故曰：當法其意而已。法其意，則苦所改易更革，不至乎傾駭天下之耳目，驚天下之口，而固已合乎先王之政矣。雖然，以方今之勢揆之，陛下雖欲改易更革天下之事，合於先王之意，其勢未必能也。陛下有恭儉之德，有聰明睿知之才，有仁民愛物之意，則何爲而不成，何欲而不得，而臣固以謂雖欲改易更革天下之事，合於先王之意，其勢未必能者何也？方今天下之吏才少故也。朝廷之人才，固皆簡在陛下之聰明，以臣使事之所及，則一路數千里之間，能推行朝廷之法，知其所緩急，而一切能修其職事者甚少，而不才苟簡貪鄙之人，至不可勝數，其能講先王之意以合當世之變者，蓋闔郡之間往往而絕也。夫人才不足，則陛下雖欲改易更革天下之事，以合先王之意，大臣雖有能當陛下之意而領此者，九州之大，四海之遠，萬官之衆，孰能一一推行之，使人人蒙其施者乎？臣故曰：其勢未必能也。然則方今之急，在乎人才而已。今之天下，亦先王之天下，先王之時，人才衆矣，蓋其所以陶冶而成之者有道，所謂陶冶以成之者，詩書傳記之所載，其大略可見矣。陛下嘗試詳延大臣左右及天下智能才諳之士，使其論先王所以成天下之才者，其設施之方如何，今之所以異於先王而人才不足者，其咎安在？其欲變而通之，以合於先王之意而成天下之才，宜何施爲而可？陛下因擇其言之近於理者，使之相與上下反覆爲論焉，因取其宜於時者

施焉，則人才宜衆矣。夫成人之才甚不難，人所願得者尊爵厚祿，而所榮者善行，所恥者惡名也。今操利勢以臨天下之士，勸之以其所榮，而予之以其所願，則孰肯背而不爲者？特患不能爾。而吾所以責之者，又中人之所能爲，則不能者又少矣。夫成人之才甚不難，而自古往往不能成人之才何也？以人主之才不足故也。蓋人主無恭儉之德，無聰明睿智之才，無仁民愛物之意，則嬖倖詭譎，姦罔蔽欺，殘賊放恣之人，皆得志於時，而推其類以亂天下，雖有良法，不能成天下之才矣。今陛下有恭儉之德，有聰明睿智之才，有仁民愛物之意，而又因天下之所願以爲輔相者，公聽並觀，以進退天下之士，則所以成天下之才，特患無良法，而陛下推至誠惻怛之心以行之，則臣難愚，固知人之才不難成也。人才既衆，則陛下何爲而不成，何欲而不得？夫然後改易更革天下之事，以合乎先王之意，甚易也。陛下不能如此，苟於積敝之末流，因不足任之才而脩不足爲之法，臣恐在軍者日以勞，而士民愈以窮困汗濫，而於天下國家愈甚無補也。臣幸以使事歸報，徒舉利害之一二，而無補於世，非臣之所以事陛下，倦倦之義也。輒不自知其驚下，而敢言國家之大體，伏惟陛下詳擇其中，天下幸甚也。

## 上五事劄子

陛下卽位五年，更張改造者數千百事，而爲書具爲法立，而爲利者何其多也？就其多而求其法最大，其效最晚，其議論最多

者，五事也：一曰和戎，二曰青苗，三曰免役，四曰保甲，五曰市易。今青唐洮河，幅員三千餘里，舉戎羌之衆二十萬，獻其地，因爲熟戶，則和戎之策已効矣。昔之貧者，舉息之於豪民，今之貧者，舉息之於官，官薄其息而民救其乏，則青苗之令已行矣。惟免役也，保甲也，市易也，此三者有大利害焉。得其人而行之，則爲大利，非其人而行之，則爲大害。緩而圖之，則爲大利，急而成之，則爲大害。傳曰：事不師古，以克永世，匪說攸聞。若三法者，可謂師古矣。然而以古之道，然後能行古之法，此臣所謂大利害者也。蓋免役之法，出於周官，所謂府史胥徒，王制所謂庶人在官者也。然而九州之民，貧富不均，風俗不齊，版籍之高下不足據，今一旦變之，則使之家至戶到，均平如一，舉天下之役，人人用募，釋天下之農，歸於畝，畝苟不得其人而行，則五等必不平，而募役必不均矣。保甲之法，起於三代，丘甲管仲用之，齊子產用之，鄒商君用之，秦仲長統言之，漢而非今日之立異也。然而天下之人，鳧居鴈聚，散而之四方，而無禁也者，數千百年矣。今一旦變之，使行什伍相維，鄰里相屬，察姦而顯諸仁，宿兵而藏諸用，苟不得其人而行之，則搔之以呼，追駭之以調發，而民心搖矣。市易之法，起於周之司市，漢之平準，今以百萬緡之錢，權物價之輕重，以通商而貫之，令民以歲入數萬緡息，然甚知天下之貨賄未甚行，竊恐希功幸賞之人，速求成效於年歲之間，則吾法驟矣。臣故曰三法者，得其人緩而謀之，則爲大利，非其人急而成之，則爲大害。故免役之法成，則農時不奪，而民

力均矣。保甲之法成，則寇亂息，而威勢匯矣。市易之法成，則貨賄通流，而國用饒矣。

### 議入廟劄子

臣今日會公亮傳聖旨，以臣寮上言郊祀不當入廟，令臣詳議。臣愚以爲制天下之事，當令本末終始相稱。今既奉先帝遺詔，外行以日易月之禮，又諸所以崇事祖宗，皆循本朝制度，獨於入廟則欲變先帝故事而遠從三代之禮，臣恐於事之本末終始，不爲相稱。必欲盡除近世之制度，一以三代爲法，則今陛下尙在諒陰之中，非可以制禮之時。且言者以爲喪三年不祭於廟，禮也。而今乃欲令公卿代告，此何禮也？臣竊以爲今之禮不合於三代者多矣，言者不以爲非，而專疑不當入廟者，蓋於所習見則安，於所罕見則怪，恐不足留聖聽也。臣學術淺陋，誤蒙訪逮，敢不盡愚取進止。

### 言尊號劄子

庚戌六月七日

臣伏以陛下緝熙光明，如日之方升，布利施澤，於川之方至，號名於實，豈能有所增加？輒復卷卷，妄有陳請，徒以祖宗故事，適於此時，臣子之心，懷不能已。陛下受而不拒，足以俯順人心。臣獨不能無疑者，陛下以四垂之勞，方以過爲在己，遽膺徽冊，似或未安。臣等以歸美爲忠，陛下以撝謙爲德，布之海內，誰曰不然？伏惟

聖心更賜詳酌。

### 論罷春燕劄子

臣竊以邊夷外畔，士卒內潰，吏民騷動，死傷接踵，恐非燕而用樂之時。且此月休假已多，又加兩日，卽恐急奏，或致留滯。臣愚謂宜罷燕，以副聖心仁惻，且又不妨應接機速公事。如蒙省察，乞賜中旨施行。

### 諭館職劄子二

臣伏見今館職一除，乃至十人，此本所以儲公卿之材也。然陛下試求以爲講官，則必不知其誰可；試求以爲諫官，則必不知其誰可；試求以爲監司，則必不知其誰可。此患在於不親考試以實故也。孟子曰：「國人皆曰賢，然後察之；見賢焉，然後用之。」今所除館職，特一、二大臣以爲賢而已，非國人皆曰賢；國人皆曰賢，尙未可信用，必躬察見其可賢而後用。況於一、二大臣以爲賢而已，何可遽信而用也？臣願陛下察舉衆人所謂材良而行美，可以爲公卿者，召令三館祇候，雖已帶館職，亦可令兼祇候。事有當議論者，召至中書，或召至禁中，令具條奏，是非利害，及所當施設之方，及察其才可以備任使者，有四方之事，則令往相視問察，而又或令參觀其所言是非利害。其所言是非利害，雖不盡中義理可施用，然其於相視問察，能詳盡而不爲蔽欺者，卽皆可以備任使。

之才也。其有經術者，又令講說。如此至於數四，則材否略見。然後罷其否者而召其材者，更親訪問以事。訪問以事，非一事而後可以知其人之實也。必至於期年所訪一二十事，則其人之賢不肖審矣。然後隨其材之所宜，任使其尤材良行美，可與謀者，雖皆令備訪問可也。此與用一二十大臣，薦舉不考試以實，而加以職，固萬萬不侔。然此說在他時或難行，今陛下有堯舜之明，洞見天下之理，臣度無實之人不能蔽也，則推行此事甚易。既因考試可以出材實，又因訪問可以知事情，所謂敷納以言，明試以功，用人惟已，關四門，明四目，達四聰者，蓋如此而已。以今在位乏人，上下壅隔之時，恐行此不宜在衆事之後也。然巧言令色，孔子之人能伺人意所在而爲傾邪者，此堯舜之所畏，而孔子之所欲遠也。如此人當知而遠之，使不得親近。然如此人，亦有數陛下博訪於忠臣良士，知其人如此，則遠而弗見，誤而見之，以陛下之仁聖，以道揆之，以人參之，亦必知其如此，則宜有所懲。如此則巧言令色，孔子之徒消，而正論不蔽於上。今欲廣聞見，而使巧言令色，孔子之徒得志，乃所以自蔽。畏巧言令色，孔子之徒爲害，而一切疏遠羣臣，亦所以自蔽。蓋人主之患在不窮理，不窮理則不足以知言，不知言則不足以知人，不知人則不能官人，不能官人則治道何從而興乎？陛下堯舜之主也，其所明見，秦漢以來欲治之主，未有能髣髴者，固非羣臣所能窺望。然自堯舜文武皆好問以窮理，擇人而官之，以自助其意，以爲王者之職，在於論道，而不在

於任事；在於擇人而官之，而不在於自用。願陛下以堯舜文武爲法，則聖人之功，必見於天下。至於有司叢脞之務，恐不足以棄日力勞聖慮也。以方今所急，爲在如此，敢不盡愚。臣愚才薄，然蒙拔擢，使豫聞天下之事，聖旨宣諭富弼等，欲於講筵召對輔臣討論時事，願如臣者，材薄不足以望陛下之清光。然陛下及此言也，實天下幸甚。自備位政府，每得進見，所論皆有司叢脞之事，至於大體粗有所及，則迫於日暮，已復旅退。而方今之事，非博論詳說，令所改更施設，本末先後，小大詳略之方，已熟於聖心，然後以次奉行，則治道終無由興起。然則如臣者，非蒙陛下賜之從容，則所懷何能自竭？蓋自古大有爲之君，未有不始爲憂勤而終於逸樂，今陛下仁聖之質，秦漢以來人主未有企及者也。於天下事，又非不憂勤，然所操或非其要所施，或未得其方，則恐未能終於逸樂，無爲而治也。則於博論詳說，豈宜緩然？陛下欲賜之從容，使兩府並進，則論議者衆而不一，有所懷者，或不得自竭。謂宜使中書密院迭進，則人各得盡其所懷，而陛下聽覽亦不至於煩。陛下即以臣言爲可，乞明喻大臣，使各舉所知，無限人數，皆實封以聞，然後陛下推擇召置，以爲三館祇候。其不足取者，旋即罷去，則所置雖多，亦無所害也。

一一

臣伏見某人云云，皆衆人所謂材良行美，宜蒙陛下訪問任

使者凡此九人，臣或熟聞而未識，或熟識而未敢任，或敢任其可以爲公卿。臣雖未識，然衆人之所謂賢，臣不敢蔽也。臣雖敢任其可以爲公卿，然陛下不親見其可賢，亦難遽信而用。若陛下以臣前所論奏爲合於義理，即乞悉置此九人者，以爲三館祇候，親考試其材行。若不可用，旋即罷去；若其可用，然後留備訪問。使如此，則所置雖多，未有濫得官職者。然此但臣一人所聞所知，恐執政大臣各有所聞所知。陛下若令各舉所聞所知，而如此考試，庶幾人材無所遺逸。經曰：「舉逸民，天下之民歸心焉。」善人君子者，天下之民心所願舉，欲其延問視其所在而從之者也。陛下自卽位已來，以在事之人，或乏材能，故所拔用者，多士之有小材而無行義者。此等人得志，則風俗壞，風俗壞，則朝夕左右者，皆懷利以事陛下，而不足以質朝廷之是非，使於四方者，皆懷利以事陛下，而不可以知天下之利害。其弊已效見於前矣，恐不宜不察也。欲救此弊，亦在親近忠良而已。伏惟陛下仁聖已深察此理，臣愚猶敢及此者，忠臣惓惓之義也。

### 本朝百年無事劄子

臣前蒙陛下問及本朝所以享國百年天下無事之故。臣以淺陋，誤承聖問，迫於日昃，不敢久留，語不及悉，遂辭而退。竊惟念聖問及此，天下之福，而臣遂無一言之獻，非近臣所以事君之義，故敢昧冒而粗有所陳。伏惟太祖，躬上智獨見之明，而周知人物

之情僞，指揮付託，必盡其材；變置施設，必當其務。故能駕馭將帥，訓齊士卒，外以扞夷狄，內以平中國。於是除苛賦，止虐刑，廢強橫之藩鎮，誅貪殘之官吏，躬以簡儉爲天下先，其於出政發令之間，一以安利元元爲事。太宗承之以聰武，眞宗守之以謙仁，以至仁宗英宗，無有逸德。此所以享國百年而天下無事也。仁宗在位歷年最久，臣於時實備從官，施爲本末，臣所親見。嘗試爲陛下陳其二，而陛下詳擇其可，亦足以申鑒於方今。伏惟仁宗之爲君也，仰畏天，俯畏人，寬仁恭儉，出於自然。而忠恕誠懇，終始如一。未嘗妄興一役，未嘗妄殺一人。斷獄務在生之，而特惡吏之殘撻。寧屈已棄財於夷狄，而終不忍加兵。刑平而公，賞重而信，納用諫官御史，公聽竝觀，而不蔽於偏至之讒。囚任衆人耳目，拔舉疎遠，而隨之以相坐之法。蓋監司之吏，以至州縣，無敢暴虐殘酷，擅有調發以傷百姓。自夏人順服，蠻夷遂無大變，邊人父子夫婦，得免於兵死，而中國之人安逸蕃息，以至今日者，未嘗妄興一役，未嘗妄殺一人。斷獄務在生之，而特惡吏之殘撻。甯屈已棄財於夷狄，而不忍加兵之効也。大臣貴戚，左右近習，莫敢強橫犯法，其自重慎，或甚於閭巷之人。此刑平而公之効也。募天下驍雄橫猾，以爲兵，幾至百萬，非有良將以御之，而謀變者輒敗。聚天下財物，雖有文翰，委之府史，非有能吏以鈎考，而斷盜者輒發。凶年饑歲，流者填道，死者相枕，而寇攘者輒得此賞重而信之効也。大臣貴戚，左右近習，莫能大擅威福，廣私貨賂，一有姦惡，隨輒上聞。貪邪橫猾，雖聞

或見用，未嘗得久，此納用諫官御史，公聽竝觀，而不蔽於偏至之讒之効也。自縣令京官，以至監司臺閣，陞擢之任，雖不皆得人，然一時之所謂才士，亦罕蔽塞而不見收舉者，此因任衆人之耳目，拔與疎遠而隨之以相坐之法之効也。升遐之日，天下號慟，如喪考妣，此寬仁恭儉出於自然，忠恕誠懇終始如一之効也。然本朝累世因循，末俗之弊，而無親友羣臣之議，人君朝夕與處，不過宦官女子出而視事，又不過有司之細故，未嘗如古大有爲之君，與學士大夫討論先生之法，以措之天下也。一切因任自然之理勢，而精神之運有所不加，名實之間有所不察，君子非不見貴，然小人亦得廁其間。正論非不見容，然邪說亦有時而用。以詩賦記誦

求天下之士，而無學校養成之法，以科名資歷發朝廷之位，而無官司課試之方。監司無檢察之人，守將非選擇之吏，轉徙之吏，既難於考績而游談之衆，因得以亂真。交私養望者，多得顯官，獨立於職者，或見排沮。故上下偷惰取容而已，雖有能者在職，亦無以異於庸人。農民壞於繇役，而未嘗特見救恤，又不爲之設官，以修其水土之利。兵士難於疲老，而未嘗申勅訓練，又不爲之擇將，而久其疆場之權。宿衛則聚卒伍無賴之人，而未行以變五代姑息蠲縻之俗。宗室則無教訓選舉之實，而未行以合先王親疎隆殺之宜。其於理財，大抵無法，故雖儉約而民不富，雖憂勤而國不強，賴非夷狄昌熾之時，又無旱湯水旱之變，故天下無事，過於百年。雖曰人事，亦天助也。蓋累聖相繼，仰畏天，俯畏人，寬仁恭儉，忠恕

誠懇，此其所以獲天助也。伏惟陛下躬上聖之質，承無窮之緒，知天助之不可常恃，知人事之不可怠終，則大有爲之時，正在今日。臣不敢輒廢將明之義，而苟逃諱忌之誅，伏惟陛下幸赦而留神，則天下之福也。取進止。

## 卷四十二

劄子

### 相度牧馬所舉薛向劄子

臣等竊觀自古國馬盛衰，皆以所任得人失人而已。汧渭之間，未嘗無牧，而非子獨能蕃息於周，河隴之間，未嘗無牧，而張萬歲獨能蕃息於唐，此前世得人之明效也。使得人而不久其官，久其官而不使得專其事，使得專其事而不臨之以賞罰，亦不可以成功。今臣等相度陝西一路，買馬監牧，利害大綱，已具奏聞。伏見權陝西轉運副使薛向，精力強果，達於政事，河北便鄉，陝西權鹽，皆有已試之效。今來相度陝西馬事，尤爲詳悉。臣等前奏，已乞就委薛向提舉陝西買馬及監牧公事，今欲乞降指揮，許令久任。緣今來馬價，多出於解池鹽利三司所支銀絹絹等，又許令於陝西轉運司兌換見錢，今薛向既掌解鹽，又領陝西財賦，則通融變轉，於事爲便。兼臣等訪聞得薛向陝西係官空地，可以興置監牧處

甚多，若將來有成次第，即可以漸興置。蓋得西戎之馬，牧之於西方，不失其土性，一利也。因未嘗耕墾之地，無傷於民，二利也。因向之材，而就令經始，三利也。又河北有河防塘泊之患，而土多爲鹵，不毛，戎馬所屯，地利不足，諸監牧多在此路，所占草地，多是肥饒，而馬又不堪，未嘗大段孳息。若陝西興置監牧，漸成次第，即河北諸監有可存者，悉以陝西良馬易其惡種，有可廢者，悉以肥饒之地賦民。於地不足，而馬所不宜之處，以肥饒之地賦民，而收其課租，以助戎馬之費。於地有餘，而馬所宜之處，以未嘗耕墾之地牧馬，而無傷於民，此又利之大者也。如允臣等所奏，即乞辭向所奏舉官員及論改舊弊，朝廷一切應副成功，則無受賞敗事，則無懼罰。如此則臣等保任辭向，必能上副朝廷改法之意。如將來敗事，臣等各甘同舉，取進止。

### 論許舉留守令劄劄子

臣伏奉今月二十九日，中書降到勅語：諸州知州、知軍、知縣、縣令內，有滑日不擾，而政迹尤異，實惠及民，有如係三周年或三十箇月替，到任已及成資，係二周年替，到任已及一年已上，其知州軍，許本路安撫轉運使，副周官提點刑獄，知縣、縣令，即更與本處知州軍通判並連署，同舉保舉再任，仍須於奏狀內將本官到任以來，政迹可紀實狀，一一條列，奏委中書門下，更加察訪，如不是妄舉，即進呈取旨，當議量所述政迹，及合入資序，推恩許令再

任，令臣撰勅辭者。臣竊以謂：朝廷欲使守令之宜民者久於其官，誠亦方今政務之先急。然勅意有於方今事變尙未合者，今審官除知州軍皆待一年八月闕，知縣、縣令亦大抵待闕一年以上。今若使係三年及三十月替者，已及替期，係三年替者，亦已去替期報許，即其人係三十月替者，已及替期，係三年替者，亦已去替期不遑待闕之人，亦已赴任，雖未赴任，亦多已待闕一年。方復使之遷就審官，別求差遣，即於人情，有所未安。兼朝廷欲使守令久於其官，爲其自知勢可以久，則果於有爲，而又上下相安，莫有苟且之意，則必候成資然後許之再任，執若一年以上，即皆許之舉留。如此則已除待闕之人，免往返之勞弊，而被留之守令，又早自知其當久，而於興利除害敢有所爲。所有勅詞，臣雖已具草，如以臣議爲允，只乞於所降勅語內除去「如係三周年或三十箇月替，到任已及成資，係二周年替」二十二字，取進止。

### 乞朝陵劄子

臣當仁宗皇帝英宗皇帝遷坐之時，方以遭喪疾病在外，今蒙召還，復備從官，伏見朝廷將命官朝拜諸陵，臣欲備使，冀得少紓螻蟻區區感慕之情，伏望聖慈，特賜矜許，取進止。

### 乞免修實錄劄子

臣准閣部報勅，差臣與吳允同修英宗皇帝實錄，竊緣臣於

吳充爲正親家，慮有共事之嫌，今來實錄院止關呂公著一人，臣於討論綴緝，不如吳充精密，若止差吳充一人以代公著，自足辦事。伏望聖恩詳酌指揮，所有勅牒，臣未敢受。取進止。

## 乞改科條制劄子

伏以古之取士，皆本於學校，故道德一於上，而習俗成於下，其人材皆足以有爲於世。自先王之澤竭，敦養之法無所本，士雖有美材而無學校師友以成就之，議者之所患也。今欲追復古制，以革其弊，則患於無漸，宜先除去聲病對偶之文，使學者得以專意經義，以俟朝廷興建學校，然後講求三代所以教育選舉之法，施於天下，庶幾可復古矣。所對明經科欲行廢罷，并諸科元額內解明經人數，添解進士，及更俟一次科場，不許新應諸科人投下文字，漸令改習進士，仍於京東陝西河東河北京西五路，先置學官，使之教導於南省，所添進士奏名，仍具別作一項，止取上件京東等五路應舉人，并府監諸路管應諸科，改應進士人數所貴，合格者多，可以誘進諸科，嚮習進士科業。如允所奏，乞降勅命施行。

## 廟議劄子

准中書門下奏，准治平四年閏三月八日，勅遷僖祖廟主藏之夾室。臣等聞萬物本乎天，人本乎祖，故先王廟祀之制，有疏而無絕，有遠而無遺。商周之王，斷自稷契以下者，非絕饗以上遺之

以其自有本統承之故也。若夫尊卑之位，先後之序，則子孫雖齊，聖有功，不得以加其祖考，天下萬世之通道也。竊以本朝自僖祖以上，世次不可得而知，則僖祖有廟，與稷契疑無以異。今毀其廟而藏其主夾室，替祖考之尊，而下附於子孫，殆非所以順祖宗孝心事亡如事存之義。求之前載，雖或有然，考合於經，乃無成憲。因情制禮，實在聖時。伏惟皇帝陛下仁孝聰明，紹天稽古，動容周旋，惟道之從。宗祀重事，所宜博考，乞以臣等所奏，付之兩制詳議，而擇取其當。

## 議服劄子

先王議服也，順性命之理而爲之節。恩之深淺，義之遠近，禮之所與奪，刑之所生殺，皆於此乎權之。傳曰：「三年之喪，未有知其所從來者也。」蓋暮年及總麻，緣是以爲衰，而其輕重遲速之制，非得與時變易，唯貴之於賤，或降或絕，或否。蓋在先王之時，諸侯大夫，各君其父兄，欲尊尊之義有所伸，則宜親親之恩有所屈，此其所以降絕之意也。自封建之法廢，諸侯大夫降絕之禮，無所復施，士大夫無宗，其適孫傳重之屬，不可純用周制。臣愚以謂方今惟諸侯大夫降絕之禮可廢，而適子死非傳爵者無衆子，乃可於適孫承重，自餘喪服，常用周制而已。何則？先王制服三年之喪，以爲差，非得與時變易故也。然自秦漢以來，言禮者或失經旨，而歷代承用，傳守至今，與夫近世改制，亦皆有說，非以義折衷則不



明，故臣於所欲定則，爲議以辯之。末學寡陋，獨用己見，決千歲以來之所惑，恐不能盡。伏乞以付學士大夫博議，令臣復與反復。

### 議南郊三聖並侑劄子

臣等聞推尊尊以享帝，義之至；推親親以享親，仁之極。尊尊不可以薄，故郊無二主；親親不可以僭，故廟止其先。今三后並配，欲以致孝也，而適所以瀆乎享帝。後宮有廟，欲以廣恩也，而適所以僭乎享親。推存事亡，則非所以寧親也。臣等今詳議，欲乞各如禮官所議。

### 議郊祀壇制劄子

先王所以郊於神明，壇坎、牲幣、器服、時日、形色、度數，莫不依其象類。易曰：「一陰一陽之謂道。」乾，陽物也；坤，陰物也。冬至，祀天於地上之圓丘，所謂爲高必因丘陵，而因天事天也。夏至，祭地於澤中之方丘，所謂爲下必因川澤，而因地事地也。蓋陽以圓爲形，其性動，以方爲體，其性靜。天陽而動，故祀於地上之圓丘，而祭神以蒼璧，璧亦圓也。地陰而靜，故祭於澤中之方丘，而禮神以黃琮，琮亦方也。合祀天地爲圓壇，而於國陽之地上，豈聖人以類求神之意哉？熙寧郊儀祭皇地亦壇八角，祭神州地亦壇廣四十八步，高五尺。今則變方爲圓，壇神州築方壇，而復無坎，皆不應禮。伏請皇地亦神州地亦爲方壇，壇之外爲坎，庶協古制。

### 議郊廟太牢劄子

謹按禮記王制，祭宗廟之牛角，握周禮小司徒，凡小祭祀奉牛牲。入古者，諸侯五廟，初祠烝嘗，每廟一太牢，大夫三廟，有天子之大夫，故曰「一大夫用素牛」。謂之素者，求得而用之，但不存滌而已。諸侯之耐祭用太牢，吉祭則少牢。自諸侯與天子之大夫時祭，用牲如此。然則天子之祭用牛者可知矣。唐郊祀并宗廟社稷等祭，悉用太牢，其後稍易舊制。九廟時享，有攝事，共用一犢。國朝開寶初，冬至親郊，詔有司宗廟共用犢一，郊壇用犢三。又詔其常祀，惟是天上帝用犢，自餘大祀悉以羊豕代之。嘉祐中，仁宗親禘，即每室用太牢，自餘三年親祀八室，共用一犢，有司攝事，惟以羊豕記曰：「先王之制禮也，不可多也，不可寡也，唯其稱也。是故君子太牢而祭，謂之禮。」曰君子，謂大夫以上也。夫以天下泰其禘，而廟享牲牢，用過乎儉，不可謂稱。今三年親祠而八室共用一犢，及禘享盛祭，有司攝事，而少牢則非稱。欲乞三年親祠，并時饗，有司攝事，伏請太廟每室並用太牢一貼黃，竊恐朝廷以牛數多，或乞時饗，且仍舊制，有奉聖旨，唯親祠并禘享，每室用太牢。

### 議皇地亦神州地亦不合燎燔事劄子

夫爲北郊所祭皇地亦，并神州地亦，祇合坎饗，自來卻如祭

天升煙之義，別建一壇燔祝版。臣昨累次具狀奏聞，乞行改正，雖蒙聖旨下有司詳定，又緣所定壇壝儀注，條件不少，考求典故，未能遽革。伏祝今月二十一日，神州地亦，亦依襲故常，泥飾壇燎，依舊行事。臣昨亦備述自古以來祭祀皆爲瘞坎，蓋取就下求陰之義。及考先儒所祭地亦，即無燔燎之文。伏祝國朝祀儀所載祀辭，亦曰：「瘞儀，即行燔燎之禮。」顯是從來差錯，恐瀆於神，欲乞不候議定，諸壇壝等制度，先次考正。今來瘞埋之義，更不於壇上燔燎祝版，以別天神地亦之異。上副陛下修誠致孝肅恭祠享之意。奏聞候勅，旨狀前批，送太常禮院本所，謹案古者祀天神燔柴登壇，祭皇地亦，理瘞。蓋燔柴則升煙於上，瘞埋則達氣于下，求神必以其類故也。王涇唐郊祀錄：「凡祭祀地亦，則爲瘞瘞於神壇之壬地，方深取足容物，祭訖置牲幣祝饌於其中而埋之。」熙寧祀儀，皇地亦，神州地亦，皆爲瘞壇，方一丈，高一丈有二尺。開上南出方六尺，在壇南二十步丙地，祭大社大稷，又設瘞柴於西神門外道北，以地亦而同之。天神之祀，殊悖於禮。所有今來王某起請，實合禮制，伏請自今祭皇地亦，神州地亦，大社大稷，其祝版與牲幣饋物，並瘞於壇，更不設瘞，所有皇地亦，神州地亦，瘞壇，並乞除去。

### 進鄴侯遺事劄子

臣前日伏奉聖旨，許進鄴侯遺事，今繕錄已具，其無別本參校，恐不能無脫誤。竊以宇文黑纒之中材，遇傾側窮困之時，而輔

之以區區之蘇綽，然其爲法，尙有可取。伏惟陛下天縱上智，卓然之材，全有百年無事萬里之中國，欲擗業垂統，追堯舜三代，在明道制業運之而已。如李泌所稱，豈足道哉！願求多聞，以考古今得失之數，則此書亦或可備省覽，謹隨劄子上進。

## 卷四十二

### 劄子

#### 辭男雋說書劄子

臣今日伏奉聖旨，除男雋太子中允崇政殿說書。臣雖已奏論非宜，尙未蒙恩開允。事有關於國體，豈敢冒昧不言？臣竊觀陛下卽位以來，慎惜名器，一介之任，必欲因能。講藝之臣，尤爲遴選。如勞學問荒淺，加以未吏事任，試之筮庫，尙懼不勝；論經之地，實非所據。陛下必欲誤加獎擢，實恐上累知人任使之明，伏乞聖慈，察臣懇款，追還成命，以合衆論之公。取進止。

#### 辭男雋授龍圖劄子三道

臣伏承聖恩，以修撰經義罷局，除臣男雋龍圖閣直學士。臣雖已懇辭，未蒙昭察。伏念臣男雋誤受陛下知獎，特以粗知承學，比奉聖旨，撰進經義，尙未了畢，遂自太子中允崇政殿說書，擢授

右正言充天章閣待制兼侍講。當是時，所叨恩命，已駭衆人親聽。在臣父子，已所難安。伏蒙宣諭，令臣更勿辭免，臣亦以謂聖恩錄進書微効，遂不敢辭。自爾以來，勞以疾病隨臣，不復與聞經義職事。今茲罷局，在勞更無尺寸可紀之勞，不知何名，更受賢賞。非特於臣父子私義所不敢安，竊恐朝廷賞罰之公，如此極爲有累。伏望聖慈，察臣懇悃，追寢誤恩，非特臣父子曲蒙保全，亦免衆人於聖政有所譏議。

一一

臣伏奉詔書，以臣乞免臣男勞恩命，未賜允俞，臣之懇款，已備前陳。螻蟻微誠，未能昭徹。然國家之賞典，務在報功，施之非宜，實累國體，非特在臣父子私義所不敢安。伏惟大明無所不燭，察臣非敢妄干聖聽，早賜追寢誤恩，謹再具劄子，陳免以聞。

一二

臣近累具劄子，辭免臣男勞恩命，伏蒙聖慈，特降詔書不允者。臣之懇誠，已具前奏，聖恩深厚，未卽矜從。在臣區區，實不寧處。如臣叨昧，尙所難勝。況又賤息，何名享此賞而無勳，累國實多。伏望聖慈，察臣父子皆荷陛下全度之至恩，所以上報，生當隕首，死當結草而已。謹三具劄子，陳免以聞。

進字說劄子

臣在先帝時，得許慎說文古字，妄嘗覃思，究釋其意，冀因自竭，得見崖略。若矚視天終而罔然，念非所能，因畫而止。頃蒙聖問，俯及退復，阻勉討論，賴恩寬養，外假歲月，而桑榆憊耗，久不見功。甘師顏至，奉被訓勅，許錄臣愚妄謂然者，繕寫投進。伏惟大明燭無，豈臣瑩燭所敢徇冒，承命遑迫，置慚無所，如蒙垂收，得御宴開，千百有一，儼符神旨，愚所逮及，繼今復上，干汗宸展，臣無任。

乞改三經義誤字劄子二道

元豐三年八月二十八日

奉聖旨宜令國子監依所奏照會改正

臣頃奉勅，提舉修撰經義。而臣聞識不該，思索不精，校視不審，無以稱陛下發揮道術，啓訓天下後世之意。上孤眷屬，沒有餘責，幸蒙大恩，休息田里，坐竊榮祿，免於事累。因得以疾病之間，考正誤失，謹錄如右。伏望清燕之間，垂賜省觀。儻合聖心，謂當刊革，卽乞付外施行。臣干冒天威，無任云云。取進止。

尙書義

【皋陶】：按見其「惡」，當作按其見「亞」。益稷「故」懋使之化，當作「則」懋使之化。

微子純而不雜，故謂之犧，「犧」當作「輕」。完而無傷，故謂之輕，「輕」當作「犧」。

洪範：「有器也，然後有法，此書所以謂之範者，以五行爲宗故也。五行猶未離於形，而器出焉者也。擴而大謂之弘，積而大謂之合，而大謂之洪，此書合五行以成天下之大法，故謂之洪範也。」已上七十一字，今欲刪去。

又云：「陶復陶穴，尙矣，後世易之棟宇，而其官猶曰司空，因其故，不忘始也。」已上二十六字，今亦欲刪去。

周官唐虞稽古字上，漏「曰」字。

### 周禮義

小宰：其財用上，「其」字當作「共」。

大府：「受藏之府，則若職內掌邦之賦入是也。受用之府，則若職歲掌邦之賦出是也。」已上三十字，今欲刪去。

黨正歲屬其民者四，「四」當作「五」。

誦訓：以詔王親事，當去「王」字。

典瑞：手足腹背，「手」當作「首」。

家人：「山林之尸，則以山虞。」已上八字，今欲刪去。

衡僕：掌萬民之復，「復」當作「逆」。

大馭：有軌也，「軌」當作「軌」。

大行人：「三公八命，出封加一命，則謂之上公。」已上十

四字，今欲刪去。

### 詩義

北風：「北風以言其威，雨雪以言其虐。涼者，氣也。啗者，擊也。霧蓋言聚，霏蓋言散。氣之所被者近，擊之所加者遠。聚則一方而已，散則無所不加。此言其爲威虐，後甚於前也。」已上六十三字，今欲刪去。改云：「北風之寒也，而以爲涼，北風之厲也，而以爲啗，此以言其爲威。雨雪之散也，而以爲霧，雨雪之集也，而以爲霏，此以言其爲虐。」

君子偕老，玼兮玼兮，其之翟也者，服之盛也。「服之盛」字下，今欲添「質宜之」三字。又云：「璫兮璫兮，其之展也，蒙彼繡紵，是泄衿也者，亦服之盛也。」「亦服之盛」字上，欲減「亦」字。「服之盛」字下，欲添「文宜之」三字。

定之方中，說於桑田者，「者」當作「則」。

干旄：「州里之士所建，今欲改爲「鄉黨之官所建」。

有女同車，公子五爭，「爭」當作「爭」。

駟鐵：駟馬既閑，「駟」當作「四」。

慕門：食樞而甘，「樞」當作「蕙」。

七月：「去其女桑而猗之，然後柔桑可得而求也。」已上十六字，今欲刪去。改云：「承其女柔而猗之，然後遠揚可得而伐也。」

又：蠶月者，非一月，故不指言某月也。下添云：「蠶，女事也，故稱月焉。」

又云：「猗薪之也，言猗女桑，則遠揚可知矣。言伐遠揚，則女桑可知矣。皆伐而猗之也。」已上三十字，今欲刪去。

車攻：「書其連絡布散衆多，若奔棋然。」已上十二字，今欲刪去。

小旻：發言盈廷，「廷」當作「庭」。

桑扈：受福不躬，「躬」當作「那」。

生民：麻麥豫豫，「麥」當作「麥」。

公劉：「篤」之字从竹从馬，馬行地無疆，以竹策之，則力行而有所至。篤之爲言力行而有所至也。已上三十四字，今欲刪去。

卷阿：藹藹然盛多，「然」當作「其」。又云：「故次以既醉太平也名。」「太平」二字，今合刪去。

召曼：昏非所以爲「哲」字上，漏「明」字，今合添。時邁：「政之所加孰敢不動懼」今欲改云：「政之所加孰敢不震動疊息。」

那馨：管將將，「管」當作「筦」。

一

臣近具劄子，奏乞改正經義，尙有七月詩「剝膚者，剝其皮

而進之養老故也」十三字，謂亦合刪去。如合聖心，亦乞付外施行。取進止。

### 論改詩義劄子

臣子奉聖旨撰進經義，臣以當備聖覽，故一一經臣手，乃敢稱御。及設官置局有所改定，臣以文辭義理，當與人共，故不敢專守。已見爲是，既承詔頒行學者，頗謂所改未安。竊惟陛下欲以經術造成人材，而職業其事，在臣所見，小有未盡，義難自默。所有經置局改定諸篇，謹依聖旨具錄新舊本進呈。內雖舊本，今亦小有刪改處，并略其所以刪復之意，如合聖旨，即乞封降檢討。呂升卿所解詩義，依舊本頒行，小有刪改，即依聖旨指揮取進止。

### 答手詔言改經義事劄子

九月十日

臣伏奉手詔，依違之舉，臣愚所不敢逃。然陛下既推恩惠卿等，而除其所解，臣愚不敢安。此若以其釋說有甚乖誤者，實臣更加刪定，臣敢不祇承聖訓，取進止。

### 改撰詩義序劄子

臣伏奉手詔，以臣所進三經義序，有過情之言，宜速刪去。臣雖嘗敷奏，以爲文字所宜。又奉聖訓再三，但令序述解經之意，不須過有稱道。伏惟皇帝陛下盛德至善，孚於四海，非臣筆墨所能

加損然因事宣著人臣之職也誠以言之不足爲懼不以近於媚  
諛爲嫌而上聖所懷深仁謙損臣敢不奉承詔旨庶以仰稱堯禹  
不爭不伐之心所辭撰到詩義并前進書周禮義序謹隨劄子投  
進昧冒天明臣無任

### 乞以所居園室爲僧寺并乞賜額劄

子

臣幸遭興運超拔等夷知獎眷憐逮兼父子戴天負地感涕  
難勝顧迫衰殘糜捐何補不勝螻蟻微願以臣今所居江寧府上  
元縣園屋爲僧寺一所永遠祝延聖壽如蒙矜許特賜名額庶昭  
希曠榮與一時仰憑威神誓報無已

### 乞將田割入蔣山常住劄子

臣父子遭值聖恩所謂千載一時臣榮祿既不及於養親勞  
又不幸嗣息未立奄先朝露臣相次用所得祿賜及蒙恩賜勞銀  
置到江寧府上元縣荒熟田元契共納苗三百四十二石七斗七  
升八合釐一萬七千七百七十二領小麥三十三石五斗二升柴  
三百二十束鈔二十四貫一百六十二文省見託蔣山太平興國  
寺收歲課爲臣父母及勞營辦功德欲望聖慈特許施充本寺常  
住令永遠追薦昧冒天威無任祈恩屏營之至取進止

### 謝宣醫劄子

食浮颺災自取危疾敢籲天聽上煩愍憫不圖聞徹特冒慈  
憐亟遣內臣挾醫馳降臣背瘡餘毒卽得仇齋敷貼平完尙以風  
氣冒悶言語蹇澀又賴杜王診療尋皆痊愈臣迫於衰暮自分捐  
沒聖時朽穢更生實叨殊賜戴天荷地感涕難言臣瞻望闕庭不  
任屏營汎瀾激切之至

### 卷四十四

劄子

### 乞解機務劄子

臣以羈旅之孤蒙恩收錄待舉東府於今四年方陛下有所  
變更之初內外小大紛然臣實任其臆非賴至明辨察臣宜誅  
斥久矣在臣所當圖報豈敢復有二心徒以今年以來疾病浸加  
不任勞勩比嘗粗陳懇款未蒙陛下矜從故復困勉至今而所苦  
日甚一日方陛下勵精衆治事事皆欲盡理之時乃以昏疲久尸  
宰事雖聖恩善貸而舉彙日滋至於不可復容則終上累陛下知  
人之明非特害臣私義而已臣所以昧冒有今日之乞也伏率宣  
諭未賜哀矜彷徨屏營不知所措然臣所乞固已深慮熟計而後

敢言，與其廢職而至誅，則寧違命而獲譴。且大臣出入，以均勞逸，乃是祖宗成憲。蓋國論所屬，怨惡所歸，自昔以擅其事，鮮有不遭舉黜。然則祖宗所以處大臣不爲無意也。臣備位亦已久矣，幸蒙全度，偶免譴呵，實望陛下深念祖宗所以處大臣之宜，使臣獲粗安，便異時復賜驅策，臣愚不敢辭。

一一

臣某螻蟻微誠，屢煩天聽。每蒙訓答，未賜矜從。惶怖怔營，不知所措。臣今日奏對，近於日旰，不敢久留，以勤聖體。所以依違遂退，卽非敢食其言。以道事君，誠爲臣之素守，苟可強勉而免違忤之辜，臣亦何敢必其初心。實以疾病浸加，恐墮陛下所付職事。上累陛下知人之哲，下違臣不能則止之義。此所以彷徨迫切，而不能自止也。且臣所乞，特冀暫均勞逸，非敢遂卽田里之安。竊謂聖恩不難賜許，謹具劄子陳乞，伏望聖慈特垂開允。

一二

臣今日得望陛下清光，伏蒙敦諭煥發，可謂備厚矣。臣雖愚戇，豈敢忘陛下至恩盛德。然臣之懇款，亦已具陳，實望陛下照察哀憐，使臣得休養其疲骨，以免曠職之負，而不累陛下知人之明也。臣千忤天威，無任惶怖之至。

四

臣今日伏蒙陛下令呂惠卿宣道聖旨，又令馮宗道隨賜手詔，趣令復位。眷顧之厚，非臣殺身所能上報。然臣不才，無補時事，肝鬲狼狽，已具而陳。君臣之義，實均父子，苟尙可以阻勉，豈敢輕爲去就。誠以義不獲已，須至昧冒天威。陛下至仁，常恐一物失所，況臣特蒙獎擢，久備驅策，夙夜之勞，簡在聖心，豈容不思。所以全安之，而令終於訕躓也。伏望哀憐，匹夫之志，有不可奪，早賜處分。臣無任瞻天祈恩激切之至，取進止。

五

臣伏蒙聖恩，特降中使傳宣，封還所上表，不允所乞。臣誠惶誠感，不知所措。竊念臣蒙陛下恩德，至深至厚，方陛下旰食焦思之時，豈宜自求安佚，實以疾疢所嬰，曠廢職事，若不早避賢路，必且仰誤任使。狼狽所懇，具如前奏，伏惟陛下天地父母，曲賜矜憐，察臣于祈出於甚不得已。臣生當隕首，死當結草。謹再具劄子陳乞，臣無任惶怖懇迫祈恩之至。

六

臣伏奉聖恩，特降中使令臣入見供職。臣之懇誠，略已昧冒，天聽高遠，未蒙垂憫。輒復陳紱，仰冀哀憐。伏念臣孤遠班賤，蒙之

所棄，陛下收召拔擢，排天下異議，而付之以事，八年於此矣。方陛下興事造功之初，臣未喻聖志，臣當是時志存將順，而不知高明疆禦之爲可畏也。然聖慮遠大，非愚所及。任事以來，乖失多矣。區區夙夜之勞，曾未足以酬萬一之至恩。今乃以久擅寵利，羣疑並興，衆怨總至，舉惡之釁，將無以免，而天又被之疾狀，使不意氣昏惰，而體力衰疲，雖欲驅勉以從事，須臾勢所不能。然後敢干天威，乞解機務，竊以謂陛下天地父母，宜垂矜憐，論其無功，則雖可誅，閱其有志，則或宜宥。終始全度，使無後艱。而未蒙天慈，顧哀猶欲輒以重任，使臣黽勉，尙能有補聖時，則雖滅身毀宗，無所避懼。顧念終無成效，而方以危辱上累朝廷，此臣所以不敢也。陛下明並日月，何所不燭，願賜容光之地，稍委照焉，則知臣之惓惓，非敢苟忤恩指也。臣乞且於東府聽候朝旨，伏望陛下垂恩，早賜裁處，臣不任昧死千祈激切之至。

### 謝手詔慰撫劄子

臣昨日伏奉手詔，所以慰撫備厚，非臣疵賤之所宜蒙，伏讀不任感激屏營之至。今日臣第具宣聖旨，臣雖糜驅隕首，豈能上酬獎遇。臣自江南召還，獲侍清光，竊觀天錫陛下聰明睿智，誠不難興堯舜之治，故不量才力之分，時事之宜，敢以不肖之身，任天下怨誹，欲以奉承聖志。自與聞政事以來，遂及期年，未能有所施爲，而內外交構，合爲沮議，事欲謬民，以惑聖聽，流俗波

蕩，一至於此。陛下又若不能無惑，恐臣區區終不足以勝，而久妨衆邪之路，則或謬罔出於不意，有甚於今日，以累陛下知人任使之明，故因疾輒求自放。陛下不以臣狂獷賜之舉，而屈至尊之意，反復誨諭，臣豈敢尙有固志，以煩督責。只候開假，卽入謝區區所懷，冀得面奏，臣無任感天荷聖激切屏營之至。謹具劄子奏知。

### 謝手詔訓諭劄子

臣以不才，久曠高位，昧冒求解，屢煩聖聽，曲蒙矜允，實尙至恩。繼奉手詔，俯垂訓諭，非臣隕首所能報稱。伏惟陛下躬堯舜盛德，與千載一隆之政，以福休斯民，萬邦黎獻所願致死。况臣疎遠疵賤，首蒙察舉，陛下任之至重，而眷之至優，一旦遠離，誠非獲已。苟異時陛下未賜棄絕，而臣犬馬之力尙足以效，則豈宜背負恩德，長自絕於聖時哉。臣瞻天荷聖，無任激切之至。

### 答手詔封還乞罷政事表劄子

臣今日具表，乞罷政事，方屏營俟命，而呂惠卿至，臣第傳聖旨，趣臣視事。續又奉手詔，還臣所奉表，喻以天下之事，盡力固可成就，以卿所學，不宜中輟。伏讀不勝螻蟻區區感慚惻怛之至。臣蒙拔擢，備數大臣，陛下所以視遇不爲不厚矣。豈敢輕爲去就，誠以陛下初訪臣以事，臣卽以變風俗立法度爲先，今待舉期



年而法度未能一有所立，風俗未能一有所變，朝廷內外，詖行邪說，乃更多於鄉時。此臣不能啓迪聖心，以信所言之明効也。雖無疾疾，尙當自勦，以避賢路；況又昏眩難以看讀文字，卽於職事當有廢失。雖貪陛下仁聖卓然之資，冀憑日月末光，粗有所成而自計如此，豈容偷假名位，坐棄時日，以負所學，上孤陛下責任之意。伏望陛下哀憐矜察，許臣所乞，毋令臣得要君之嫌，重爲流俗小人所毀，臣不勝祈天俟聖激切之至，取進止。

### 答手詔令就職劄子

臣累奏乞解機務歸田里，伏奉手詔，令臣無復有請，祇服聖訓，便宜就職。然臣所以致身許國，正欲行事君之義而已，若致身於辱殆之地，以累陛下知人之明，而令天下後世譏議及國，則非臣所學事君之義也。昔仲山父既明且哲，以保其身，故宣王有任賢使能中興之功。臣既不自知，又昧於知人，信己妄行，以至今日，免於大戮，實陛下天地父母之賜也。若猶冒恩，不卽自弛，終恐傷陛下保全臣子之仁，是以不敢伏望陛下哀臣懇至，特賜矜許，臣無任瞻天祈恩激切之至，取進止。

### 答手詔留居京師劄子

臣伏奉手詔，欲留臣京師，以爲論道官，宜體朕意，速具承命奏來。臣才能淺薄，誤蒙陛下拔擢，歷職既久，無以報稱，加以精力

衰耗，而咎愆日積，是以冒昧乞解重任，幸蒙聖恩已賜矜允，而繼蒙恩遣呂惠卿傳聖旨，欲臣且留京師，以備顧問。臣竊伏惟念父子荷知遇，誠不忍離左右，既又熟計論道之官，固非所宜，且以置之閑地，似爲可處。陛下付託，既已得人，推誠委任，足以助成聖治。臣義難以更留京師，以速官謫。若陛下付臣便郡，臣不敢不勉，至於異時或賜驅策，卽臣已背面奏，所不敢辭。伏望聖心特賜矜察，臣無任感天荷聖激切怔營之至，伏取進止。

### 辭僕射劄子

臣伏奉制恩，以提舉修撰經義了畢，特授臣尙書左僕射兼門下侍郎，加食邑實封，承命惶怖，已曾面辭，宣諭稠疊，未垂聽允。伏念臣特蒙陛下知遇任使，實以稍知經術，叨墜非一，每愧無功，更以訓釋微勞，過受褒遷殊禮，格之公論，孰以爲宜。況在私誠，尤難安此。伏望陛下俯昭愜悞，特賜哀憐，追還誤恩，以保危拙。謹具劄子陳免以聞。

### 二

臣近具劄子，辭免恩命，伏蒙聖慈特降詔書不允者，區區所陳，備出肝膈，重煩睿訓，以懼以慚。伏念臣蒙恩自外召還，復與得聞政事，智衰毫及，筋力弗支，仰惟駿德之日躋，深懼薄材之難副。雖未敢以妨賢自弛，願豈宜以非分妄遷，賞浮於勞，實累國體，豈

惟私議所不敢安。伏望聖慈，深以保全臣子爲念，早賜追還成命，以允中外論議之公。謹再具劄子陳免以聞。

### 三

臣近累具劄子，辭免恩命，伏蒙聖慈特降詔書不允者。容訓丁寧，豈宜遺慢。顧惟懇款，實有可矜。忤天威，良非獲已。伏念臣出於孤遠，遭值聖時。弱力而重任，薄功而厚享。夙興夜寐，深懼顛隲。豈敢非分，更叨殊獎。且方陛下發明經術，啓迪人材，而臣偶以乏人，遂當器使。遺經殘缺，既不易知，聖學高明，又難仰副。雖已強顏應詔，實恐難以頒行。豈意天度包荒，藏疾，賢崇獎勵，在所難勝。隆備尙學，誠陛下盛德量能知分，亦臣之私志。伏望聖慈俯照誠悃，以其終難味冒，早賜追寢，誤恩。謹三具劄子，陳免以聞。

### 乞宮觀劄子

臣某頃被召還，復汙宰司，行以充滿易墜，事以衰疾多廢，幸蒙恩釋重容，尙兼將相之官。自惟憂傷病疾之餘，復當辭劇就閒之日，過叨榮祿，非分所宜。聞勉方州，亦將不逮。故因賜對，輒預奏陳。俟到江寧，須至上煩聖慮，乞以本官外除一宮觀差遣。於江寧養疾，過蒙眷獎，喻以毋然，非臣癡頑所能仰稱。而臣自離闕庭，所苦日侵，目眩頭昏，背寒膈墮，加之喘逆，稍勞輒劇。若非蒙恩許免藩任，且令休養，卽恐瘳復無期。輒敢昧冒天威，具陳前日悃愾，伏

望陛下特垂睿聽，俯亮愚誠，早賜矜從，使得寧濟。卽異時稍堪驅策，誓復罄竭疲駑。臣無任。

### 一

臣某近輸悃愾，仰丐恩憐，忤天威，方懷憂畏。伏蒙聖慈，特遣使人賚賜訓勅，諭以至意，撫存顧念，逮及存沒。負荷恩德，無以勝任。瞻望闕庭，唯知感涕。然臣之懇懇，實有可言。伏念臣抱疾以來，衰疲浸劇。若聞勉從事，必不能上副憂勤，而應接之勞，適足以自妨休養。又地閔祿厚，非分所宜。聖心雖示優容，臣終難於叨味。伏望陛下俯垂燭察，早賜矜從，他日布獲夷嶽，餘年敢辭驅策。臣無任。

### 三

臣某比因馮宗道還闕，已具輸區區螻蟻之情，繼蒙撫存，曲賜訓諭。臣誠惶誠感，已具表稱謝以聞。竊惟天慈終始眷憐，故欲賦以厚祿，示以優禮。不然一州之守，豈憂付屬乏人。臣憂患餘生，加之疾病，喘揚朝夕，雖冀久存。陛下所以愛臣，何啻天地父母。令臣多尸廩賜，重貽充滿之殃。豈若賜以安閑，使有寧謬之福。伏望深垂簡照，早賜矜從，他日膂力復可驅馳，敢不致死以圖報效。臣無任。

四

臣某備位七年，初無分毫績効，以病自列，獲解繁機，而誤恩曲加，寵祿并過，豈臣庸朽所可堪任？況自涉春以來，衆病并作，氣滿力憊，殆不可支。其勢如此，以尸厚祿，則有食浮之憂；以任州事，則有官曠之責。計臣之分，無一可爲，故願乞其不肖之身，休養歲月。而輿書繼至，訓勅加嚴。雖陛下示眷獎之意，始終不逾，而臣竊自度量，終難阻勉，以稱萬一。俯仰踟躕，不知所言。帆復十冒天威，期於得請而後已。伏望陛下深垂簡照，早賜矜從。他日若獲寧瘳，願雖晚節末路，尙知補報。惟所驅策，豈敢辭免。除已具表，謹具劄子陳乞。臣無任。

五

臣某近四上表，乞以本官外除一宮觀差遣。伏蒙聖慈特降詔書，不允所乞，仍斷來章。螻蟻之微，頻煩寵諭。臣之懇誠，已具累表。愚衷激切，終冀矜從。伏念臣荷國厚恩，未報萬一。若非疾苦不能任事，豈敢數違訓勅，以自取違慢之誅。但以病勢日增，雖外視形色，若無甚苦，而神耗於中，力乏於外，一有動作，即不可支。思慮恍然，事多遺忘。以此居官，豈能塞責。且一方之任，非獨讀書獄訟在所省察；至於儆戒盜賊，輯安兵民，責在守臣，事實至重。此豈精神衰耗，體力疲憊之人所可堪任？伏望陛下加惠留聽，察其所請。

出於誠然，早賜開允。則非獨於臣私分得以自安，亦於陛下任使之際，無曠官廢事之悔。臣愚不勝至願，謹復具劄子陳乞。臣無任。

求退劄子

臣伏奉手詔，令臣二十三日入見。臣明日當入見，然臣之懇款，具如前奏所陳。匹夫之志，有不可奪。實望聖慈，必賜矜從。

已除觀使乞免使相劄子

臣某衰疾疲曳，難於自力，于願天聽。至於三四，遭漫調獎，舉當誅殲。伏奉勅命，就除觀使。俯從燕安之願，欲猶假非分之名器，鴻慈覆載，不啻天地，感激涕洟，無言以諭。然以將相之祿，養疾於田里，歷選近世勳賢，未有若斯比例。臣愚無狀，績効不昭，欲以何名，敢此叨味。且臣蒙陛下譏拔，序之羣臣之右，常以粗知分義，爲異庸人。今若以衰殘向盡之年，食非所據，豈不自贖素守，而仰累陛下知人之明。伏望聖慈察臣累奏，許以本官充使於江寧府居住，冀蒙瘳復，終終摩摺。所有勅命，臣未敢祇受。除已具表，謹復具陳乞以聞。干忤天威，臣無任。

一

臣某伏奉詔書，不允所乞，祇荷聖訓，丁寧備至，非臣庸朽所以堪稱。伏自惟念臣以疾病，不勝從事之勞，而欲自休養，退歸田

里乃分之宜。尙恃眷憐，私竊自恕，而求以本官食官觀之祿於外，於臣之義，媿負已多。而陛下乃欲使之兼將相之重，而處於此，雖仰戴恩德，爲至厚矣。而臣歷選前代，近至本朝，所以寵待勳舊之臣，無有斯比。況臣久尸重任，績効不昭，豈可度越前人，有此叨據？是且上虧陛下名器，不以假人之道，下傷愚臣知止之義。伏望特垂容聽，早賜允從，則非獨於臣私分，得以自安，亦於天下公論爲協。除已具表，謹復具劄子陳乞以聞。臣無任。

### 三

臣某近以懇誠，上干天聽，伏蒙聖慈，特降中使，賚賜詔書，仍斷來章，臣以朴愚，久通明命，舉譴之及，所不敢辭。而陛下加惠寬矜，慰喻備至，仰荷天地厚恩，非臣殞越所能報稱。然臣之懇懇，亦素具聞，分義既所難受，臣亦何敢自己竊惟人君之御臣，以其任隆而責重，故委之高爵重祿，而無媿。此上下所以兩得而能治安也。今臣既以疲瘵退歸閭里，尙恃陛下眷存，謂其嘗預政事，有夙夜之微勤，故敢求以本官食官觀之祿于外，已於理分爲所非宜。而陛下乃疏課恩，使兼將相之重。臣愚不肖，病不任事，願於陛下勸精求治之時，不能自力以裨補萬一，而坐尸名器，如此其厚，人臣之出力赴功，方任隆責重，而有勳勞者，陛下將復何以處之？此臣所以不敢也。臣若苟食，仰副訓勅，而不知慮此，則非獨於臣私義無以自全，亦於國家大體所損非細，故復冒昧，期於得請而後

已。伏望陛下始終念察，早賜聽許，則非獨臣爲幸。臣無任。

### 四

臣某近再以懇誠，上干睿聽，適蒙明訓，方虞譴適；伏蒙天慈，特差臣弟某賚賜詔書，不允所乞，傳諭德意，撫存備厚。仰荷天地至恩，捐軀陷首，無以上報。伏自惟念臣以衰病無勞之身，得請於外，雖能爲上陳大任一方之寄，以忝將相，尙爲非分。況今蒙恩寬假，得就燕閒，豈可坐而尸此，以養痾田里之中？此臣所以不敢忘止足之義，而自取矜始也。所懷懇激，已具累奏。雖陛下中加獎勸，恩德有隆，而愚臣竊自揣稱，終無可以叨昧之理。伏望陛下俯垂閎察，早賜開允，則非獨臣爲幸甚。除已具表，謹復具劄子陳乞以聞。臣無任。

### 宣諭蘇子元劄子

臣適已見蘇子元具宣聖旨，然兵事貴速，憂在失時。恐子元往不如期郵行之疾，亦恐子元道路偶或有故稽留，則無及事。臣愚謂宜速中賜郭遠等劄子，更錄付子元，令中諭曲折。

### 卷四十五

#### 內制

冊文 表本 青詞

### 郊祀昊天上帝册文

伏以眷命作邦，百年於此。蒙休承福，外內用寧。施及沖人，嗣膺繼服。燎禮有典，稱秩惟時。

### 郊祀皇地祇册文

伏以大報于郊，有典成秩。厥作成物，配天同功。合食泰壇，義存一體。猥以沖眇，紹休前人。絜承昭事，不敢不察。

### 郊祀配帝太祖皇帝册文

伏以命于帝廷，肇造區夏。掃除僭悖，人以永寧。陟配天郊，實存舊典。靈承圭薦，其敢忘初。

### 朝享景靈宮聖祖大帝册文

伏以靈德在天，實基皇命。降依下土，臨況後人。方以眇躬，進承郊廟。神遊所御，獻享惟時。庶幾顧歆，永有蒙賴。

### 朝享仁宗皇帝册文

伏以體道邁德，龍綏臣民。休嘉丕延，燕及于後。肆以寡昧，獲承郊宮。裸饋有儀，敢忘用舊。

### 朝享英宗皇帝册文

伏以靈德美行，實兆初潛。神民所歆，實命自至。祗紹考服，循而弗改。用謚土宇，以詒沖人。登祔新宮，歷茲嘉月。燎禮有舊，獻享惟時。

### 皇后册文

維熙寧二年，歲次己酉，四月丁酉朔，二十六日壬戌，皇帝若曰：自昔有天下，必擇建厥配，以承宗廟，以御家邦。肆朕受命，奉循前烈，考慎典冊，以祈協于神民。咨爾向氏，懿柔淑恭，舊有顯聞。肇功惟祖，弼亮帝室。流德之澤，覃延後嗣。是產碩媛，比賢姜任。越朕初載，來嬪藩邸。恩饋在中，率禮無違。以至嗣服，祇承內事。齋明夙夜，罔有曠失。宜崇位號，表正宮庭。今遣攝太尉，推忠協謀同德佐理功臣，樞密使光祿大夫，檢校太傅，行尚書刑部侍郎，上柱國東平郡開國公，食邑五千戶，食實封一千戶呂公弼，據司徒朝散大夫，右諫議大夫，參知政事，護軍太原郡開國侯，食邑一千一百戶，賜紫金魚袋王珪，持節冊命爾為皇后。夫惟興王，釐厥士女，咸自內始，達于四海。朕克勤人用弗怠，朕克儉人用弗奢。朕克正人用無敢側顧，爾勳朕相，乃濟登茲。於戲！厥初惟理，惟慎厥終，爾忱念茲。朕以永享天祿，爾亦豫膺無疆之福，豈不驩哉。

## 先天節皇帝謝內中露香表

伏以眇躬無似，實膺駿命之休；釐事有初，敢廢靈承之舊。冀蒙優聖俯監齋禱。

## 天貺節皇帝謝內中露香表

伏以靈命皆休，嘉名紀節；用霽熏之故事，酬乾施之至恩。仰賴監臨，俯垂歆祐。

## 降聖節皇帝謝內中露香表

伏以昊天錫命，實祐永圖；良月御時，載臨嘉節。率循故事，升屬至誠。仰冀靈明，溥垂庇服。

## 冬至節皇帝謝內中露香表

伏以四氣隨旋，一陽來復；仰瞻穹昊，祇薦芬香。所冀含生，並蒙垂福。

## 南郊青城皇帝問太皇太后皇太后

### 聖體表

臣名言自宮徂郊，夙夜祇事。方此寒沍，闕於定省。伏惟比日，慶食宜加。

## 太皇太后回答皇帝問聖體書

太皇太后致書于皇帝：奉祠郊宮，爲國大事。夙興夜寐，固已勤勞。勉慎節宜，以膺禧福。

## 皇太后回答太廟皇帝問聖體書

太后致書于皇帝：躬率羣臣，肇見祖考，孝思之至，何以自勝！尙慎興居，以保休福。

## 寒食節起居永定陵宣祖諸陵等處

### 表

伏以榆火戒時，柏城在望。薦豆籩之新物，弗獲躬親；象几席之平居，實存館御。蠲烝有舊，緼慕無窮。

## 寒食節起居諸陵昭憲等諸后表

伏以桐華伊始，火令載嚴。獲嗣慶圖，仰蒙慈庇。追淑靈而莫逮，歷時序以增思。

## 中元節三陵起居諸后表

伏以素秋伊始，華月既盈。物御氣以夷傷，心感時而悽愴。伏惟尊謚皇后，惠風無戢，慈範有詒。猥以眇沖，仰承慶裕。瞻幽靈之

所宅，結永慕之至懷。

### 八月一日永昭陵旦表

伏以昇往御時，宵中應律，載班秋朔，申薦廟嘗。伏惟尊證皇帝，體道成乾，施仁應物，率土方函於聖化，賓天遽愴於神遊。追龍駕於三衢，莫知所稅，瞻鳥耘之新隴，但有至懷。

### 十月一日永昭陵奏告仁宗皇帝旦表

伏以月乘該闋，時御閉藏，歲回薄以將更，物盛多而可享。恭惟尊證皇帝，德符寫昊，功濟黎元，方求大隗之居，遂兆成周之葬。光靈在望，感惻交懷。

### 十月一日起居永安陵等處諸陵表

伏以日星隨旋，歲月從邁，物更收斂之候，人積悽愴之懷。恭惟尊證皇帝，躬容廣之材，撫休明之運，協九皇而高世，追三后之在天。方以眇躬，嗣膺神器，想威靈之如在，感氣序以增歎。

### 十月一日起居永安陵等處諸后陵表

伏以哀恫在疚，未盡通喪。弦嘒如流，載更良月。恭惟尊證皇

后，降釐媯內，播美河洲；著慈範以如存，流徽音而可想。邇陵永望，感節深追。

### 冬至節上諸陵表

伏以氣復黃宮，晷移北陸，物驗土灰之應，官修雲物之占。恭惟尊號皇帝，容廣應期，休明作乂，收功既往，靈範方來。感時序之變流，想威靈而慘結。

### 冬至節上諸皇后陵表

伏以四時交御，一氣潛萌，慶雖屬於履長，悲豈忘於追慕。恭惟尊證皇后，升儷尊極，協成修明。德範有詒，方美王雎之攀；容衣不闕，尚瞻綸翟之華。永想光靈，詎勝摧感。

### 寒食節上南京鴻慶宮等處太祖諸帝表

伏以火禁崇修，春祺溥被，維是奉黍之禮，適當濡露之時。恭惟尊證皇帝，德協上穹，功施後裔，儻神鄉而弗反，歟聖像以如存。緬慕威靈，載懷感怵。

### 中元節起居外州諸宮觀諸帝神御殿表

伏以夷則御辰，商聲市協，望舒戒節，陰魄既盈。伏惟尊號皇帝，道邁往，恩涵品彙，於屬車之所御，有原廟之舊儀。方此戒寒，豈勝追遠？

### 中元節起居諸陵表

伏以方秋厥初，既月之望，昊天始肅，繁露未晞。伏惟尊號皇帝，若昔大猶，受天明命，躬有靈德，燕及後昆。猥以眇躬，紹膺慶緒，聖恩罔極，寧忘駿命之休，釐事有初，敢廢靈承之舊，冀蒙僊聖，俯鑒齋精。

### 十月一日起居揚州諸帝神御殿表

伏以徂歲如流，市更良月，遺衣所御，實有經祠，方屬投艱，仰承錫羨，瞻威靈而如在，歷時序以增思。

### 冬至節上南京鴻慶宮等諸帝表

伏以子位杓回，黃宮氣應，既兆天正之始，方扶陽律之微。恭惟尊號皇帝，體道邁仁，膺時建極，豫游所次，館御如存。撫時序之變更，仰感神而感愧。

### 先天節奏告仁宗皇帝表

伏以金氣御時，商聲應律，仰聞火流之速，俯沾露降之凄。伏

惟仁宗皇帝功協聖謨，道侔乾則，亟至仁而不冒，慶實無窮，感素節以深追，悲何有極。

### 南郊下元節更不於景靈宮朝拜奏

#### 告聖祖大帝表

伏以帝繫所元，靈遊如在，載更令節，當款殊庭。以下禮祠，將陳禋獻，惟祭儀之難踣，冀神監之具昭。

### 南郊禮畢皇帝謝內中功德表

伏以燭烝廟祧，潔告郊時，實蒙芘庇，以獲顧歆。惟錫福之無窮，曷歸誠之有已。

### 南郊禮畢福寧殿奏謝英宗皇帝表

伏以膺命紹休，謙時協吉，告潔柔如廟室，奠嘉玉於郊丘。雖祇奉聖謨，獲無疆之慶賴，而深追神眷，重罔極之哀摧。

### 真宗皇帝忌辰奏告永定陵景靈宮

#### 慈德殿表

伏以慶靈回薄，永芘後昆，時序徂遷，奄更諱日。感神在望，感休兼懷。



集禧觀開啓爲民祈福祈晴道場默

表

伏以雨淫爲苗，民用愁墊，式陳淨供，以致誠祈。冀格靈明，遂蒙開霽，惟潔泰之無害，仰休鑿之有依。

南京鴻慶宮開啓皇帝本命道場青

詞

伏以寶命有祐，以自求而致福；至神無體，隨所感而應誠。祇奉靈科，實存故事，冀蒙靈福，俯暨含生。

延祥觀開啓太皇太后本命道場青

詞二道

伏以寶歷有祐，眇躬實嗣，獲承慈範，仰荷神休。方元命之在辰，按舊儀而庀事，庶蒙慶祐，永錫壽祺。

二

伏以聖功輔世，已大濟於艱虞；神道示人，用寵綏於祉福。敢因穀旦，祇奉靈科，冀大錫於壽祺，得永承於慈範。

崇先觀奉元殿開啓皇太后本命靈

寶道場青詞

伏以克紹慶基，實蒙慈訓；遵茲元命，若昔宗祈。冀靈鑒之俯昭，爾壽祺之永錫。

靈釐內殿開啓太皇太后生辰道場

青詞

伏以壇席盛陳，科儀肅設；眷言慈應，祝此誕辰。永綏壽考之祺，上賴神靈之祐。

靈釐內殿開啓皇太后生辰道場青

詞

伏以集黃冠之勝衆，仰紫極之眞游。按用科儀，營祈祉福。仰求聰鑒，俯應誠心。

西太一宮開啓皇太后生辰道場青

詞

伏以眞聖在天，式序照臨之位；眇冲嗣歷，永惟顧復之恩。敢因誕毓之辰，祇薦熏修之事。仰祈眷祐，俯察傾輸。推純緜以及親，與羣生而均祝。

### 龍圖閣開啓皇太后生辰道場青詞

伏以妙善可依，每俯從於誠悃；至恩難報，唯仰祝於壽祺。祇奉靈科，隆施淨供；上賴監歆之力，永綏顧復之慈。

### 廣聖宮開啓真宗皇帝忌辰道場青詞

詞

伏以深追諱日，祇奉靈科；仰承神福之繁，率用邦儀之舊。永惟道際，昭此誠祈。

### 福寧殿罷散三長月祝聖壽道場青詞

詞

伏以順長胤之嘉月，按齋戒之靈科；庶用熏修，溥膺眷祐。精衷以薦，釐事既成；仰賴聖真，俯昭誠悃。

### 福寧殿開啓三長月道場青詞

伏以降年有永，實繇陰鷲之功；嗣歷無疆，必謹靈承之志。帥時典故，若昔科儀；仰賴監觀，俯巫庇睨。

### 福寧殿罷散三長月道場青詞

伏以監觀在上，禮祝有儀；祇奉舊章，仰祈祝施。茂惟休福，俯

逮烝黎。

### 福寧殿開啓三長月道場青詞

伏以臯月紀時，凱風應律；罄齋精而上禱，冀真聖之俯臨。永賴監觀，普巫庇嘯；敢忘重畏，仰答顧歆。

### 福寧殿罷散三長月道場青詞

伏以協用靈科，宗祈永命；惟神心之降格，獲釐事之告成。冀與羣元，並膺湯福。

### 福寧殿開啓南郊道場青詞

伏以欽柴宗祈，爲國大事；前期齋禱，舊典有稽。仰冀靈明，俯

## 卷四十六

內制 青詞 密詞 祝文 齋文

### 景靈宮三殿看經堂開啓中元節道場青詞

場青詞

伏以三元令節，釐事有經；祇薦潔誠，宗祈祉福。仰繫庇睨，覃

及庶黎。

### 景靈宮保寧閣下元節道場青詞

伏以殊廷外建，嘉節俯臨；夙設靈壇，獨烝順祝。冀蒙真聖，垂祐黎黎。

### 醴泉觀寧聖殿開啓爲民祈福保夏

#### 道場青詞

伏以聖真丕冒，品庶其依；當蕃啓之盛時，用熏修之故事。仰祈聰直，俯鑒齋精；溥巫庇祐之仁，申錫壽康之福。

### 醴泉觀寧聖殿開啓年交道場青詞

伏以像圖夙設，壇席載嚴；當此歲陰之交，率時禋祀之舊。仰惟庇現，俯逮黎元。

### 集禧觀洪福殿開啓謝雨道場青詞

伏以早暎成災，困物生之坻瀾；被瘡以禱，荷神降之顧綏。載闢靈場，式陳昭報；尚冀涵濡之施，以終庶祐之仁。

### 在京諸宮觀景靈宮等處祈雪青詞

伏以華歲幾終，同雲未兆；物將疵癘，咎在眇冲。敢罄齋精，上

求嘉應；冀蒙脫施，孚祐含生。

### 謝晴青詞

伏以密雲作雨，暘不時若；蒙神賜祐，舊沴用除。奔走被齋，以謝靈現；祀儀有秩，不敢怠忘。

### 坊州秋祭聖祖大帝青詞

伏以祠城在望，御節如存；敢因禁斂之辰，祇用吉蠲之薦。冀蒙聖祐，俯賜降歆。

### 滄瀛州地震設醮青詞

伏以地德安靜，震非其常；陰陽厥愆，以告咎罰。翰議有典，仰賴監歆；所冀方隅，具膺庇現。

一一

伏以自河以北，坤載不寧；敷置淨筵，以祈後福。仰惟皇覺，敷祐羣生；監此齋精，俯巫庇現。

### 北嶽廟爲定州地震開啓祭禱道場

#### 青詞

伏以地職持載，靜惟其常；今茲震搖，以警不德。涉河而北，又

用驚駭；惟嶽者神，其綏厥壤。祓除祠館，按用祈儀；請命上靈，冀蒙  
孚佑。敢忘寅畏，以答眷歆。

### 集禧觀開啓保夏祝聖壽金籙道場

#### 密詞

伏以時在麥烝，物方蕃祉；卽祠庭之精闕，竭清道之嚴祇。仰  
冀監觀，俯靈庇祐；其綏福履，申弭疾殍。暨及羣黎，永膺載穀。

### 崇先觀開啓保夏祝聖壽金籙道場

#### 密詞

伏以眷祐無疆，薰修有舊；尙朱明之紀候，祈蒼昊之靈仁。中  
錫休嘉，外覃品庶；敢忘靈承之志，永膺不冒之恩。

### 延福宮開啓皇后生辰道場密詞

伏以統治后宮，協承先廟；誕辰俯及，釐事有常。惟萬德之博  
臨，冀百祥之永錫。

### 延福宮開啓皇太后生辰道場密詞

伏以協承寶命，恩維拊育之深；俯應羣情，法有總持之妙。齋  
場夙設，慶事備終；敢祈西竺之威神，永佑東朝之福履。

### 金明池開啓謝雨道場密詞

伏以著啓在時，繡隆爲虐；登齋精而上禱，蒙膏潤之旁流。祇  
報靈休，式陳孚供；尙祈終賜，無使後艱。

### 興國寺開先殿奏告太祖皇帝孝明

#### 皇后祝文

伏以像設有嚴，神游所御；瞻衣冠而如在，懼風雨之弗除。此  
事將興，消辰既吉；永賴靈明之鑒，俯昭怵惕之懷。

### 西京應天禪院奏告太祖太宗真宗

#### 皇帝御容祝文啓

告遠不安還  
本殿之意

伏以殊庭有無，館御如存。吉日既錫，維修惟謹。式陳嘉薦，以  
妥明靈。

### 啓聖院永隆殿奏告太宗皇帝元德

#### 皇后祝文

伏以威神所感，經營有期；考禮舊章，宜時潔告。茂惟靈德，俯  
鑒至懷。

### 太廟八室奉慈諸廟奏告南郊等處

祝文

伏以三歲一郊，實昭大報；前期潔告，國有故常。侂翼靈明，俯

靈鑒祐。

諸皇后陵奏告謝南郊禮畢祝文

伏以禮饗郊宮，國之重事；唯蒙慈庇，以獲休成。笑祝有經，敢忘用舊。

景靈宮英德殿奉安英宗皇帝御容

祝文

伏以先聖舊祠，祖宗所御；嗣興寶構，追奉靈游。諷日既嘉，其儀以妥。徂惟在上，永保厥寧。

天章閣延昌殿權奉安英宗皇帝御

容祝文

伏以相名山於洛宅，既兆寢；倣原廟於漢儀，將遷館御。潔除祕宇，嚴奉睟容。冀靈躡之少安，副衷情之罔極。

西京應天禪院拆修太祖神御殿祭

告祝文

廟利有嚴，威神所御；將改新於寶構，永欽奉於睟容。仰冀靈明，俯靈鑒祐。

景靈宮修蓋英宗皇帝神御殿上梁

祭告太歲已下諸神祝文

伏以欽奉僊游，緊營寶構；舉修梁而揆日，具獨銷以寧神。祓在後，仰繫大祐。

慈孝寺崇真彰德殿爲經霖雨巫脊

脫落奏告祝文

伏以雨淫告災，垣屋或壞；惟神所御，有圯弗支。誠用靈辰，改新厥構。獨爲祇薦，於禮有常。

太廟后廟奉慈廟雅飾告

伏以三歲一郊，祖宗成法；靈明所御，繪飾有時。方此僭工，禮當潔告。

西太一宮立秋祝文

伏以候火既流，占灰南應；真游所御，靈時具存。率循舊章，作薦常事。仰祈錫福，大芘含生。

## 中太一宮立冬祝文

伏以俯御國郊，庇祝天物，祠宮筴祝，在禮有經。消選吉時，作薦常事，敢祈孚祐，施及羣黎。

## 九宮貴神祝文

伏以下用靈辰，躬修禋享。潢壇所兆，潔告有常。

## 景靈宮里域真官祝文

伏以宗祈陽郊，祇見神祖，葆茲淨域，夙賴真靈。祇率舊章，式陳嘉薦。

## 天地社稷宮觀等處祈晴青詞祝文

積陰爲沴，淫雨弗止，蕩法禦孽，將爲民菑。懼德不類，以干咎罰；是用齋戒，宗祈明靈。冀蒙靈矜，遂獲開霽。休嘉之錫，實被含生。

## 五嶽四瀆諸廟祈晴祝文

淫雨弗止，將爲民菑；懼德不孚，以罹咎罰。是用奔走，禱于明神；惟神監御，惠以時暘。非民獨蒙嘉福，神亦永有休享。

## 定州北嶽爲地震祭禱祝文

王安石全集 卷四十六 內制

伏以自河以北，陽出鎮陰；人用不寧，咎由非德。永惟聰直，庇祐一方；祇飭使人，齋精以禱。尙蒙歆鑒，無有後艱。

## 文德殿告遷御容祝文

伏以綬冠卽事，喪紀有終；翻座厥神，哀懷際極。度新宮而館御，諏吉日以徂遷。式冀靈明，永歆豐潔。

## 南郊青城綵內畢功大殿上開啓保

### 安祝壽諷孔雀明王經齋文

伏以祀兆方嚴，齋場夙設；實延淨衆，開誦梵文。既蒙大施之仁，助錫不平之福。

## 南郊青城綵內畢功大殿上開啓保

### 安祝壽諷法華經齋文

伏以帷宮既具，皇邸將臨；發誦祕文，施其景福。仰惟覺慈之覆，俯綏禋享之成。

## 五臺開啓南郊禮畢道場齋文

伏以靈承在上，懼休命之難；大報于郊，惟盛儀之獲。祇循故事，恪報厥成。仰賴顧歆，終靈庇庇。

內中延福宮性智殿開啓太皇太后

生辰道場齋文

伏以大陰協兆，良月御時，猥以眇躬，獲承慈範。敢因穀旦，祇集勝緣。寶蒙等慈，具綏景福。

十月一日永昭陵下宮開啓資薦仁

宗皇帝道場齋文

伏以大明光藏，上智之所發揮；妙摠持門，羣靈之所歸賴。歲陰逝矣，陵園超然。憑淨衆以有祈，冀真遊之無礙。

福寧殿開啓資薦英宗皇帝道場齋

文

伏以憑凡之言未遠，滌場之候更新。摧慕安窮，榮號靡及。旁招淨衆，歸誠甘露之門。仰祝靈游，取證法雲之地。

中元節福寧殿水陸道場資薦英宗

皇帝道場齋文

伏以正等上緣，含生永賴。薦龍施之淨供，助宿植于神游。仰冀靈明，俯昭哀懇。

萬壽觀廣愛殿資薦章惠皇太后忌

辰道場齋文

伏以諱日俯臨，祠庭外闕。邁東黃冠之衆，宗祈紫極之神。按用前科，追營後福。庶超升之莫禦，鑿庶庇之有加。

天章閣延昌殿開啓權奉安英宗皇

帝御容道場齋文

伏以翠旌所御，玉色如存。將改蒞於清閒，少即安於祕近。旁招淨衆，仰助勝緣。憑妙覺之總持，冀皇靈之升濟。

溫成皇后陵獻殿內開啓冬節道場

齋文

伏以光靈所宅，崇奉有儀。因令節以熏修，冀具乘之祈助。仰希錫福，俯速含生。

金明池上開啓祈雨粉壇道場齋文

伏以肅設祠壇，宗祈解澤。膏潤之祥甫兆，赫炎之慶更深。實特靈明，厚矜黎庶。遂令沾足，用格豐穰。

金明池上開啓謝雨道場齋文

伏以常暘告勗，將害棄盛，夙設靈場，載祈膏澤，神休既格，昭報有儀，尙惟孚佑之仁，終保嘉生之享。

### 龍圖大章寶文閣接續開啓祈雪道

#### 場齋文

伏以歲序就窮，尙愆嘉雪，能仁應世，閔此含生，冀佑上靈，之休證式，陳淨供以告齋誠。

### 泗州塔謝晴齋文

大畜于民，淫雨不止，祓除齋戒，並走以禱，實雲等慈，俯應誠悃，永惟庇貺，其敢弭忘。

### 後苑天王殿拆修了畢齋文

伏以擬辰居之奧密，飭祓像之嚴威，繕治告功，祓齋祈福，庶憑至善，永保多盤。

## 卷四十七

### 內制

詔書

### 勅榜交趾

王安石全集 卷四十七 內制

勅交州管內溪峒軍民官吏等：容惟安南，世受王爵，撫納之厚，實自先朝，含容厥愆，以至今日，而乃攻犯城邑，殺傷吏民，干國之紀，刑茲無赦！致天之討，師則有名，已差吏部員外郎充天章閣待制趙高，充安南道行營馬步軍都總管經略安撫招討使，兼廣南安撫使昭宣使，嘉州防禦使入內侍省都押班李憲，充副使，龍衛四廂都總管指揮使，忠州刺史燕達，充副都總管，順時興師，水陸兼進，天示助順，已兆布新之祥，人知悔亡，咸懷敵愾之氣，然王師所至，弗逆克奔，咨爾士庶，久淹塗炭，如能諱王內附，率衆自歸，爵祿賞賜，當倍常科，舊惡宿負，一皆原滌，乾德幼稚，政非已出，造廷之日，待遇如初，朕言不渝，衆聽無惑，比聞編戶，極困誅求，已戒使人，具宣恩旨，暴征橫賦，到卽蠲除，冀我一方，永爲樂土。

### 提轉考課勅詞

先王考績之次序，雖見於經，而其詳不傳於後世。朕若稽古，以修衆功，而諸路刺舉之官，未有以考其賢否。比勅有司，詳議厥制，條奏來上，詢謀悉同，其使布宣，以勵能者，而擇左右可信之良，使典治之。古人有言：「徒善不足以為政，徒法不能以自行。」今朕有念功樂善之志焉，而又繼之黜陟幽明之法，以待天下之大吏矣，然非夫任事之臣，躬率以正，而考慎其實，與士大夫宣力于外者，皆安于禮義，而不以便文微幸爲姦，則朕之志，豈能獨信於天下，而法亦何恃以行哉？咨爾在位，其各悉力一心，務祇新書，以



稱朕至誠惻怛之意

### 韓琦加恩制

門下朕，祇率舊章，聲稱吉禮。對越天地，具獲靈明之歆；相維公卿，並膺休顯之賜。其孚大號，以寵元勳。推誠保德，崇仁守正，協恭贊治，亮節翊戴功臣。淮南節度揚州管内觀察處置營田等使，開府儀同三司，守司徒檢校太師兼侍中，行揚州大都督府長史上柱國魏國公，食邑一萬三千七百戶，食實封五千戶。韓琦，躬受偉材，出陪熙運。保茲天子，進無浮實之名。正是國人，退有顧言之行。間朝廷之兩社，揉方域之萬邦。辰獻具臧，器實加重。中辭機軸之要，外即蕃屏之安。衝紘紘繩，備三公服飾之盛。養甲戟，蘇兼大將威儀之多。序積既崇，修厲彌謹。協成宗祈之禮，與有顯助之勞。肆行本封，申加美稱。於感恩典徵數，所以旌帝臣，明德茂功，所以獎王室。往惟勳翼，服此褒嘉。可特授依前守司徒檢校太師兼侍中，行揚州大都督府長史，魏國公，充淮南節度揚州管内觀察處置營田等使，加食邑七百戶，食實封四百戶。仍賜推誠保德崇仁守正協恭贊治亮節佐運翊戴功臣。散官勳如故，主者施行。

### 李璋加恩制

門下朕，若昔大猷，紹天明命。必有獻享之禮，作民恭先；必有賈嘉之恩，自國貴始。翊衛功臣，奉寧軍節度鄭州管内觀察處置

河堤等使，光祿大夫檢校司空，使持節鄭州諸軍事，鄭州刺史，兼御史大夫上柱國平原郡開國公，食邑四千三百戶，食實封一千戶。李璋，世載忠善，躬服儉勤。以后家之洪支，為帝室之陸棟。入總營衛，則兵師無譁；出乘蕃維，則吏屬不怠。近付京都之鑰，外更方鎮之旄。責職惟修，祀儀獲考。進加功號，申衍邑封。以疇服采之勤，其協勸勞之典。於戲，貴富有危溢之可戒，祿位匪侈驕之與期。圖惟慶譽之終，尚協龍光之施。可特授依前檢校司空，使持節鄭州諸軍事，鄭州刺史，兼御史大夫，充奉寧軍節度鄭州管内觀察處置等使，加食邑七百戶，仍賜翊衛忠果功臣。散官勳封如故，主者施行。

### 皇伯祖威德軍節度使榮國公承亮

#### 加恩制

門下朕，祿獻廟室，燎禮郊丘。內蒙祖考之居歆，外獲神祇之顧饗。嘉我近屬，與有陪輔之勞。揚於大庭，使膺褒顯之福。具官某，德義自表，爵齒兼尊。魁然肅艾之材，尚矣神靈之胄。世承厥慶，有跼步之芬華。胡賴以寧，若翰蕃之嚴密。乃相肆祀，實綏思成。進加奠食之封，申錫詔功之號。於戲，孝恭可以儀宗室，信厚可以化邦人。匪時親賢，孰朕承翼。往肩寵獎，尚協榮懷。可。

### 李日尊加恩制

門下朕，紹膺駿命，稽用上儀。祇事郊宮，並受三神之禱。推恩方夏，外交四表之歡。告于有司，錫是在服。推誠保節，同德守正。順化翊戴功臣，靜海軍節度觀察處置等使，同中書門下平章事李日尊，躬懷德善，世濟忠勤。夙茲南邦，居有扞城之效。衛我中國，使無疆場之慮。賜之大將之旄，昨之真王之爵。往踐厥位，知欣載於寵章。來獻其琛，用協成於熙事。陪載采芣，褒進文階。載加眞食之封，式允懋功之典。於戲人之所助，惟怙冒於王靈。國以永存，願循守於候度。率時新命，保乃舊邦。可。」

### 馮翊郡君連氏等賀皇帝南郊禮畢

表

伏以廟饗獨承，郊柴昭報；仰格神靈之饗，俯均夷夏之歡。  
〔中賀〕伏惟皇帝陛下，道協欽明，德兼神武；御操今之皇策，考嚴上之帝儀。授威盛容，苑實存乎六世；恩典微數，資并及於萬方。妾備數先朝，叨榮中禁；親逢累洽，竊用交欣。妾無任。

### 德妃苗氏上賀皇帝南郊禮畢表

伏以靈承廟祏，祇載郊丘；既來萬國之歡，遂格三靈之祐。  
〔中賀〕恭惟皇帝陛下，猷齊成性，容廣膺期；神罔時憫，方紹休於大業；聖爲能饗，乃獲考於上儀。妾逮侍先朝，親盛逢事；觀瞻有煒，欣賴實多。妾無任。

賜太子太傅致仕梁適太子太師致

仕張昇特赴闕南郊陪位詔

朕發稱圭幣，祇見郊宮，嘉得萬國之歡心，以承配天之大事。永念元老，著勳先朝，當與辟公序于嗣位。冀能顯相，綏我休成。可發來赴闕南郊陪位，故茲詔示，想宜知悉。

賜允太子太傅致仕梁適陳乞不赴

南郊陪位詔

勅梁適：省所上表，「遞到詔書一道，令臣赴闕陪位者，臣以久病，不獲奔走前去。」事具悉。朕肅將圭幣，祇見郊丘，嘉與舊臣協成熙事，乃聞疾，旅力尙憊，優老寵賢，義誠難強。

賜允太子太師致仕張昇不赴南郊

陪位詔

勅張昇：郊丘大事，羣辟具來；舊老元勳，所宜顯相。乃以疾者，惻於朕心，尙慎興居，以膺康福。

賜宣徽北院使判大名府王拱辰乞

南郊赴闕不允詔

勅拱辰：朕嗣命典神，發稱吉禮，稽循故事，不敢愆忘。卿既率

實職，以來助祭；又求入觀，陪侍郊宮。緬彼都畿，方須鎮撫；永惟重寄，難徇至意。

### 賜允守司徒兼檢校太師兼侍中韓琦乞相州詔

勅韓琦：卿以公司之官，將相之位，統臨四路，屏扞一方。寄重任隆，羣臣莫其。罹疾，冀即有瘳。而章書頻頻，來以病告。宗工元老，視遇有加。恩禮之間，然何敢薄。重違懇惻，姑即便安。

### 賜守司徒兼檢校太師兼侍中判永興軍韓琦再乞相州詔

卿當國家之多難，任社稷之至憂。實能忠勤，以濟勳績；方均逸豫，適此平康。煩我元功，良非得已。亦惟體國，義不辭勞。今雖尚謀經武之時，非有蒐兵伐罪之事。坐臨諸帥，固可優游；何必舊邦，乃能休養。勉綏居息，以副倚毗。

### 賜守司徒檢校太師兼侍中韓琦詔

便道之鎮，朝廷故常；來朝京師，朕意所欲。使事曲折，既嘗聞知；忠言嘉諫，又所饒渴。雖知勤勩，可不勉哉。

### 賜韓琦依所乞詔

勅韓琦：「奏乞由河陰本路赴相州，安泊骨肉行李，訖徑乘蹇馬赴闕，朝見奏事，訖還赴本任，稍從私便。」事具舊德元功，久於方面，嘉言讜論，所欲亟聞。其來進朝，然後之鎮，義當竭勉，無或告勞。

### 賜守司徒檢校太師兼侍中判永興軍韓琦乞相州舊任不允詔三道

勅韓琦：卿明德茂勳，具書帝籍，祖考所付，以屏毗朕躬。比辭國均，已無邊隙，故煩元老，屬此憂勤。今羌雖來柔，疆事多弛，經營科治，改命為難。莫府坐籌，制其大略，雖聞稍憊，冀可少安。義有固然，朕言無戲。

#### 二

勅韓琦：羌夷變態，未易究知；邊塞繕完，所宜申飭。以卿望實，分朕顧憂，當并羣策，以有為；遂措一方於無事。乃來告疾，冀得燕閒，主鬪忘身，忠賢之義，勉膺重寄，務體至懷。

#### 三

勅韓琦：卿茂德備功，朝廷所賴，方解政幾之劇，重分疆事之憂。種落綏和，酋渠嚮順，永惟邊鎮，猶恃老成。所須經武之遠謀，及此暇時，而備豫當思體國，無卻告勞。

賜守司徒檢校太師兼作中判永興

軍韓琦乞致仕不允詔

勅韓琦朕初嗣位不敢暇遊惟畏天命亦惟閔民蠢茲一方尙戒羌夷制變備豫扞禦禦侮庶幾元老克協朕心若其憚勤誰與謀此勉祇厥服用副至懷

賜判永興軍韓琦湯藥詔

勅韓琦任隆三事寄重一方比聞經制之勞或爽節宣之序持馳便傳往喻朕懷宜有分頒以資衛養

賜允觀文殿學士尙書左僕射新除

集禧觀使富弼辭免乞判汝州詔

卿翊朕祖考功施于時德善在躬終始如一祠庭置使實近闕門邦有大疑庶幾求助忠賢體國義乃可留而引喻再三便於出守重違懇惻姑卽所安故茲詔示想宜知悉

賜判汝州富弼乞致仕不允詔

勅富弼卿忠純亮直爲國元老朕所特賴急於典刑優游小邦足以養疾冀綏福履來副詢謀何必言歸以孤眷矜

賜判汝州富弼乞假養疾詔

眷我元老數更悲傷比飭使人往宣至意乃觀來誌未卽康寧姑順誠慎勉綏吉祿

賜判汝州富弼乞赴安州避災養疾

詔

比飭使人具宣至意就令賜告冀遂寧瘳卿嚴祇朕命不敢違息顧念吏卒閱其滯留觸熱載馳用忘勤勩恭以事上卿實有之仁及賤微又能如此忠誠所由豈獨朕心從容小邦姑以養福勉綏吉祿毋恤後艱故茲詔示想宜知悉

賜判汝州富弼赴闕詔二道

勅富弼卿中解政機外分符守久於窮僻衛養或愆優游京師可以治疾謂當趣駕以副虛懷

二

勅富弼久解政機薦分符守元功茂德朕所注心渴聞嘉猷以輔不逮

賜富弼赴闕并茶藥詔

勅富弼：適白州藩，來還朝位，眷馳驅之良苦，懼備養之或愆，當有寵頒，以昭勛行。

賜判汝州富弼辭免南郊禮畢支賜

詔

勅富弼：省所奏免南郊支賜，受禮于神，管及贊首，卿勳績兼茂，中外具瞻，恩典所加，當先交辟。區區一賜，何足以辭。當固眷懷，其膺旒施。

賜宰相曾公亮已下辭南郊賜賚不

允詔

勅公亮等：朕初嗣服，於祖宗之制，未有所改也。卿等選於黎獻，位冠百工，或受或辭，人用觀政。朝廷予奪，所以馭臣，貴賤有差，勢如堂陛。惟先王之制國用，視時民數之多寡，方今生齒既蕃，而賦入又為不少，理財之義，殆有可思。此之不圖，而姑務自損，祇傷國體，不協朕心。方與勳賞，感其大者，區區一賜，何足以言。

賜觀文殿學士新除刑部尚書知大

名府陳升之辭免恩命不允詔

勅升之：設都置守，綏御一方，付得其材，乃能往又。卿嘉謀美績，簡在朕心，選於羣臣，用有界屬。申明經略，備制事幾，中外踐更，

效皆已試，勉祇厥服，於義為宜。

賜觀文殿學士刑部尚書知大名府

陳升之赴闕朝見茶藥詔

勅升之：往司宮輪，來次效闕，炎歊之序未徂，踐涉之勤已至，當馳榮賜，以示眷懷。

賜觀文殿學士刑部尚書知亳州歐

陽修上表乞奏致仕不允詔

勅修：股肱名臣，與國同體，禮當得謝，朕尚難之。况年非告老之時，而勳在受遺之籍，不留屏輔，人謂斯何姑體至懷，少安厥位。

賜知亳州歐陽修陳乞致仕第二表

不允詔

勅修：卿勳德之舊，簡在帝心，從容一州，足以休養。而抗奏至於四五，必以田里為歸，豈朕視遇故老有不足於禮乎？何其求去之果也？欲喻至意，莫知所言，惟能勉留實副勳行。

賜知亳州歐陽修第三表并劄子陳

乞致仕不允詔

勅修：省所三上表并劄子，奏乞致仕事，具悉。卿朝覲三朝，清

明諒直；有實有績，著在朕心。重選勤求，外寄濬屏；邦之萬老，不以遐遺。所冀輸誠，常存帝室；而納祿與職，至于再三。雖潔身之風，可激貪冒；顧許國之義，未協忠嘉。姑體眷懷，勉膺圖任，所請宜不允。

### 賜觀文殿學士兵部尚書歐陽修辭

#### 知清州不允詔二道

勅修：海岱名都，太公舊履；鎮撫一路，朕難其材。卿實元勳，以忠許國，則當亟往，臥以治之。冀能優游，寧此東土。

#### 二

勅修：卿純誠直諒，中外所知。辭祿就閑，志非有激。進官治劇，義乃無嫌。矧茲東州，可以居息。方之守憂，勞逸殆均；朕命惟行，謂當過往。

### 賜答曾公亮詔

皆我變異，以戒人君；推之股肱，朕所不取。元勳舊德，實賴交修；譴告之來，必緣象類。明喻朕志，使當天心；庶幾君臣，並受遐福。不務出此，而果於辭讓，是惟保身，豈曰謀國。

### 賜張方平免特支請俸詔

勅方平：省所奏劄子，陳免特支請俸事，具悉。卿躬肅艾之材，

豫辯章之論，致喪無貳，雖非謀國之時，班祿有差，是乃養賢之意。抗言來訟，引義甚明，重鑿素懷，姑循近制。

### 賜樞密副使右諫議大夫邵亢乞郡

#### 詔

勅邵亢：卿先帝所命，以副朕躬。升執事樞，方觀勳效；遽欲辭位，殆非所宜。衛養少愆，何憂不已。勉共厥服，思協朕心。

### 賜皇伯新除彰化軍節度觀察留後

#### 安定郡王從式乞免新命不允詔

勅從式：卿躬萬父之材，出神明之胄。選於宗室，則屬近而行尊；聞在朝廷，又年高而德劭。膺茲寶顯，人以爲宜。勉服官封，永綏吉祿。

### 賜涇原路經略使蔡挺茶藥詔

卿方用時材，出分帥路；適茲寒苦，良已勤勞。特推撫賜之恩，以示旌懷之意。

### 賜天章閣待制知渭州蔡挺獎諭詔

封疆之虞，責在將帥；厥有績效，不忘于心。卿久以才稱，外分方任；乘機踐事，能兆厥謀。板築告功，于誕就募；保彼居國，可無後

憂。倚若茲，朕所嘉歎。

### 賜知唐州光祿卿高賦獎諭詔

召杜南陽，世稱循吏，其亡久矣，朕尙思之。卿招懷饑流，擊開荒梗，繕修破塌，績効具昭。前人之良，何以速此。聞奏歎美，不忘于心。

## 卷四十八

內制 詔書 批答 口宣

### 賜天章閣待制知審刑院齊恢獎諭詔

勅齊恢：省所奏，據大理寺日奏司狀，四月一日已前下寺公案，並已斷絕無見在事，其悉卿以才被選，典領祥刑，蔽罪讞疑，遂無留獄。罔空之隆，朕庶幾焉。聞奏歎嘉，不忘乃績。

### 又賜知審刑院齊恢獎諭詔

勅齊恢：狂獄之留，易以爲戒。卿躬有美行，服在近班，典茲祥刑，致用明慎。濟之敏給，廷讞用空。吏稱厥官，朕心所喜。

### 賜勅獎諭審刑院詳議官大理寺詳

#### 斷官等

勅趙文昌等：省知審刑院齊恢奏，據大理寺日奏司狀，四月一日已前下寺公案，並已斷絕無見在事，朕初嗣服，德化未孚。永念元元，多罹狂獄。汝等並膺選推，任在讞疑，能勵厥官，以無留事。覽奏歎尚，不忘于心。

### 又賜獎諭審刑院詳議官大理寺詳

#### 斷官等

勅趙文昌等：四方罪獄，常思稽留，豈唯呼喚，或以癩官。汝等能勗且敏，論讞用單，聞奏念勞，朕心以喜。

### 賜勅獎諭權大理寺少卿蔡冠卿

勅蔡冠卿：省知審刑院齊恢奏，據大理寺日奏司狀，四月一日已前下寺公案，並已斷絕無見在事，天下之獄，決於大理。汝能審克，不蔽厥成，來讞之疑，遂無留者。惟明以敏，朕實汝嘉。

### 賜特放諫議大夫知潭州燕度待罪

#### 詔

卿受命方隅，助宣德化，姦凶弗率，乃觸大誅。引慝自歸，謂當

譴黜萬方有罪，責在朕躬。雖爾長民，豈專任此。

### 賜外任臣寮進奉功德疏

卿方以時材，外分邦寄；備修禱事，來會誕辰。廣伽梵之勝緣，協華封之善意。誠惟勤至，良用歎嘉。

### 賜特放知成德軍韓贄待罪詔

夫婦相殘，政之大恥；引愆自劾，於義為宜。然德化之美，厥成在久；任斯責者，豈特長然。

### 賜特放懷州傅卞待罪詔

勅傅卞先王教民，長幼有序，厥或不率，歸之義刑。卿受任方州，罪人既得，閔斯弗迪，引責在躬。美俗之成，蓋非朝夕；一夫抵冒，未足以言。

### 賜答德妃苗氏賀南郊禮畢詔

勅德妃苗氏列職內官，逮承先帝祀儀，獲考慶慰，惟均比覽。奏陳，具昭誠意。

### 賜答修儀楊氏等馮翊郡君連氏等

#### 賀南郊禮畢詔

王安石全集 卷四十八 內制

勅修儀楊氏舊繇德選，列職禁闈，釐事之成，實均慶賴。擴文贊喜，良慰朕心。

### 賜大遼賀正旦人使茶藥詔

勅卿以臂使之才，將善鄰之禮，川塗悠遠，風氣迥寒。永念馳驅，當加勞賜。

### 賜大遼賀正旦副使茶藥詔

勅卿夙駕使車，遠將信幣，方茲寒凜，固已勤勞。宜申諭於至懷，仍就加於寵錫。

### 賜大遼皇太后賀正旦人使茶藥詔

勅卿奉將書幣，更涉川途，方茲沍寒，久於勤勩。宜加勞賜，以示眷存。

### 賜大遼皇太后賀正旦副使茶藥詔

勅卿將幣造朝，方申舊好，建禮取道，適會祁寒。永惟跋涉之勞，當有匪頒之寵。

### 皇帝問候大遼皇帝書

嘉生備舍，華歲幾終；惟素講於鄰權，想具膺於時福。彌加保



衛，永御吉康。

### 皇帝賀大遼皇太后生辰書

王燭告和，方御閉藏之候；椒庭集慶，載臨誕毓之辰。具飭使車，肅將禮幣；式修舊好，申祝永年。

### 賜南平王李日尊加恩告勅書

勅南平王日尊：朕躬執圭幣，禮成郊丘，無有遠邇，並膺休福。卿鎮撫南服，功昭于時。乃眷忠勤，尙加褒顯。永肩臣節，茂對寵章。

### 賜溪洞知將州田元宗等進奉助南

#### 郊并賀冬賀正勅書

勅田元宗：附綏種落，葆衛疆陲；能來獻琛，以贊釐事。忠勤之意，良有可嘉。

### 賜占城蕃王楊卜尸利律陀般摩提

#### 婆勅書

勅卿世荷百祿，躬有一邦。雖道阻荒遐，而志存欽順；具書遣使，航海獻琛。載念忠勤，豈忘勤尙。因加褒賜，式示眷懷。

### 批答文武百寮曾公亮已下上尊號

### 第一表不允

朕以薄德，嗣膺基緒。繼天理物，常懼弗任；方賴交修，以熙衆治。羣公卿士，外暨庶黎，欲舉鴻名，措之眇質。臣民歸美，爲義則多；揣實揆時，朕猶不敢。

### 批答文武百寮曾公亮已下上尊號

#### 第二表不允

王者奉元以先後，天時憲道以始終。入事以文制禮，作樂以武戢兵；豐財以成萬物之性，爲仁以得四海之心。爲孝惟聖，時克朕無能焉。被之此名，祇有慙德。矧家多難，創鉅未夷，備章而郊，欲止不敢。因自尊顯，良非本懷。

### 批答宰臣曾公亮已下賀壽星見

省表具知。乾象粲然，官占以告；壽祺之應，於傳有稽；卿等寅亮帝工，阜成邦采。檮文告慶，歸福朕躬。書瑞史篇，已循故事。星隆晷德，尙賴交修。

### 批答樞密使文彥博等賀壽星見

省表具知。穹旻見象，以告壽昌；嘉與臣民，並膺茲福。卿等進獻德選，登筮事樞。敷奏兆祥，請書史策。忠嘉之意，朕所不忘。

## 批答富弼

卿有憂國愛君之心，而忠以忘乎己；有經邦信時之業，而用未究其能。夫蓄久而積博，則施之無窮；廣深而計熟，則謀無不獲。此朕所以有望於卿也。矧卿正直不回，姦邪素忌，小人所異，君子所同。是以在外十年，而左右之譽弗及；處躬一德，而縉紳之望愈隆。朕內度于心，外詢于衆，自謂有得，卿其何辭？

## 批答不允皇伯祖威德軍節度使榮

### 國公承亮辭免恩命第一表

卿相予祠事，既獲休成；膺國寵章，所宜祇受。苟爲謙避，未協眷懷。

## 批答不允承亮辭免恩命第二表仍

### 斷來章

卿位重朝廷，望隆宗室；駿奔郊廟，助朕休成。受錫爲宜，可無確避。

## 批答不允承亮辭免

省表具知。受釐于神，人與有慶；矧惟近屬，德齒兼尊。膺此冀嘉，於此爲稱。往其祇命，以副眷懷。

## 批答不允承亮辭免

省表具知。古者賑贍之福，與同姓共之。矧茲大賚，外及蠻貊；爲吾近屬，相協休成。恩典所加，豈容固避？

## 批答樞密副使韓絳邵亢知樞密院

### 事陳升之等辭免恩命仍斷來章

省表具知。祭有惠衛，普及庶黎；矧吾政事之臣，當在褒揚之首。膺斯恩典，於體爲宜，毋或終辭，以効訓告。

## 批答韓絳邵亢陳升之等辭恩命不

### 允仍斷來章

卿等位爲臣宗，躬相祠事；膺斯褒顯，於體爲宜。往服寵章，可無謙避。

## 宣答文武百寮稱賀宣德門肆赦

有制：朕升煙泰時，登就吉儀，駐蹕端門，布宣惠澤。臣鄰協豫，黎庶交欣。賴天之休，與卿等內外同慶。

## 宣答文武百寮稱賀南郊禮畢

有制：朕裸獻清廟，燎禮泰壇，協相祀儀，既嘉勤績，族陳賀禮，彌見歡誠，賴天之休，與卿等內外同慶。

### 宣答樞密使以下賀南郊禮畢

有制：朕親稱幣玉，祇見郊宮，能底熙成，實繇顯相，羣靈率籲，黎獻交欣，朕賴天之休，與卿等內外同慶。

### 賜皇伯祖東平郡王允弼生日口宣

「允」目錄  
作「元」

有勅：卿齒尊德茂，屬近位崇，惟時獻歲之期，實兆元精之慶，當加好賜，以助燕私。

### 賜皇伯祖威德軍節度使榮國公承

#### 亮加恩口宣

有勅：朕躬率百辟，褒封萬靈，乃眷親賢，實陪大事，當懋寵嘉之數，以昭褒錫之恩。

### 賜皇弟岐王顥生日禮物口宣

有勅：卿地親魯衛，德茂開平，方誕毓之嘉辰，有匪頒之故事，當馳膺使，往喻隆恩。

### 賜皇弟高密郡王生日禮物口宣

有勅：卿德名方劭，爵寵兼崇，誕毓之辰，甫當穀旦，匪頒之禮，式示至恩。

### 賜淮南節度使守司徒兼侍中判相

#### 州韓琦加恩口宣

有勅：卿位高朝廷，德茂百辟，相予釐事，厥有成勞，膺國寵章，是為常典。

### 賜判永興軍韓琦生日禮物口宣

有勅：卿位重將旄，望隆宰席，方懋蕃官之績，載臨誕毓之辰，當有匪頒，以昭眷遇。

### 賜樞密使西川節度使守司空兼侍

#### 中文彥博生日差內臣賜羊酒米麵等口宣

有勅：卿明謨經國，碩望冠朝，方茲誕育之辰，宜有燕私之禮，當加賜賚，以示眷懷。

### 賜文彥博生日差男押賜生日禮物

口宣

有勅：卿才隆國棟，位極臣宗。惟時盈月之良，實兆元精之慶；載臨穀旦，當至異恩。

賜樞密使呂公弼生日禮物口宣

有勅：卿為皇世臣，掌國幾命。門弧告慶，是謂嘉時；素饌致恩，式昭厚遇。

賜觀文殿大學士尙書左僕射富弼

赴闕茶藥口宣

有勅：卿久辭劇位，外寄方口。口召節之既嚴，想朝旂之甚邈；宜頒珍劑，以喻至懷。

賜觀文殿大學士尙書左僕射富弼

湯藥并賜詔口宣

有勅：卿屏翰元功，台衡舊德。數更悲意，有惻朕心。因喻至懷，宜頒珍劑。

賜觀文殿學士刑部尙書知大名府

陳升之赴闕朝見并賜茶藥口宣

王安石全集 卷四十八 丙制

有勅：卿擁節過都，斂關請覲。方茲炎溽，固已勤勞；當有匪懈，以資輔養。

賜觀文殿大學士尙書左僕射判汝

州富弼加恩口宣

有勅：卿望隆時棟，德茂臣宗。方茲釐事之成，爰有命書之賜；往膺褒顯，當體眷懷。

撫問判永興軍韓琦口宣

有勅：卿內辭鼎軸，出撫方垂。載惟莅事之勤，宜鑿高神之福；特申勞問，以示眷懷。

撫問觀文殿學士陳升之兼賜夏藥

口宣

有勅：卿久乘台路，方部將符。輯瑞之來，虛懷以好；宜加勞賜，式示眷存。

撫問廊延路臣寮口宣

有勅：卿等並膺廷選，外寄邊處。永念撫循，備更勞勩；方茲研暖，宜各寧安。

撫問延州沿邊臣寮口宣

有勅卿等並因材選，外寄邊虞。方履盛秋，想膺多福。特申撫諭，當體顧懷。

撫問河北西路臣寮兼賜夏藥口宣

有勅卿等時方鬱蒸，氣或疵癘。永惟黎獻，方寄外憂。常有分頒，以助調養。

撫問并代州路臣寮并將校口宣

有勅卿等方以材能，外分寄屬。當此沍寒之極，永惟勞勩之多。當飭使人，往宣朕意。

撫問高陽關路俵散諸軍特支銀鞋

錢并傳宣撫問臣寮口宣

有勅卿等各以選掄，外膺寄屬。比更時序，邈在邊防。永懷扞禦之勞，當致拊循之意。

撫問送并大遼賀正旦人使副沿路

相逢賀大遼皇太后皇帝生辰使

副口宣

有勅卿等抗旛出聘，擁傳還朝。方春尙寒，涉道良苦。當加撫勞，以示眷懷。

撫問雄州白溝驛賜北朝賀正旦人

使御筵口宣

有勅卿等並膺朝選，實播鄰歡。擁節在疆，方豫稱觴之禮。馳輶喻指，姑推折俎之恩。

賜大遼國賀正旦人使已下生餼口

宣

有勅卿等奉將鄰聘，來會歲元。永懷跋涉之勞，宜有饋牽之禮。式昭勩遇，當體誠懷。

賜大遼國賀正旦人使卻迴瀛洲御

筵口宣

有勅卿等奉將書幣，既獲驪成。跋涉川途，固更勩勩。宜頒燕衍，以示眷懷。

賜大遼國賀正旦人使見訖就驛賜

酒果口宣

有勅卿等奉將鄰聘，夙駕使輶。既造見於闕庭，方即安於會

館宜加好賜，以致誠懷。

### 北京賜大遼賀正旦人使卻迴御筵

#### 口宣

有勅：卿等奉幣造朝，抗禮歸國。經懷使節，方次都畿，特示燕私，以將勤遇。

### 雄州賜大遼賀同天節人使卻迴御

#### 筵兼撫問口宣

有勅：卿等抗禮歸國，總轡在疆。方茲炎歊，亦既勤勳，就頒燕帟，式示眷懷。

### 就驛賜大遼賀同天節人使卻迴朝

#### 辭訖酒果口宣

有勅：卿等奉聘聘禮，來會誕期。惟鄰好之踐修，嘉使容之飭備；當中頒賚，以侑燕私。

### 賜真定府路臣寮等初冬衣襖口宣

有勅：卿等水澤將堅，風飈載厲。永懷黎獻，方寄外憂，當飭使輜，就頒篋服。

### 賜召學士馮京入院口宣

有勅：卿文備國華，學該世務。祥琴既御，吉服以朝，宜復禁塗，往供辭職。

### 賜召膝甫入院口宣

有勅：卿夙稱才敏，久擅文華。當解風憲之嚴，以豫論思之密。

## 卷四十九

### 外制

### 節度使加宣徽使制

門下推轂授師，擁旄乘塞；擅生殺之柄于外，繫安危之體于中。厥有顯庸，宜膺顯數。誕揚孚號，明示庶工。具官某，學足以通大方，謀足以斷衆事，有經天之業，有扞城之材。比以明揚，屢更煩使，遂躋膺仕，良副評謨。維塞路之要藩，實兵防之重寄。職爾鎮撫，紆予顧憂。蓋爵賞之加，不遺於近小；豈藩維之任，顧可以弭忘。用是疇其展采之勞，寵以宣猷之號。緊謀人之衆，匪志朕之汝私。夫任重者，其憂不可以不深；位高者，其責不可以不厚。號名之美，禮秩之崇，非期假寵以擅榮，茲用論功而取稱。矧夫守國之圖，謀王

之師；聯輔相之籍於殿中，具士民之瞻於天下。其思祇慎，以副褒優。一可。

### 翰林學士除三司使制

勅：三司使，天下之盛選也。自尙書六官，名存實去，而三司之職事，所繼居多。則非夫仁明肅艾，足以輔世濟物者，奚宜任此哉！具官某，有疏通之才，有直亮之操。闔言崇議，足以經綸王家；高文典策，足以鼓動當世。遂以人望，揚于禁林。若夫施政之後，先生財之本末，蓋嘗深思而熟講，殫見而洽聞。則居天下之盛選，主朝廷之大計，詢考在位，孰如汝宜？夫聚天下之衆者，莫如財；理天下之財者，莫如法；守天下之法者，莫如吏。維予任汝，其聽勿疑。法之不善者，汝得以議而更之；吏之不良者，汝得以察而去。則夫調度之時，費出之無常，邦用之不給，元元困於征求，而愁怨於下者，直汝之恥也。夫行已有恥，而後可以爲士；矧吾左右信任，詢謀所同，而觀聽之所在者乎？往祇厥官，其亡以寵利，而爲士恥。一可。

### 誠勵諸道轉運使經畫財利寬恤民

#### 力制

夫閭閻百姓，而無奪其時，無侵其財，無耗其力，使其無憾於衣食，而可以養生喪死，此禮義廉恥之所興，而二帝三王誠勅百工諸侯之所先。後世不可以忽者也。朕夙興夜寐，聽治不忘，固游

宮室之觀，無所增飾，而躬以節儉，先天下之士；然而不忍人之政，考諸先王，未有以及之也。凶年饑寒，民之父子夫婦，猶有不得保其家室，而放乎溝壑，意者吏或不良，不知所以賑救省憂之方，而使之至此耶？今吾別諸道置使者，使得察吏之良否，而視民之疾苦，輒具以言，而任事者，或不惟朕志之所急，而以侵牟之爲政，其非所以遣使者慰安元元之意也。夫轉輸天下之財，以給有司之費，皆有常數，而無橫求，誠能御輕重，歛散之權，而禁因緣之姦，則何患乎經入之不足？彼前世良吏，能紓其民，而官事亦不耗廢者，豈有他哉？亦在乎勉之而已。若乃操聚歛之贏，以爲功，而不知百姓與足之義，非惟逆於朕志，而有司考績之法，亦將不汝容焉。朕言維服，其聽毋怠。一可。

### 皇姪右衛大將軍岳州團練使宗實可起復舊官泰州防禦使知宗正

#### 寺制

勅：先王糾合宗族，而分職以治之，所以嚴宗廟也。宗廟嚴，則禮俗成，而天下治，其事豈可以輕哉！今朕選於近屬，以修宗正之官，亦先王治親之意也。以爾具官某，惠仁孝恭，忠信純篤，故遷厥位，以稱禦侮之實，而使任事焉。夫士之欲施於政，未有不學而能者。學所以修身也，身修則無不治矣。朕言維服，爾往懋哉。一可。

皇姪右衛大將軍秦州防禦使知宗

正寺宗實可岳州刺史充本州團

### 練使制

勅：孝子之恩，慕無窮，而送終有既者，先王之禮也。具官某，祇慎克孝，能良於喪，去位家居，三年於此矣。其還位號，復序內朝，朕命維新，往欽無斁。可。

起居舍人直祕閣同修起居注司馬

### 光知制誥制

勅：先王誥命之文，何其雅馴而奧美，雖出命非有司之事，而討論潤色，蓋有助焉。以爾具官某，操行修潔，博知經術，庶乎能以所學，施於訓辭，俾掌贊書，往諧朕志。可。

起居舍人直祕閣同修起居注司馬

### 光改天章閣待制制

勅：楊雄曰：「周之士也貴，秦之士也賤，周之士也肆，秦之士也拘。」蓋先王之禮讓為國，士之有為有守，得伸其志，而在上不取，以勢加焉。朕率是道，以君多士，以爾具官某，文學行治，有稱于時，故明試以言，使司告命，而乃固執辭讓，至于八九，改序厥職，以

仲爾志，是亦高選，往其懋哉。可。

翰林侍讀學士右正言馮京改翰林

### 學士知制誥權知開封府制

勅：學士職親地顯，而開封典治京師，非夫忠厚仁恕，而有文學政事之能，孰可以任此具官某，造行直方，受材博敏，踐更中外，休顯有稱。論思禁林，正畿甸，詢謀惟允，其往懋哉。可。

### 范鎮加修撰制

勅：昔周人藏上古之書，以為大訓，而孔子春秋，天子之事也。蓋夫討論一代之善惡，而撰次以法度之文章，非夫通儒達才，有識足以知先王，不欺足以信後世，則孰能託尚書春秋之義，勸成大典，而稱吾屬任之指乎？以爾具官某，有該通之材，有純潔之操，辯論深博，溢於文辭，論用禁林，時議惟允。則夫案善惡，見聞之實，斷是非，去取之疑，人之所難，宜以命爾。爾其精思熟考，自勉以古之良史，毋襲近世比事屬辭之失，使來者無所考稽。可。

右司諫趙抃禮部員外郎兼侍御史

### 知雜事制

勅：朕置御史，以為耳目，非更事久而能自稱職，則不以知雜事也。以爾嘗任言責，有猷有為，行義之修，士人所譽，故遷郎位，



使於此官。悉其誠心，迪上視聽，義之與比，時乃顯哉！「可」。

### 屯田員外郎韓縝改殿中侍御史制

勅某：朕使學士五人，舉二人以爲御史，又於二人擇取一人，而以汝爲之。汝名臣之子，世載榮閭，體梯忠信，學知大方。無蔽于檢人，無撓于大吏，無迪上以非先王之典，而同乎流俗。時汝稱職，往其勉哉！「可」。

### 兵部郎中沈立可依前官充三司戶

#### 部判官制

勅某：擅一遺之財，而開闢斂散之，以給縣官之費，而又察舉吏士之賢不肖，聞民之疾苦，與夫入佐三司，而四方之言利者必稽焉，其職事之責等爾。汝以才能，屢試而行，義加修，使于東南，歲月久矣，其碑掌計之治，可以慰將命之勞。惟爾博學多聞，固嘗知夫百姓與足之義，古人有言曰：「尊其所聞，則高明；行其所知，則光大矣。」可不勉哉！「可」。

### 度支員外郎充祕閣校理李大臨三

#### 司度支判官制

勅某：天下之食貨，皆領於三司，故賸常難於置使，而又考慎共屬以稱之。爾以文學爲官，而政事嘗有所試，清明敏達，可使治

煩。往踐厥官，其知所守矣！「可」。

### 金部郎中朱壽隆三司鹽鐵判官制

勅某：取於山海之無窮，以助縣官之不給，所以開闢斂散之，不可以無術也。非夫廉辭敏明之吏，孰能任此者乎？爾純行美材，久於煩使，往共厥服，維是勉哉！「可」。

### 度支員外郎李壽朋開封府推官制

勅某：朕布大慶於天下，惟士之有能，有爲而不獲盡者，豈一日而忘哉？爾以政事之材，而濟之文學，無所避憚，以修厥官，陷于吏議，失職久矣。升正畿甸，四方所瞻，姑往佐之，以永民譽。「可」。

### 殿中丞充集賢校理陸經開封府推

#### 官制

勅某：天下無事，休養生息，百年於此。而京師之人衆矣，獨闢封以一尹治之，故賸常慎擇材士，以爲之佐，庶幾乎其不勞而治也。爾材茂質美，久於漕隄，而智能彌劭，行義加修，姑使治煩，往其自勉。「可」。

### 太常博士充祕閣校理張洞開封府

#### 推官制

勅某開封任軍事叢故常擇才士以爲之佐爾以文章學問  
列職校讎出試一州風績彌劬膺此遴選往其勉哉「可」

### 左司諫王陶皇子伴讀制

勅某自天子至於士未有不得學而成者今朕欲進諸子於  
學求可與居者而大臣以爾爲言爾久在諫工有聞於世茲惟慎  
選可不勉哉「可」

### 樞密直學士施昌言知渭州制

勅夫出河祕文中嚴於禁閑臨渭分關外肅於戎亭進陪侍  
從之聯往膺經略之寄茲爲異數授受惟艱具官施某才劭兼人  
聞望映世早據素纊寢階清塗南榻計庭稗贊之功可紀西廡樞  
府論思之効尤彰洎出總於藩條且屢制於邊瑣事經異舉政績  
用成宜易餘杭之符就撫氏羌之塞爾其坐護諸將善固吾圉而  
今而後無西顧之憂者緊爾之力可不勉哉「可」

### 知制誥沈遘知杭州制

勅東南輿區杭越重鎮奔惟師帥之選屬于侍從之良宜有  
優優式示毗倚具官某風姿爽拔器宇闊深早登高妙之科亟躋  
通顯之列按文東觀典學擅乎多聞演誥西垣英辭鼓乎羣動比  
抗章而詣郡期調膳以奉親曾未暮年已聞報政乃就更於淮海

庶益便於庭闈載念錢塘之邦方虛銅虎之守宜共易俗之命仍  
選應宿之資服我新恩寵爾故里與夫引會稽之級又相葛也爾  
惟懋哉「可」

### 龍圖閣直學士知河陽李兌給事中

#### 依前龍圖閣直學士知鄧州制

勅鄧於京西爲一都會提兵以守常擇大吏且有加命寵榮  
共行具官某寬和醇深方厚篤實昔山御史遂爲諫官延閣侍從  
之班方維帥守之任焯有績效見於事爲序于東省之華寄以南  
陽之重按撫吏士治軍牧民敷宣詔條鎮靖風俗緊汝能力往其  
勉哉「可」

### 龍圖閣直學士李柬之刑部侍郎充

#### 集賢院學士判西京留守司御史

#### 臺制

勅古之仕者難進易退陵夷至於後世而禮義廉恥幾乎息  
恬於勢利者鮮矣而苟得躁進者不乏於朝教之未孚朕甚患之  
願吾左右親近之臣行義合於古之仕者宜從其志使在位之貪  
者有愧而慕焉具官某名臣之子能自修敕出備蕃條之任入爲  
侍從之官而乃力辭顯榮退就閑職別都執憲地清務簡特峻秋

官之秩，仍通慶正之班。吾惟爾嘉，其往居息「可」。

### 知雜王綽吏部郎中直龍圖閣知徐

#### 州制

勅某：知雜御史，於朝廷之士為高選，非精明彊直，不能稱其任也。爾更踐多矣，有聞於時，故從遠方召置此位，乃以病告，至于再三。出臨大州，進直殿閣，又增郎位，以寵爾行。其亦懋哉！往共厥服「可」。

### 集賢校理鞠真卿可光祿寺丞依舊

#### 充集賢校理知壽州制

勅某：付之千里之地，能禁暴去悍，拊循鰥寡，使良民有以休息，而吏不敢為侵冤，豈非所謂能者哉？若爾之材，歷選于朝，而久試于外，固時之所謂能者。朕所加省而不忘。今夫壽郡也，故徒汝以治之，而稽汝歲功，當得遷位，承于光祿，其往勉哉「可」。

### 何郟知永興軍制

勅：朕初即位，慎考俊乂之臣，付之方鎮。具官某，廉清質直，敦大詳敏，藝文之學，政事之材，左右具宜，以有聲績。作國西屏，雍維大都，鎮撫一方，老成是賴。序遷厥位，往牧其人，其勗猷為，以膺任屬「可」。

### 潘夙轉官知桂州制

勅某：桂於西南，為一都會。蠻夷荒忽，鎮撫有宜，故於用人，常慎其選。爾清明敏達，寬博惠和，更事有功，簡在朝論。遷序郎位，往其勉哉「可」。

### 尚書左丞余靖制

勅：朕有大賚，雖疏，越微細必加焉；況於位序高，任屬重，寵章徽數，其可略乎？具官某，政事之材，藝文之學，踐更中外，光顯有聲。濟登大官，鎮撫荒服，能率厥職，相時休成，衍食序勳，往其祇服「可」。

### 天章閣待制司馬光制

勅：朕降左右，司朕躬之闕者，至親篤信之臣也。邦有大賚，其可以後而忘乎？具官某，政事藝文，操行之美，有聞於世，簡在朕心。相時明禮，庀事惟謹，進階序爵，其往懋哉「可」。

### 尚書戶部郎中知制誥張瓌制

勅：朕宗祀先帝，以配昊天，而均福釐於在位，疏遠微賤無遺者矣；又况於侍從之臣乎？具官某，德厚資深，志方行潔，安於義命，為世賢臣。考慎樂禮，相時大事，進階序爵，其往懋哉「可」。

# 翰林學士知制誥賈黯轉官加勳邑

制

勅朕初即位，奉行先帝故事，不敢有廢也。具官某，剛毅篤實，闔深博敏，先帝所遺，以論思左右者也。其遷厥位，加賜恩典，其往欽哉！「可」

# 翰林學士知制誥權三司使蔡襄轉

官加食邑制

勅朕祇若先帝之初，大賚以勞天下，職親地禁之臣，皆先帝所遺以助朕者也。其以後而忘哉！具官某，率德秉義，以綏寵祿，主國大計，功昭于時。班命有章，往欽無斁！「可」

# 翰林學士兼侍讀學士知制誥充史

館修撰王珪轉官加食邑制

先帝投天下之艱，以屬朕身，永惟所與濟此者，豈非左右之良哉！具官某，秉哲迪義，士民所望，論思潤色，有補於時。大賚之恩，外通四海，況於親近，豈可以忘！往服寵章，愈其慎志！「可」

# 翰林學士知制誥充史館修撰范鎮

轉官加勳邑制

勅朕雖哀憫，永惟付託之重，不敢忘先帝祖綏海內，敦厚羣臣之意。具官某，敦大闔博，清明敏達，職親地密，爲國信臣。遷序位等中之恩典，惟慎厥服，往膺顯榮！「可」

# 翰林學士知制誥權知開封府馮京

轉官加勳邑制

先帝以盛德成功，克終天祿。矜然在疚，永念嗣訓，非左右之良，孰與濟此哉！具官某，秉哲蹈義，士民所望。尹正京邑，善暨流聞。邦有大賚，當由貴始，往膺榮祿，無替厥修！「可」

# 集賢院學士余靖轉官加勳邑制

先帝君臨天下，餘四十年，功德之所及博矣！非文武之士，協力中外，何以致此哉！在後之侗，纂修成法，敢忘大賚，以勞衆士。具官某，敦大闔深，清明敏達，蕃屏帝室，厥功茂焉。恩典寵章，往其欽服！「可」

# 集賢院學士李柬之轉官加勳邑制

先帝棄天下，不及班命，以勞羣臣。朕繼大統，其承厥志。具有某，廉靜忠恕，濟以詳敏，能紹世美，爲時名臣。膺服寵章，往其思勳！「可」

龍圖閣直學士給事中呂公弼改工

部侍郎制

勅：竊德序功，制爲祿位，先帝所以熙庶政也。朕雖在疚，所不敢忘。其官某，保身慎行，舊有榮聞，陟降左右，是爲世臣。惠綏西南，風績尤顯，冬官之貳，其往欽哉！「可」

待制司馬光禮部郎中制

勅：左右侍從之臣，皆先帝所遺，以助興政理者也。有勞可錄，朕敢忘哉。其官某，行義信於朝廷，文學稱於天下，比更任使，會課當遷進位二等，以嘉爾績。爾方以經術入侍，而又兼諫諍之官，往其思致厥身，使朕之聰明，無所不通，爾亦維有無窮之聞。「可」

周沆右諫議大夫制

勅：舜舜黜陟幽明之法，其詳不見於經，蓋其考績之次序，必始於朝廷之貴者。朕率是道，進退百官，故於邇臣，無有私德。以爾具官某，忠厚謹潔，惠和寬博，嘗被方維之重任，久多侍從之要官。內外之勞，皆官有賞，而以稱士失實，控于吏議，爲郎武部，七歲于茲，著論積功，進位西省。夫職在盡規之地，官又以諫爲稱，維是將明，往其思勉！「可」

右正言知制誥知越州沈遘起居舍

人制

勅：列名侍從，分職方維，厥有庸勳，朕其甄序。其官某，端良足，以有守，精敏足以有謀，爲時寶臣，典掌明命，出撫州部，治弊流聞。內外之勞，進遷惟允。序官二等，以懋厥勳，是謂寵榮，往其祇服！「可」

掌禹錫趙良規並祕書監制

勅：祕書圖籍藝文之府，而置監在光祿衛尉諸卿之右，其材實德望，當有以稱之。以爾具官某等，歷官茲多，服采惟謹，序于卿位，簡在朝廷。宣布詔條，討論典故，久於任使，亦各有勞。宜推增秩之恩，以信懋功之法。往從官次，無或不祇。「可」

王綽祕書少監制

勅：朕初嗣位，大賜天下，文武在位，各以序遷。其官某，出入隨更，名聞休顯，奉常之副，用勞厥勳，乃辭官榮，以避親諱。綬予孝子，改貳祕書，往服寵章，靖共無戩。「可」

光祿少卿李不緒少府監制

勅：少府古官，於朝廷之位尊顯矣。其官某，行義祇飭，材能敏

達外更器使，續用每成。有司以聞，又當增位；往膺秩物，無怠厥修！  
「可。」

### 司封郎中宋任太常少卿制

勅：士以序遷，至於卿位，亦榮矣！非才智有以任事，行義有以保身，豈能致此具官某？中外踐更，久於郎選，明習衆事，見稱於時。往卽厥官，勉之無斁！「可。」

### 江南西路轉運使呂公孺太常少卿

制

勅某：太常兼變與伯夷之事，非夫蕪實德望，有以過人，孰宜爲之貳也？爾名相之子，以才見稱，出入踐更，休有風績。序遷厥位，其往欽承！「可。」

### 職方郎中通判太原府馬從先太常

少卿制

勅某：太常禮秩，異於諸卿，非文學入官，則不得爲其貳也。以爾行治之美，才能之敏，踐更多矣，皆有可稱。會課于朝，躋登此位，往求自稱，惟既厥心！「可。」

### 解賓王太常少卿制

王安石全集 卷五十一 外制

勅某：今之太常，兼變與伯夷之官，非夫寅恭清明，博習於禮樂，則孰能爲之貳也？今朕考行序勞，而以爾爲貳於太常。維爾嘗以材稱，而屢更任使，雖身在外，而名位亦云顯矣。所以稱此者，可無勉哉！「可。」

### 卷五十

外制

### 三司鹽鐵副使陳述古衛尉少卿制

勅某：考課黜陟之法，雖疎未嘗不信，又況於近而顯者乎？具官某，以才自奮，能世其家，出入踐更，休有風績。列卿之貳，其往勉哉！「可。」

### 郭永可光祿少卿制

勅某：外廷之位，能至於九列者少矣。具官某，踐更衆職，功善自昭；年除歲遷，以致卿位。進龍一等，往承惟休！「可。」

### 林億司封郎中制

勅某：朕有官祿慶賞以序功，而其施始於朝廷之近。爾以藝文被選而多所踐更，通籍禁中，居官闕下，序遷郎位，既極左曹，往

即寵榮，愈其勳勉！「可。」

### 薛求司勳郎中制

勅某：朕布大號，在廷文武之士，皆得進官一等；而伐閱當遷者，又各得以序遷。爾中外踐更，以才自顯，膺此恩典，往其勳哉！「可。」

### 權提點成都府路刑獄齊恢度支郎

#### 中制

勅某：朝廷選實才臣，以使諸路，而察庶獄之不辜，厥有庸勳，朕當甄序。爾才能行義，士論所稱，會課有司，實應選法，往膺休顯，其愈懋哉！「可。」

### 淮南轉運副使張景憲金部郎中制

勅某：入佐三司，出使諸路，皆朝士大夫之高選，有勞當錄，其可忘哉！爾行義之修，才能之勗，見稱當世，簡在朝廷，會課進官，往其欽服！「可。」

### 三司鹽鐵副使陳述古朝奉大夫司

#### 封郎中三司度支副使趙抃戶部

#### 員外郎加上輕車都尉權三司戶

### 部副使張燾朝散大夫刑部郎中制

勅某人等：朕初嗣位，奉行先帝故事，不敢有廢也。具官某等，行義稱於世，才能見於朝，佐國大計，為功多矣。序遷位等，其往欽哉！「可。」

### 朱處約祠部郎中制

勅某：爾嘗為御史，持論不阿；出守方州，稍遷使任。序功增秩，邦法有常，往懋厥修，以須進選！「可。」

### 孫杭孫琳祠部郎中制

勅某人等：都水之官，廢久矣，朕修之而用。爾為丞，爾維才能，懋建厥事，有司論課，當以時遷。進序名曹，往祇無斁！「可。」

### 提點福建路諸州刑獄公事王陶祠

#### 部郎中制

勅某：朕選置使者，清明于諸路，所以待之非輕也。爾踐更衆矣，才美有稱，備任遠方，能修其職。進遷位等，往愈懋哉！「可。」

### 權提點廣南西路刑獄杜千能祠部

### 郎中制

勅某：朕初即位，羣臣朝者，皆增位一等；有功當遷，又皆得以序進。爾材器行治，見稱於衆，奉使于外，治聲流聞。會課進官，往其祇服「可」。

### 三司戶部副使張燾兵部郎中制

勅某：考績三歲，進官一等，先帝所以勵羣臣也。具官某，秉哲迪養，有聲于時，能勵厥修，以宜官政。序功增位，其往欽承「可」。

### 苗振職方郎中制

勅某：尚書郎中，序列五品，其於朝廷之位，亦已顯矣。爾用選擢，嘗更任使，積功久次，得在此位。所居三歲，宜進一官。至今而後得遷，乃以爾嘗有謫，朕於黜陟豈苟然哉？自爾取之而已。往思自勉，以稱褒升「可」。

### 王舉元刑部郎中制

勅某：屬非其人，而與其罰，古之道也。爾久以才實，外更任使，以懋上報之稽，而塞人言之衆。膺踐厥服，往其勉哉「可」。

### 侍御史知雜事判都水監王綽刑部

### 郎中制

勅某：御史，皆吾耳目之官，而折百工以法刑之中者也。考其功狀，在法當遷，則吾豈可以忘哉？以爾具官某，忠厚諒直，有稱於世；踐更衆職，皆以能聞。故實之臺中，位次執法，名實之善，允于人言。姑釐積功，序進一等，位亦顯矣，往其勉哉「可」。

### 胡況都官郎中制

勅某：爾以才行，自昭于時，外分將符，內序郎位，致勤厥職，三歲于茲。積狀有司，法當增位，進遷一等，其往懋哉「可」。

### 周燮都官郎中制

勅某：賢善錄勳，邦有常法。爾以才能行義，登顯朝廷，序正郎位，三年於此矣。進遷一等，以懋厥勳，勵治我民，乃其能稱「可」。

### 宋孝孫比部郎中制

勅某：褒功錄善，邦法有常。爾共厥官，服采惟謹，久於郎選，會課當遷。愈其勉哉，以稱新命「可」。

### 監在京都鹽院錢暄比部郎中制

勅某：古者官有職而命有數，非有職不足以序羣才，非有數



不足以差衆功。今官有品，猶古之命數也。命之數，自一推而上之，至于九官之品，自九推而上之，至于一。大略蓋無以異，而其詳如此不同。唯其欲得賢者在位，則古今一也。爾以才能行治，進序於朝，年除歲授，既得列於五品。久於職事，法又當遷，其亦可謂寵榮光顯矣。其思自勉，以稱吾欲得賢者在位之意哉！「可」

### 三司戶部判官充祕閣校理王繹工

#### 部郎中制

勅某：三司理財之吏，與館閣校文之官，皆朝廷僑乂之選也。其於進秩，有異數焉。爾以藝文世家，而祇慎謹飭，久在此位，有勞當遷。序于名曹，其往思稱！「可」

### 李章屯田郎中制

勅某：覽善錄勳，朝廷之政，爾才能行治，比見推稱，會考績之法，當增位序。進遷一等，其往懋哉！「可」

### 周延僑屯田郎中制

勅某：郎中五品，而司田以待藝文之士。爾大臣之子，強學贖辭，出典一州。序功當進往祇厥位，其克懋哉！「可」

### 職方員外郎竇綱可屯田郎中制

勅某：漢朝不以郎官假貴戚，以出宰百里為不可以非其人。今之郎選，其重非淡比也。而郎中序于五品，其授豈可以輕哉？爾以文藝起家，以吏能從政。序遷此位，嘉爾勞，往服訓辭，勉求報稱！「可」

### 職方員外郎王紳可屯田郎中制

勅某：郎中序列三等，其品皆為第五，非積功久次，則不得至焉。爾以文藝入官，而濟之誼潔，久於任使，當得進遷。茲惟爾階，其往祇服！「可」

### 職方員外郎朱從道可屯田郎中制

勅某：尚書郎選於今為重，而郎中列于五品。爾精敏強果，號為才臣，積功累勳，以致此位。往共厥服，其愈懋哉！「可」

### 晁仲紳鄭隨可屯田郎中制

勅某：郎中序列五品，非久於任使，有勞而無罰，則罕得至焉。爾以文藝起家，以才能為吏，稱功累善，當得進遷。往其懋哉，思稱新命！「可」

### 太常博士權御史臺推官杜斲可屯

#### 田員外郎制

勅某尙書郎位，吾所重也。爾名臣之子，行義修勵，才能有譽，而職事無過。審官稽狀，當以時遷，新命維休，往其服祇「可」。

### 駕部員外郎薛侃孫可虞部郎中制

勅某郎中五品，於朝廷爲顯位。爾悉心爲吏，才敏見稱，嘗所踐更，咸有功最。進遷惟允，其往懋哉「可」。

### 提刑楚建中可司封員外郎制

勅某朕置使者，以察天下之獄。其選擇甚難，而視遇之甚厚。序功錄善，其可忘乎。爾行治才能，有聲於世。服官惟稱，會課當遷。以懋爾勞，往其祇訓「可」。

### 侍御史邢夢臣可司封員外郎制

勅某侍御史，於御史之選爲高，而尙書郎以司封爲前列。爾才能行義，嘗見稱推於有言職，爲一臺高選。任責未久，序勞當遷。往副司封，愈其自勉「可」。

### 都官員外郎充祕閣校理王昇可司

#### 封員外郎制

勅某爾以藝文高第，進仕朝廷。廉端謹良，有稱於世。校文祕閣，典事方州。甄序歲勞，進遷惟允。往共厥服，其愈懋哉「可」。

### 權梓州路提刑都官員外郎張師顏

#### 可司封員外郎制

勅某爾修潔精緻，達於從政。嘗更任使，皆以才稱。故以一路之庶獄，寄之督察。方行就事，會課當遷。往懋厥修，以求稱職「可」。

### 度支員外郎充崇文院檢討晏成裕

#### 可司封員外郎制

勅某爾以文藝之學，在討論之官。承于太常，典掌禮樂。有勞可錄，其以序遷於世。大家爾爲能保，往思淑慎，無廢厥勤「可」。

### 祠部員外郎充祕閣校理蔡杭可度

#### 支員外郎制

勅某序功錄最，邦法有常。惟敏厥修，乃能自稱。爾以校讎之選，受吾蕃屏之寄。材能行治，見譽於時。而會課有司，當遷厥位。官無虛授，往可勉哉「可」。

### 權利州路轉運使度支員外郎蘇窳

#### 可兵部員外郎制

勅某朕欲明清于吏民，而擇使以蒞之，非特使之轉貨財，以贖有司而已也。爾曠敏謹潔，達於從政。往充其選，克有成勞。序進

一官，愈祇乃服「可」。

### 三司鹽鐵判官度支員外郎集賢校

#### 理王益柔可兵部員外郎制

勅某：任賢使能，而繼之以黜陟，先王之所以治，未有改此者也。爾惟賢，故序于校讎之職，爾惟能，故列于會計之官。稽狀有司，法當增位，其遷一等，以懋爾勞「可」。

### 太常博士充集賢校理同起居注

#### 判三司度支句院錢公輔可祠部

#### 員外郎制

勅某：序功黜陟，邦法有常。爾文章博美，行義純潔，施於政事，又以材稱，會課進遷，蓋惟常法，往祇厥位，其亦懋哉「可」。

### 國子博士朱延世可虞部員外郎制

勅某：尚書虞部，掌天下之山澤，而修其時禁。郎官職事雖廢，而官名猶貴於時，非歷試而有勞，即不得以在此位。若爾之潔廉長慎，蓋知所以自保矣，其愈懋哉「可」。

### 比部員外郎鄭紳可駕部員外郎制

勅某：爾勤敏謹潔，以修厥官，會課有司，當得遷位。司輿之副，其往懋哉「可」。

#### 都官員外郎許遵可職方員外郎制

勅某：爾進以藝文，而兼通律令之學，故於為吏，常以才稱。第課有司，當得進位，祇予新命，厥往懋哉「可」。

#### 都官員外郎陳汝羲可職方員外郎制

勅某：審官之法，吏有勞而無罪，至於三歲，則遷位一等，亦所以勸也。爾文學政率，有稱于世，久更任使，會課當遷，往服寵章，念其思勵「可」。

#### 都官員外郎章俞可職方員外郎制

勅某：爾以藝文之學，政事之材，所更滋多，皆有善最。三載考績，法當進遷，往踐厥官，愈其思勉「可」。

#### 韓繹可職方員外郎制

勅某：三歲一遷，審官馭吏之常法也。然非智謀忠力，能舉其職事者，亦何以稱此哉。爾纘德善之慶，而以藝文自奮，施於吏政，強敏有聲，曷此寵榮，其知勉矣「可」。

### 都官員外郎劉牧可職方員外郎制

勅某朕置使者以察諸路而選才士以佐之爾行義智能比見稱遠往共職事會課當遷懋勉厥勳以稱官使「可」

### 都官員外郎王易知可職方員外郎制

制

勅某爾久於試用常以才稱出守一州可有爲矣而有司會錄當得進官往既厥心以祇丁訓「可」

### 屯田員外郎謝景初可都官員外郎制

制

勅某爾官司士三歲則格士任進其爵祿而方今審官之法用焉爾名臣之子操行修潔文學政事有稱於時審官序勞當以時進往踐爾位厥維懋哉「可」

### 屯田員外郎何世昌可都官員外郎制

制

勅某尙書之實多廢矣而郎位尙爲朝廷所重爾藝文操行政事之材推舉進遷以至於此出佐州治論功應條改序中行往其祇服「可」

### 屯田員外郎陳安道可都官員外郎制

制

勅某士夫奉法循理以共厥服至於三歲而無咎罰其可無進遷之法以慰勉之爾爾藝文起家而行義修飭比更器使實以才稱往服寵章愈其思勉「可」

### 屯田員外郎晁仲約可都官員外郎制

制

勅某賢善錄勳朝廷之政爾清明敏達士類所稱與治一州風政彌勳有司序績當得進遷往服寵章愈其思勉「可」

### 屯田員外郎唐諱可都官員外郎制

制

勅某爾藝文行治進有可稱爲郎尙書三年於此矣職事之最法當進遷愈其懋功以對新命「可」

### 屯田員外郎林大年可都官員外郎制

制

勅某士之有爲者豈必慶賞而後勸哉然黜陟者勸世之通法而爲天下者所不能廢也爾被文著德從政有聲會課當遷序官一列往其勵勉膺此寵榮「可」

### 太常博士胥元衡可屯田員外郎制

勅某：仕於朝廷者，有勞而無罪，至於三歲，則遷位一等，所以明有勳也。爾名臣之子，行義修飭，以才自奮，從政有稱，往服龍章，愈其思勉。「可」。

### 太常博士李處厚可屯田員外郎制

勅某：爾政事之材，藝文之學，潔身慎行，皆有稱。試請利權，是亦煩使序功錄最，當得進遷。列職南宮，往其祇服。「可」。

### 比部員外郎呂元規可駕部員外郎制

勅某：賢善錄勳，邦有常法。爾護軍繹將邊漕，悉心營職，才爵見稱。會課序遷，往其祇服。「可」。

### 吳充轉官制

勅某：士之好尚樂善而無求，則爵賞有不足以勸焉。而爵賞固不廢乎無求之士。爾文章行義，政事之實，士友之所服，朝廷之所稱。然方試爾于外，以觀爾爲而審官上。爾歲月之勞，法當遷位一等，此雖不足以爲勸，而天下至公之法，不可以廢者也。往其懋承之哉。「可」。

### 劉敞轉官制

勅某：賢善錄最，朝廷至公。况吾邇臣，在法當陟。具官某，文章博美，政事詳敏，心通道德之意，躬率仁義之行。久於侍從，實允詢謀，付以方維，又能鎮撫。甄序乃績，進遷厥官。朕命惟休，往其祇服。「可」。

### 劉覺等轉員外郎制

勅某：官所以制祿位之等，職所以較才分之宜。視職之廢舉，與行之失得，而下上其官，此吾爲天下立法，以廢置賞誅之大體也。爾持其行而無失，修其職而無廢，三年於此矣，不可以徒置也。宜有賞焉。序進一官，往欽乃服。「可」。

### 王伯恭轉官制

勅某：方今仕於朝廷者，率三歲而一遷，論者患其不足以勸功。然日月久矣，能祇慎不怠，至於罪悔，則亦宜有以褒嘉，此朕所以使爾得遷之意也。士之爲善，豈有常心，何必利焉，然後知勸。「可」。

### 王允轉官制

勅某：爾能誦先王之言，以得祿位，施於有政，又以才稱。承于

殿中，歲月久矣！博士之選，儒者所宜；以爲爾官，其往祇職！「可」。

### 李正臣轉官制

勅某書曰：「欽哉！欽哉！惟刑之恤哉！」此吾所以建審刑之職，而擇取智能之士，以爲詳議之官。爾以藝文起家，又能明習法令，靖共厥位，有伐當遷。姑使序于太常，而仍其覆讞之事。往爲密克，以稱欽恤之意！「可」。

### 劉叔寶轉官制

勅某士之修身慎行，宣力四方，豈皆以取爵祿之報哉！蓋其志有以謂義當如此，然而爵祿必稽行治勞烈而加焉。今吾序進爾官，以有積功之實，義不可以無報也。在爾自爲，則欲知夫義當如此，而無志乎寵利，然後可以事君。往其勉哉！尙有終譽！「可」。

